

Kajfvn

Kom ñi wirintukuleletew Rodolfo Lenz

Gvlympelu: Demian Araya Lobos
Mvxxvmwe: demianclaudio@gmail.com
Zewmamum tati wvnen: 01-07-21 06:26g

Licencia de distribución Creative Commons [Atribución-CompartirIgual 4.0 Internacional](https://creativecommons.org/licenses/by-sa/4.0/).

Kajfvn ñi pvci tukulpan zvgu

Kopiñ koñigen, tañi caw kaxvñ pigeý, ñi ñuke Rupayjag pigeý. Pvcvn hopan ta Kawtvn. Kvme wenxugefuy tañi caw em; feymew kureyey Lemunaw tañi ñawe. Abvn mew xewagetuy tañi caw; feymew konpatuy tañi pu gijañ mew, Kajfvkura mew. Feymew mvletuy; fey tvfa feley. Epu xipantu mew xipapan tañi caw mu. Feymew mvlepan tvfaci kawajero mew.

Kvmey ga zuamfiñ zvgu; feymew kimvn cijkatun. Petu mvlen ruka tañi caw mew, kimelenew Namunkura. Kimmey Kolvpvji cijkatun; fey kimelpatuenew kay. Feymew pvci kimvn piken iñce Kajfvn. Inarumefiel mew zvgu ajkvtufiñ cem pimekey ce; ajkvtufiñ, feymew kimvn piken. Epewi ce, ajkvtun; feymew kimvn epewvn.

Kvme wenxu kvpan iñce; Lemunaw em ñi cezki iñce, Kajfvkura ñi cokvm iñce, Ordike ñi cokvm iñce, Kuzvage ñi laku iñce.

Nvxamkantun

Mvxvmi wekun. Amuge iney cey.

Kiñe kawajeru kvpa peeymew.

Ramtufige iney cey, cem zuamgen. Konpape. Feypifige: feykaci amuan.

Marimari wehvy, cem zuamimi?

Kvpan pepapeyu, zvgulpapetuyu.

Fentepun ayveyu tami pefiel mu. Anvge. Cew kvpaymi?

Kvpan ñi mapu mew.

Cew am ta mvley tami tukukan?

Pvcimapuley.

Cumten mu xipapaymi ruka mew?

Tayi pu liwen xipapan. Fvta kuyfi pelaeyu.

Cew mogel mvlepeymi, lelfvn mew kam waria mew?

Mvlepen tukukan ñi maje mu.

Cuci mew mvley tvfeyci tukukan?

Naq pvle bewfv (wentetu bewfv). Kayu lewa naq (pvra). Pu liwen xipay, puwkey ragi antv.

Cem am tukugekey tvfeyici mapu mew?

Naq pvle wa, kacija tukugekey; wentetu tukugekey poñv.

Cumten kujin waka niey tami maje koral mew?

Koral mu pvciley, welu furitu mawiza mew, fey mu abvn niey.

Cumten niey cey kom mew? Wiya am rakigelay fe?

Mvley epu pataka epu mari kecu waka.

Ixokom waka abvkelu am fe?

Mvley pataka waka abvkelu, meli mari mansun, peno, toro mari keculey. Ixokom pvcike waka zoykvley.

Cumteñmameymi tiyew?

Mvlemen mari reqle antv

Cumteñmapatuymi kay?

Wvñomen xafvya (epuwemum xafvya).

Kisu kvpatuymi kam kompañgeymi?

Kvpatun yu kiñe gijañ iñciw, ka kiñe kona kecaniey cemcem mvla.

Fentepun fvca ka mapu kvpan, fentepun kansan.

Ajkvtuge pvcice; iney pigeymi?

Kajfvn pigen. Cumten xipantu nieymi?

Nien mari kiñe xipantu peno.

Cew mvleyymi?

Mvlen ñi ruka mew ñi caw.

Nieymi peñi?

Nien, kiñe lamgen wvnen, ka kiñe peñi inan.

Ka iney mvley tamvn ruka mew?
Fvta ñi lamgen, ka ñi kuku (cucu).
Cumten xipantu niey tami kuku?
Kimlan cumten xipantu nien, fentepun kusey.

Gvmapeymi am? Cem mew anta gvmapeymi? Gvmawekilge! Feypien, cem mu tami gvmapen?
Zoy newentu zvuge, kimvñmalaeyu.
Bay tañi caw em, ka tañi ñuke fentepun kuxankvley.
Cem kuxan niey anta mi ñuke?
Niey perte, bapelayay ka.
Cumten mew kuxani?
Mvley gvtantu mew negvmwelay reqle antv mew.
Kintulaymvn maci?
Werkvpefuyiñ kiñe kona yegemeafel, welu kvpalay tvfeyci maci.
Abvmapu xipale am fe?

Kim cijkatuymi am kay?
Kim cijkatulan, lifru mu pvcí kimfun.
Tvfaci papel zv gulafuymi? Kimimi tañi cem pin anci?
Kimlafañ, mvte weza cijkatungey.
Kvpa kimkeymi cijkatun am?, iñce kimlafeyu.
Fentepun ayvafun, mvte vbgumgen.

Tvfa mew mvley kiñe ruka wejilelu? Kvpa mvlefun kiñe kvyen ñi kvpa kim mapuzvgun.
Wvle wejiletuay tieci ruka naqpan mawiza mvlelu.
Feymu mvlelu, amutualu tvfaci puh.
Feyvrke may, zv gulmeafañ geh ruka, eluaelimu ey mi lepvtuaymi, wejimtuaymi wvle pu liwen.
Wixalekilge wvlgñ ruka mew, pelan tvfa mew.
Kiñe pvle kvnuge. Mvte zumiñgey.
Tvfaci ruka mvte kvmelay. Tvfaci mapu mvte ijfozgey, mawkey.
Kvpamtul ruka mew mvtewe cozgey, feymew konpakey wvxex.
Tvfa mew mvte weza hvmvhgey, mvte pozgey ixokom.
Eymi mi ruka mvte lifgelu xokifiñ ka ruka mew.
Nvlakvnuaymi ruka, antvgele, feymew kvme agkvтуay tvfeyci mapu.
Bvfkulafañ tvfaci puerta. Kvpaelen kiñe mamvj bvfkua.
Mvley wigkefe am tvfa mew?
Mvley ka, welu tvfa mu kvpakelay.
Lelfvn mew wigkvgekey ka, welu ruka mew konpakelay.
Peafun ci am kiñe kona tvfa mew?
Mvley kiñe.

Mvte kansalen, xanakvnuan. Gvtantu mvte xayaykvley. Mvte kuxan ñi agka. Mvte wvxen, kvpalelen kiñe ponxo ñi ekujuam. Kvme gvtantu kvnuen, kvme pvpvmge wente gvtantu. Wvle xepelaen wixayael pu liwen.

Kvme rulpaymi puh, kvme umawtuymi?

Kvme umawtun (mvte weza umawtun, fente rupaci xepen)

Xewa mvte wagkvpey, afkazi ruka vlkatupey, wirarepey.

Kvpa wixalan petu, kona, kvpalelen kiñe ponxo wente wagku elelpaen, iñce kvpa anvñ.

Kvpalge kiñe mesa tvfa mew.

Wvywvñ, tukuge ko kiñe karu mew. Tvfaci ko pozgey eñvmkvley. Kvpalelen lif ko. Lipvmfige karu. Agkvmkilge tvfici poz pañu mew, lipvmfe kvme pañu mu. Lipvmelen kucijo, ka kvcalaen kucara. Kvpalelen iael, mvte gvñvñ. Kvpa ilafiñ tvfaci ilo, kvmelay, mvte weza hvmvñ niey. Zoy kvme ilo agim, kvme afvmfige, ojayay. Kvme kvxalgelay. Pvcike iran zewmage, feymew pimuntukuaymi kvxal. Cogi kvxal, kvme vyvmtufige. Rvgalfe xufken mew kvxal, feymew coglayay. Wazkvmlen tvfaci ko. Petu wazkvlay. Kaji felekape kvxal mew caji. Anvñentuge caji, wazkvwazkvgey, wente vxvfxipamekepay ko. Kvme inarumeniefe vxvfnoal tvfici ko. Lvpvmvñmayafenew ñi kuwv. Alxobpaen wikef kofke. Tvfeysi kuyfi kofke no, mvte xenkvlegey ta tvfey.

Cew mvlepeymi pvcì kampu?

Xipapelan, tvfa mu mvten mvlepen.

Koybatuymi, iñce kom pvle mvxvmpeeyu, ajkvpelaymi. Feypien, kvme feypien, koybatulmi wimayafeyu.

Marimari ahay, kvmeleymi ahay, fewla wixaymi am?

Eja xafvya kuzuken, wixaken xipapay antv.

Tayi pu liwen pvcì kuxanvñ, Cumimi?

Mawvhi ñi kvpatuel, ijfozvy ñi namun, feymew wvxen. Ñi buku fentepun kuxani, pepi amuwelan.

Pvcì cementuymi tvfa? Feman pvcì kvmeletun. Petu kvme mogetulan

Cem mvley tiyew?

Ñi kompañ feypienew: kvla wigkvfe kvpalgey, pi.

Cem wigkvlu?

Wigkvlu epu mula, ka kiñe potvro ñi koral mu.

Iney pvresuy kay?

Meli soltaw ofienu, ka kiñe soleqaw. Enxakawvrkelafuygvñ, welu tvfici soltaw kiñe bagvmi, ka epu xarigey. Kiñe wehvy epe bafuy tvfici nalvñ mew.

Cew kvpa amuymi?

Amualu waria mu iñce gijamean mansana.

Amukilge. Cem no rume nielay tiyew. Kompañen ñi ruka mew imeayu.

Kvmey mi fvrenefuyel, petu gvñvlan.

Puh may kvpayaymi iael. Vgelnieyu. Kvpalay mi maje.

Ya, mawvhnole amuayu.

Kvpanoalu, xokifiñ, egu.

Cem mu am kvpanoalu xokimuyu, kvpayayu piwjeyiñ may ga. Kvpanoalu mawvhmawvhgelu mew xokiwliyu fey piwafuyiñ ka.

Kvmey ka. Konpamu mvten. Zew afvy iael. Korv newe kocelay tukulelmuyu cazi.

Tvfa ñi mvlen karv xapi, kelv xapi ka.

Mvte kvmeafuy. Cem no rume ejangelay.

Kvpa iymu karv wa?

Mvte kvmerkey tvfaci wa. Ñi walmum furirukaley, fey ta tvfaci wa. Kvpa ialaymu pvcin kagka kay?

Ya, pvcilen may. Wvne pvtukvnuyiñ may pulku kiñe mvta mew.

Tvfa mvley koci poñv, yagaj poñv, kvme kofke wa.

Kvpa iwelan. Mvte wezan.

Mvte pvcil ilu, xokifuyiñ. Petu amukilge, pvcin mawege, nvxamkayiñ.

Amukejeci may. Ka antv pewayiñ, pewmagen.

Kvme amutuaymi.

Cumten mu cey hampvlkayaymi?

Xipawvyeafun, kiñe zvgu mew, feymew mvlen.

Akule kecakujinfe, feypiafimi: kvpayay pepayaenew.

Akuy tvfeyci logko ñi kona yegvn, kvpa kompañeyu tami hampvlkayael.

Cumten wixamimi tvfeci epu kawaju mu?

Kiñe peso kiñeke antv hampvlkan mu.

Wvle kvpalaymi epe xipapale antv.

Feman.

Cem mu fente abvlmaymi? Cew mvlepeymi? Fente pvrabay antv.

Iñce nielan zvgu, kiñe kawaju ñami xafvya. Fey kintupefiñ. Abvn mu wvla petufiñ pu lemu.

Zvguwakilge, cijalen ñi kawaju, cemcemge kagelu mew. Sinta mvte kvltoley, nvrffige, kvme xarintukufige tvfaci saku vxvfnaqnoam. Ixipu mvte pvcikay, amultufige. Ñomgey anta tvfaci kawaju, lofogey anci? Nvnielen wvxantukuwe, iñce pvrayan. Kvme xarifige tvfeyci cecvm, kvlvley. Wele pvle zoy kiñeñ pvle rupaley, man mew tukulge pala, toki tvfa pvle.

Cuci pvle kvnuayiñ? Wvñoayiñ man pvle am?

Tvfa mu vgkvkvnuayiñ, ka fey ci wvla rumeayiñ bewfv mew. Feymew pvrabayayi keykeytuayiñ tvyeci mawiza mew.

Abv pvray iñ pvrabay? Cumley rvpv kay?

Tvfeyci rvpv mvte kuragey, newe waywaygelay. Wvnelege cecvm kawaju emu, iñce inalean.

Abvkey anta tvfaci ko?

Puwlav rume pvxa kawaju.

Mvte wvxuy kay?

Faw mvte wvxulay, famgen mvte wvxukelay. Kvpali pvcin ko. Zew pvrapiyĩ mawiza mew, fey tvfa mu kvme amuayĩ tiye pvle naqkvnuputuayĩ.

Tvfa mu epu wzay rvpv, cuci inayafĩ?

Tvfaci rvpv man pvle mvlelu zoy abv rupay, zoy miawkelu ce, xokifĩ.

Iĩce, zoy kmelu wele pvle mvleci rvpv, xokifun. Tiye mu mvley kiĩe pvci kampu, mvxvmfige. Ajkvĩmalaenew ta tvfey.

Tiye naq pvle kiĩe zomo, ramtufige.

Zomo! Cew amuy tvfaci rvpv?

Tvfaci rvpv amuy tiyeci kacija mew pvlom, feymu amuaymvn. Ka tvfaci rvpv amuy Xayen.

Tiyeci ruka mu pvci faw pvle rumev tvfaci rvpv.

Ñamñam rvpv ci am?

Femlay. Furu mawiza wvñomaymvn man pvle.

Rumeayĩ ci am bewfv mew?

Rumeaymvn, welu pvcikev, tiyew mvleci ce ramtuaymvn cew mvlen gilawe.

Cumten mew puwayĩ cew Pitoria? Mvte abvmapuleweyĩ ci am?

Ñocilelmvn puwaymvn konle antv.

Mvley kay umaqwe ruka?

Mvte mvlelay wigka tiyew, welu tvfeyci logko wehvyeyĩ, fey ñi ruka mu umaquayĩ.

Nentukvnukilge lelfvn mew taĩi kawaju. Elkvnufige faw, pvci mapu ruka mew, elufige pvcin kacu. Gijamege pvcin wa.

Papay yem, nielaymi kuram wvrael? Mvley we ilo?

Agim mvten niefun, welu mvte kmey, iĩce zewmael.

Afvmelen kaxukalaen ilo ka sefoja, zoy tvkuge poĩv. Afvmelen kecu we kuram. Feypafimi koĩi, kvpalayay ko tvfaci mvtawe mu. Vkelelen ñi kawaju, amtunoam puh.

Nielaymi acawwaj wvrael, papay?

Mvley epu pvcike acawaj ka kiĩe kuze acawaj.

Cumte falilimi tvfaci acawaj mew?

Kvla cawca.

Eluaeyu meli real.

Ya! Tvfev may.

Feykaci bagvmelen tvfaci acawaj. Wvle pu liwen zewmalaen acawaj kore, mvte kuxani ñi piwke. Mvte wezañmalenew agim ilo awka. Mvte abvn tukulelafimi xapi. Pepi takulafuymi ci am tvfaci wecoz ruka, mvte konpay kvrvf.

Takuafĩ pinu mew, welu tvfaci pinu puwlayay zoy elmeen.

Wvle pu liwen kvpalelaen kiĩe cava kufvn ko.

Zewmalaeyu.

Kecakujinfe, kvme vtay kujin?

Newe gerkelay kacu, ko rume gelay.

Cecvm kvpalci mula mvte weray, cumafuyĩ cev zoy ñi weranoam.

Cañulafiyĩ kiĩe xvlke gvñkvngelu. Ramtutefige tvfaci kolon niefule xvlke.

Niefuy, welu kiñeke peso falili.

Kvla peso eluafimi kecu xvlke mew.

Zewlay kore, papay?

Epe afvy.

Nentuge takucajawe, pean cem ñi mvlen. Matukelge, mvte antvgey, mvca y petu iñ xipayael.

Cumte kujiaeyu tvfaci puh mew?

Kimlan falin kacu tamvn umaqpamum.

Ramtumefici tañi fvta.

Feyvrke may, mvxvmfige, zvgulafiñ.

Pvxin mawvkejege.

Tiye kvpatun ñi fvta wvnen fotvm egu.

Kimimi rvpv amulu Temuko?

Kimfiñ.

Pean rvpv?

Wvne rumeaymu lelvn mew. Feyci wvla konpuaymvn lemu mu. Feymu pepuaymvn rvpv.

Tiyew pepuaymvn kiñe bewfv, feymu rumeaymvn.

Gelay puente?

Mvlekefuy kiñe, pukem yey ko. Fey tvfa kvme elgelay, pvcikewetule wvla ko kvme elgetualu.

Cuci mu mvley gilawe?

Zoy wentetuley, abvkey foxa. Tiyew mvte wezaley rvpv, newe pegekelay. Kintuafimvn, feymu peaymvn.

Kintulmeen kiñe kimlu gilawe.

Inan koñi kompañaymu, tvfaci pvci kampu mvte kimi. Fey mvte kimi tvfeyci gilawe rvpv tvfeyci foxa mew.

Feyvrke may, feypifige koñi, feykaci kvpape.

Kvpa amulaymi iñce mu? Kimelmean rvpv amulu Peyro mu? Rvf kvme kimi rvpv? Cumte rupaymi tvfici bewfv mew?

Epuwemum wvla.

Rumeafuy ci am ñi kawaju ijfozal ñi cecvm?

Rumeken kiñe foriko mew zoy pvci mi kawaju mew. Feyci antv zoy abvkeley bewfv. Tvfa mawvhkelay. Newe kvme ijfozlay rume ñi namun.

Amuyiñ may.

Tvfa ñi mvlen bewfv. Tiyew rumekilge. Wayway mvte xayafgey, faw pvle zoy kvmey. Zoy kvzawgelay naqvlmu tvfa mew, iñce wvnelean inaniean mi kawaju mew.

Mvte abvley fvxake kura bewfv mew am?

Femlay, mvte lolololoy tvfeyci bewfv. Zoy pvci abvmapu wvne koni foxa mew. Zoy kvmeafuy naqvlmi, ijofafuy mi kawaju. Zew rupayiñ foxantu mew. Fey tvfa wvla pvrakawejutuge.

Iney pigey tvfeyci waria pefiyu tiye mew inaltu mawiza?

Waria no, walwe ga tfey epu kolon wixan.

Vy niey tyeci mawiza?

Kvme kimlafiñ, kurv mawiza, xokifiñ.

Iney pigey tiyeci zeqiñ piren nielu?

Cagvj zeqiñ ta fey.

Nielay kiñe majin pvci mapu tvfici zeqiñ mew? Mvley buan, xapial, tvfaci mawiza mew? Ka cem kujin kay mvley tiye mew?

Mvley buan, puwyu, welu kvpakelay tvfaci kvyen, welu kvpnayay ka pvci kuyfi. Cumten mew pirenay mawiza mew, feymew naqpayay xapial.

Jvkakefimi xapial am kay kam cumkelafi ce? Cumgeci nvkefimi xapial tvfa mew, xewa mew, lasu mew, xalka mew?

Mvley cajwa kay tvfaci bewfv mew?

Mvley, welu mvte pvcikey, cajwan wilal kañamo mew.

Kimfimi kay ka xipacajwan? Cem kvyen mew tukugekey wa tvfa mew? Cem kvyen mew tukugekey kacija? Cumten mew nvmingey wvne we poñv? Nieymvn abvn poñv, abvn zegvj rupaci xipantu mew ama? Kvpa iymi ilo tfeyeci vñvm? Kvmeleanci? Cem fvca vñvm mvley tvfa mew? Fenten xukur niey tvfa mew? Cem kvyen mew zoy mawvhkey tvfa mew? Cumten mew abvn naqay piren? Arkvkey kay tvfaci bewfv pewvgen? Kimnieymi rvpv mawiza mew? Kecagekey kay waka tvfaci rvpv mew?

Mvna arelan, wixayiñ pvcin, kvpa naqvn, kejuen.

Tiye mvley kiñe ruka, pemefiyu nieafuy ci am iael.

Marimari ahay! Eluen permiso naqan, kansatuan tvfa mew?

Naqge may! Konpage ñi ruka mu wixan, anvpage tvfa mu faci pvle wvbgñ.

Tvfaci kvme zomo tami kure anci?

Fey no, tañi kvrvn ta tfey.

Cumten pvcike ce nieymi? Kvme mapu nieymi? Cem mew mogekeymi?

Iñce ñi inal fotvm iñciw kvxawkeyu anke kexan, niey kiñe vbmen wigka mu. Ñi wvnen fotvm mvlekey tvfa mu kosecayalu.

Cuci zomo kure tvfa mu tvfici logko? Nieymi pvlata am kay? Iñce fentepun kvme kujiaeyu.

Iñce mvte xewagen ahay! Cumte kujiaen tvfaci tupu mu?

Tvfa papilyege soleqaw mew, guyvkilmi, naqvmalayaymi.

Kvme elge cecvm, vxvfnakvmkelu xokifiñ. Ñami kiñe wejiñ aneka.

Entucijalen ñi kawaju, pvtokolmeaymi.

Cem pigey tvfa? Cew mvley? Cew kvpnay? Kvpnaymi ta tvfa? Ka mapu mew kvpnaymi? Cem mapu? Kimlaeyu iñce, pekelaeyu. Feley may. Iñce koñigen tvfa mu. Iñce kuyfi kimkefeyu. Iñce kimlaeyu, kuyfi pvcikecegelo iñciw kimfuyu.

Zoy pvci kuyfi kim mapuzvguan.

Tvfa mu ce kom kvmelekay.

Iñce abvn zvgu piaeyu, feymu kimaeyu kay.
Wiya iñce peeyu. Anvci tvfa mew. Anvlen.
Anvge. Cem zvgu mvley?
Cumten xipantuymi?
Zoy nien pvlata ñi wehvy mu.
Kejuen yekvnuen tvfaci mamvj.
Iney zewmay tvfa? Eymi kam mi lamgen?
Rumepelu bewfv mew iñce ijofgey pvxa pvle.
Fentepun kvzaw mu mogeley ce.
Kim wigkazvguymi?
Zvgulafiñ, pvci zvgun mvten. Ñi maje zoy kimi, zvgyu.
Tvfa zoy kimniey tiyeci lemu.
Tvfaci ruka weza ruka, kvmelay. Kvpale kvrvf xanpelayay?
Cew xafimi Peyro? Inaltu bewfv xawfiñ.
Mvlepeyu mawiza mew ixokom puh, mvte mawvhpey.
Tvfaci wenxu nalpey winkvfe yegvn, bagvmgeigvn abvn.
Kom wehvygvn, mojilelu egvn, jazkvtyugvn.
Bay, pigen, bay mi pabu, pigen, iñce mupintulan.
Tvfa epu pvtulay, mvte wvywvygu.
Pvci kampu jvkay nalaetew ñi caw.

Tvfa ñi mvlen ruka ñi caw.
Tvfa ñi mvlen kawēju ñi maje.
Tvfaci zomo kuyfi kecu niekefuy pvñeñ, epu zomo, kvla wenxu.
Tvfaci wenxu niekefuy kecu pvñeñ, epu ñawe, kvla fotvm.
Feymew epu fotvm bay, vrfiy bewfv mew, rumepelu pukem.
Fentepun wvxuy tvfayci bewfv, feymu yegey, nakvmeyu wvxun bewfv.
Iñce kvpa nentufuyiñ egu, pepi nentulafiñ egu.
Pvcin muwefuy ñi vrfiael kay.

Ruka logko zoy kvmey ruka pu kona.
Zoy kvmey ruka pemefiñ Faldifia.
Kvpalelfiñ kiñe estipu tañi wehvy, cija niefule cijayafuyu kawēju.
Ñi wehvy kvpalelaen kiñe fvn rvgi, peli fvn rvgi kvpalan, pienew ñi wehvy, mupiltulafiñ ñi
kvpalafel petu penolu am.
Pilmi konael iñciñ ruka mew kvzawelaen, eluaeyu kiñe ruka, iael, meli real nielaeyu kiñe
antv.
Mi kure kvpayafuy inarumepayafenew ñi pvcice. Werkvlelen mi ñawe amualku waria mew
gijalmeaenew kofke, ilo.
Wvle rume mawvhjefule kvpayaymi mvten ñi ruka mew, mvleay pvciken kvzaw.

Ñi epu fotvm amuafulu bewfv mew, pepi rumelayu tvfeyci kvba mew, pienew ñi epu fotvm nienolu egu okota.

Nienolu sumej kvmelay rumeal tvfaci lemu, fentepun pvjintuafuy namun.

Fentepun wezayawvn hampvlkael, yefun meli kawaju, kecu mula cecvm.

Kiñe mvla vxvfkonu kiñe lil mew, feymew bay, kagelu vrfi rumepele iñce bewfv mew.

Kiñe kawaju muxuri kiñe xan mamvj mu, waxoy ñi kiñe hamun (lipag), feymew xalkatukvnufiyu, nentuxvlkefiyu.

Kiñe yewa fentepun lofogey, kiñe liwen cijayafilu iñce mankvenew ñi lipag mu.

Fentepun kuxantuy ñi lipag abvn antv, pepi newentuvelan, feymew pepi kvzawvelan ñi lipag mu.

Kiñe ñi kona vxvfnaqi kawaju mu, feymew wvzkay ñi logko, yug kura mu puwi ñi logko, feymew fentepun mojfvy ñi logko, Kimwelafiyiñ wixañpvramfilu iñciñ.

Kiñe antv xawfiiñ pvcu rume rvpv mew pu mapuce wezañmagelu, pilay iñ rulmeaetew.

Ñi logko egvn wigka kurvpayumgey, niey ñi age fentepun wezaagegey tvfeyci wenxu.

Kaxvtobgey, kiñe nielay ñi pilun. Ajkvkefiñ kiñe wenxu wigkvfe xipay kuartel mew ka xipantu.

Tvfeyci wenxu pvresugekey bagvmlu epu wenxu nalpelu.

Fentepun jvkakefiyu tvfeyci wenxu, iñciw mew zoy ñuwayam, kvme xalka nielu am, feymew kvme wehvy pifiyu.

Tvfeyci tapayu: eluaen kiñe kvme mula cecvmkvlen, pienew, tvfeyci cecvm mvrke.

Feypi: kujituayu pewvgen Falzifia mew. Iñce mupiltulafiñ, puwnoafulu Falzifia am, puwle pvresugeafulu am.

Feymew ayvwnv amutulu tvfici wigkvfe, kiñe mula am mvten am yetulu.

Ixokom hampvlka mew kvmelkalan.

Iney ñi kawej tvfey? Eymi anci?

Iñce no, tvfaci kawaju ñi peñi, piyiña mvten iñce.

Ñi peñi iñce mvleyu kiñe ruka mew, tiyeci mawiza mew mvley ruka, iñce pvrañmakelafiñ ñi kawaju, ñi peñi kay konpakelay ñi mansana mew.

Feymew mvleyu ayvkvleyu, kizuke nieyu zvgu.

Tvfey mi peñi wvnen, inan anci?

Feley wvnen ta fey, iñce nien kie peñi inan kay iñce mew, fey ñi ruka ñi maje mew.

Fey tvfici pvcilu epu xipantuy eskuela mew kim cijkatun.

Tvfeyci pvcu kampu mvte wezañmagey, muntuñmakeenew ñi cumpiru, pikelay elutuaetew.

Cem zvgu mu muntuñmakefimvn cumpiru tvfaci pvcu kampu? Gvmagvmajelay anci ñi ñuke wimayaeyew puwtule ñi ruka mu cumpiru genole?

Re ayekalpefiñ may ci, weza pieymu, feymew muntuñmafiiñ cumpiru.

Feypienew: xafoy mi caja, pienew. Mupiltulafiñ, ejkakvnuy pu pinu, eluafiel ñi mvha akule.

Fij weñeñmaenew tvfíci pvci kampu, wemvñentuafíñ ka pekayalu am íñce kíñe kona.

Iney zewmay tvfa? Eymi anta elimi, kam mi lamgen.

Mvlepupeyu lemu mu, kíñe puh, mawvhi. Kintupefuyu yu laku, wiya yu penofiel. Feymew petufiyu pu pulul mamvj anvkonkvlelu, mojiley, umawkvley. Kimnolu tañi mawvhpen, xokifíñ.

Zuamlafíñ kvzawael lelfvn mew, zoy kvmey kaxvmamvjvn lemu mew, cew kvbantukemum.

Wvle amuaymi, wejimtumeaymu rose.

Tvfa mu niealu kvme kacija, xokiwn, fentepun kvme mapu, mvley ko.

Arelkejeen toki, íñce ñi toki waxoy.

Arelaeyu, welu yugvmkvñulelaen, kura mew puwvlpuwvlyeyu, xokifíñ, tvfeyci kampu, kaxvpele row, fente femlayafuy.

Mvxvmfíci ñi maje, fey zoy kim wigkazvguy ceni mew, fey kom feypiaeymew cem zvgu rume ramtufilmi.

Kimvñmalaeyu mi zvgun, mvte matu zvgukilge.

Pu wayway xaffíñ epu pvci ce, kimelenew rvpv ñi caw mew.

Feykaci xipayaymi, kvpa puwvlni ruka mu ñi kuku mew petu konnon antv.

Feyvrke, amuan may, kvpa kompañlaen am?

Amuliyu zoy ayvwkvlen amuafuyu.

Mankazali mi kawaju mew feymew amuafun, ñi kawaju yey ñi caw home bewfv giyon mu.

Mvte abvñmalayafuyu yemefiliyu, lasumeafuyu.

Konle rume antv puwliyu kuku ñi ruka mew, cumlayayu, mvlelu am apon kvyen.

Yeayu lona mvrke, ka pvcin agim, kíñe limeta pulku.

Kíñeke mew niekelay iaqel, ka pukem kíñeke antv ikelay.

Lici mvley mvten, ka pvcin mansana, mvrke, agim afi.

Epew kujiñ

Epew Xaru yegu Kanin

Epew vñvm kuzeayu, pirkey, amuayu bafken mapu, pirkeygu xaru yegu kanin.

Feymu kuzelkeygu iney ñi zoy lefael.

Feymu amulu egu gvnetuyekvmerkey xaru.

Femkilge kompañ, pigerkefi xaru.

Fentepun hampvlkafe kawēju nien, pirkey xaru.

Feymew puwvrkey bafken mapu, wvñomerkeygu.

Ragin bafken kansarkey xaru. Kanin akuturkey ñi mapu mew.

Epew Kanin egu Gvr̄v

Kuzeayu kanin, pirkey gvr̄v. Ya, pirkey kanin.

Naqay fvta mawvn, xagkoñmaleay, ragi puh fentenay, ka xagliñ naqtuay, iney ñi zoy puwaqel wvx̄e mew, piwvrkeygu.

Feymew rontayayu, pirkeygu. Epe ragi puh ramtugey kanin ñi xepelen, xepelakaymi kanin?, pigerkey. Xepelekan, pirkey.

Ka pvci abvn mew ramtugerkey kay gvr̄v, xepelekaymi gvr̄v?, pigerkey gvr̄v, xepelelafuy wenxu?, pirkey.

Zoy abvpun ramtugerkey kanin ka ñi xepelen. Zewma wvx̄ey, piam, gvr̄v. Xepelekaymi kanin?, pigerkey kanin, feymew eja zv̄gurkey, feymew, epe bay weza kanin, pirkey gvr̄v.

Epe epe wvh, xepelekaymi gvr̄v?, pigerkey gvr̄v. Feymew epe cokon bay, piam, feymew eja zv̄guy, piam.

Ka pvci abvn mu ramtuy, piam, kay, xepelekaymi ahay kanin?, pirkey gvr̄v, zv̄gurkelay kanin.

Feymew, bapelay weza kanin, pirkey gvr̄v, feymew wixarkey kintuafilu kanin, feymew wixawixatuyawi, piam, gvr̄v.

Feymew, cumpeymi am gvr̄v?, pigerkey gvr̄v. Wijvwijvpen, pirkey.

Ligaf naqpaci wvh mew ramtugerkey gvr̄v ñi xepele, xepelekan, pirkey. Feymew wvh zumzumkvlewelu mew ka ramtugerkey gvr̄v ñi xepelen, xepelekaymi gvr̄v?, pigerkey, zv̄guwvrkelay. Feymew naqkintupay, piam, kanin, fey mew petu bay, piam, gvr̄v, mankumankugey, piam. Feymu kvme wvhl̄u mew naqtugeparkey ilotuael, feymew wvne nentuñmagepay, piam, ñi ge tv̄feyci gvr̄v.

Epew Gvr̄v kiñe Pvxokiñ egu

Feymew kuzeyu ahay pvxokiñ, pigerkey pvxokiñ.

Ya, pirkey, cem kuzeayu, pirkey.

Kawej kuzeayu, pirkey gvr̄v, eȳmi pu amuaymi, iñce wente mapu amuan, pirkey gvr̄v.

Ya, pirkey pvxokiñ.

Tvyeci koyam mew puwayu, pirkey gvrv.

Ya, pirkey pvxokiñ.

Feymew tuwvltuwvltuygu, feymew xipayalu ñi lef gvrv, pvxokiñ pvnantukukvnufemvrkey kvlel gvrv mew. Feymew amuy, piam, ñi lef gvrv. Tiyeu pvle petu bewfv pepuy, piam, jaweñ. Tvfa mew pvci ijaweñkvnuci, pirkey gvrv, cew cey kvpalu weza pvxokiñ?, pirkey. Feymew ijaweñpurkey gvrv. Feymew, ka pvci abvn mew puwkvnuvaci ahay, pirkey gvrv. Feymew epe epe puwlu lef xipafempurkey pvxokiñ, feymew wewgerkey gvrv.

Eluen ñi rag, pirkey pvxokiñ.

Pilan, ilotukeliyu!, pigerkey pvxokiñ.

Feymew wixakonarkey pvxokiñ, pataka, epu pataka, kecu mari, kayu mari, akunkefemvrkey pvxokiñ. Feymew bompunmagerkey. Feymew bagvmtvkugerkey. Mogelen rulmey, piam, feymew mogeleci pvxokiñ vnaturkeeyew pu pvxa.

Feymew ko mew amuy, piam, vxvftvkupuy pu ko, feymew vnaturiekaeyew pvxokiñ, feymew ka amurkey lemu mew, feymew lemu bagvmgerkey.

Ka epew Gvrv egu Pvxokiñ

Pegerkey pvxokiñ, perkeeyew gvrv.

Kuzeayu ahay pvxokiñ, pirkey gvrv.

Ya, pirkey pvxokiñ, cem kuzeayu?, pirkey.

Kawej kuzeayu, pirkey gvrv.

Ya, pirkey pvxokiñ.

Eymi pu mapu amuaymi, iñce wente mapu amuan, pi, piam, gvrv.

Ya, pirkey pvxokiñ.

Tiyeci fvta koyam mew wixapuayu, pirkey gvrv.

Ya, pirkey pvxokiñ.

Fey ñi xipayanle lef lef gvrv, pvnantukulu kvnufemi, piam, kvlel ñi relmu pvxokiñ. Amuy, piam, gvrv, fentepun lefi, piam, tiyeu pvle mvte pey, piam, jaweñ. Puci ijaweñkvnuci ahay, pi, piam, gvrv. Femi, piam. Felepukey, cew ci kvpalu weza pvxokiñ?, pirkey, piam, gvrv.

Ijaweñkey, piam, gvrv, pvnakonkvley, piam, kvlen mu pvxokiñ. Puwkvnuvaci ahay, wewkvnuvaci weza pvxokiñ, pi, piam, gvrv. Leffuy, piam, fentepun lefi, piam, gvrv.

Tiyew pve pey, piam, jagjag, pvci ijagjagkvni ahay, pi, piam, gvrv. Feymu, piam, ijagjagi, puwpuwpuvkvnuvaci ahay, pi, piam. Amuy, piam, lef gvrv, epe xipawpulu.

Wiq!, pi, xipapuy pvxokiñ. Wiqkerkelewi ñi wvh leflu gvrv. Wewgey, piam, gvrv.

Weweyu ahay gvrv, pigey, piam, eluen ñi wew, pigey, piam, gvrv.

Pilan, bagvmketueliyu weza pvxokiñ, pi, piam, gvrv.

Feymew pvxokiñ, piam, xipay ñi wicakonayael. Akuy, piam, pvxokiñ, epuke pataka, kvlake pataka, melike pataka wej kayuke pataka. Bompunmagey, piam, gvrv, talqamniey, piam, gvrv, Mogelen rumelyey, piam, feymew pu pvxa, piam, vnaturgey ka. Feymew lefmawi, piam, amuci ko mew! Amuci ko mew!, pi, piam, puwi, piam, ko mew, vxvftvkupuy, piam, ko mew.

Bompuneyew, piam, pvxokiñ, epe vrfifuy, piam, gvrv, ko mew. Feymew weyeb xipay, piam, ko

mew, lemu mu amuci! Lemu mu amuci!, pi, piam, gvrv. Leffuy, piam, zoy pvxokiñ, piam, bompuñmaeyew, inaltu lemu puwlu bay, piam, gvrv, bagvmeyew pvxokiñ.

Epew kiñe Gvrv ka kiñe Tigre

Feymew majeyewvrkey tigre yegu kiñe gvrv. Feymew yafkurkeygu, nierkey lamgen gvrv. Feymew xiparkey bagvmvrkeafiel gvrv. Feymew xiparkey kiñe koyam mu, jawfeñ mu mvlerkey gvrv, kaxvjazumerkey. Feymew pepurkeyew tigre. Cumpeymi gvrv?, pigepurkey.

Kaxvjazupen, kom waycefvckealu mapu, pirkey. Feymew xarintvkualu iñce fey tvfaci koyam mew, fey tvfa waycefvckenoalu, pirkey gvrv. Feyvrke may, iñce xarintvkuyaquen kay, pirkey tigre. Feyvrke may, eyimi wvne xarikonaymi, pigerkey tigre. Feymew kvme mafvlweymi tvfaci koyam mew, pigerkey. Feymew mafvlvckurkey, wixakvnurkey. Feymew xarintvkugerkey, fentepun vfiñtvkugerkey. Feymu mvte vfiñtvkukieli, pirkey tigre.

Upan xarintvkuel kintugerkey farija mamvj, feymew wimakvteyegerkey. Femkieli maje gvrv, pigerkefuy gvrv. Cem mew kvpa bagvmkeen, weza tigre?, pigerkey tigre. Epe bagvmkvnugerkey, feymew xipaturkey fvta ka mapu gvrv.

Abvn mew kintugerkey tigre. Feymew perkeeyew gvrv ñi lamgen, feymew epe barkey. Feymew pepuel gvmayepurkeeyew ñi maje ñawe, naytugeputurkey. Feymew xipatulu tigre, kiñe ina bagvmaeyu eyimi, pigerkey gvrv ñi lamgen. Cem mew iñce bagvmaen fvta maje?, pirkey gvrv ñi lamgen. Kiñe ina kintuafiyu gvrv, pirkey. Feymew kintugerkey gvrv. Petu zeflu pepurkeeyew tigre. Cumpeymi gvrv? Tvfa me antv bayaymi faci antv, fente kuxankaquen mi wezañmagen, pigerkey gvrv, cumael zefpeymi?, pigepurkey. Cumael fey pien, maje, petu kom afalu iñciñ?, pirkey gvrv. Feymew: cem zvgu mvleam?, pirkey tigre. Kom afalu iñciñ maje, pigerkey tigre. Kom pvray wenu mapu ce, pirkey gvrv. Feymew pvra kintukey tigre. Cew pirkey. Tvye ta tvfey! Kvme pvra kintujege may!, pigerkey tigre. Feymew kvme pvra kinturkey, feymew gvrv lef xipaturkey. Abv maputulu wvla, feymew naqkintuturkey tigre, gelay cem no rume, pigerkey gvrv, feymew pegeweturkelay gvrv. Cumkvnuañ cew, weza gvrv, pirkey tigre. Ka peputurkefi gvrv ñi lamgen. Kiñe ina eyimi bagvmaeyu, pigeputurkey gvrv ñi lamgen. Iñce cem mew bagvmaen?, pirkey tvfici zomo gvrv. Kiñe ina joftuafiyu, pirkey. Feymew joftugerkey gvrv. Ka pegerkey, ka mapu pegerkey. Feymew: tiye ñi kvpan gvrv maje, pirkey tvfeyci zomo gvrv. Cem gvnen elelafiyu wezañma?, pirkey. Kiñe ina bawfallu eyimi, pigerkey tigre. Feymew bawfalurke, kvparkey gvrv. Feymew gvmagvmagerkey zomo gvrv. Cumpeymi ñaña?

Gvmagvmageymi?, pigepurkey tvfeyci zomo gvrv. Bay tayu maje yem, weza pofo, pigerkey tvfeyci wenxu gvrv. Feyvrke may, zewma barkey, yu fvtakece yem bayvm, meli rupaci fvcake perkukey, pirkey tvfeyci wenxu gvrv. Abv mapu wixakvnupurkey. Feymew tvfeyci zomo gvrv: perkvkage maje!, pirkey tigre. Feymew perkvurkey. Wo! Cew no rume perkvu ban, pin mvlelay, fente xemvn ajkvpalafñ, pirkey gvrv. Feymew lefkvlen xipaturkey.

Feymew: eyimi kiñe ina bagvmaeyu, pigerkey zomo gvrv. Bagvmkieli maje, pirkey, kimnieñmañ ñi pvtokokemum, feymew joftuafimi, pigerkey tigre. Feymew, ya!, pirkey. Pegelkvnulelgerkey tvfeyci ko. Feymew joftugerkey gvrv. Feymew rafi antv konpurkey ñi ko mew. Kagentupurkey, feymew abv mapu wixakvnupurkey. Feymew: zvgukey tañi ko ñi kvpa

pvtokogeyvm, pirkey gvrv. Feymew: pvtokopayaeyu am ko!?, pirkey gvrv. Meli rupaci fey pifiyvm ñi ko, pvtokopakaen!, pikeenew ñi ko. Feymew feypirkey: pvtokopaeyu am ko!? Pvtokopaeyu am ko!?, zvgulay ñi ko. Kvpa pvtokogeperkeafuy?, pirkey gvrv, pvtokopaeyu am ko!? Feymew: pvtokopakaen, pirkey tvfeyci ko. Wo! Cew no rume zvgun ko, pin mvlelay!, pirkey gvrv, lef xipaturkey. Feymew xipaturkey tigre.

Ka pegeputurkey zomo gvrv. Kiñe ina bagvmaeyu, nvlañiñ tami lamgen, pigerkey tvfeyci zomo gvrv. Cem mew bagvmaen iñce maje?, pirkey. Kiñe ina wixalafimi kajku xewa. Kimnieñiñ cew ñi ñogvmkawejukemum, pirkey tvfici zomo gvrv. Feymew wixalgerkey meli kajku xewa ñi bagvmaetew. Feymew pepurkeeyew kizu tigre. Marimari gvrv, pigepurkey. Feymew kvme elurkey gvrv. Feymew lefkvlen xiparkey, feymew kvla kajku xewa mew rumerkey, kiñe kajku xewa fey nvrkeeyew. Feymew bagvmgerkey.

Epew Gvrv yegu Wilki

Kuzeyu ahay wilki, pirkey gvrv. Ya, pirkey wilki. Cem kuzeayu pirkey wilki. Iñce feypian, kom kimaymi, pirkey gvrv. Ya, pirkey. Feymew feypirkey gvrv:

–Kvnuley rvpv mew.

–Xefkvrupay rvpv mew.

–Wenu wilxoley.

–Wenu tugkvrkeley.

–Wenu kelvley.

–Katakamvjejen.

–Katakamapun.

–Nvfkvstumapun.

–Tvmplvtmvpvlxekan gey.

–Wvzkvwvzkvxekan gey.

–Xililxililxekan gey.

–Anvley pu lawal.

–Anvley kurv muxug, pirkey gvrv.

Fey kimgé, pigerkey wilki.

–Pifimi: filu.

–Pifimi ta pakarwa.

–Pifimi ta kowvj.

–Pifimi ta mansana.

–Pifimi ta intaz.

–Pifimi ta kalal.

–Pifimi: zewv.

–Pifimi ta sañwe.

–Pifimi ta kawēju.

–Pifimi ta ufisa.

–Pifimi ta waka.

–Pifimi ta cagze.

–Pifimi ta ce.

Epew kiñe pvci alka

Feymew mvlerkey ragiñ pvci alka. Werkvgerkey, elmealu pvlata fvca ka mapu kiñe vbmen mew. Feymew meñkukvnulelgerkey. Wixaniegerkey, wimanakvmkvnumekegerkey. Feymew kakaramekerkey, feymew meñkukvnulelelyerkey tvfici pvlata.

Amulu tiyew pvle perkefi gvr. Marimari, piwvrkeygu. Cew konalu eyimí?, pigerkey ragin pvci alka. Amualu iñce kiñe vbmen mew, werkvgen, pirkey. Amufuliyu iñciw kompañ, pirkey gvr.

Pilan, mvte koybageymi, pirkey pvci alka. Koybatuwelan, yeen mvten, pirkey gvr.

Feymew amurkeygu. Tiyew pvle kansapurkey (vrkvpurkey) gvr. Kansan, pirkey Feymew kvrpun tukugerpukey.

Ka tiyew pvle perkefi xapial. Marimari, piwvrkeygu. Cew konalu eyimí?, pigerkey pvci alka.

Amualu iñce kiñe vbmen mew, pirkey. Amuyu, kompañuwfiyu, pirkey xapial. Pilan, tiyew pvle pelmi awka, meketuafuymi wigkvn, pigerkey xapial. Wigkvlayan, ragi awka rumerumeliyu, wigkvrpulayan, pirkey xapial. Feymew: ya, pirkey pvci alka. Feymew amurkeygu. Tiyew pvle, kansan kompañ, pirkey xapial. Feymew pujkvma tukugerpurkey. Feymew amurkey.

Ka tiyew pvle perkefi tigre. Marimari kompañ, piwvrkeygu. Cew konalu eyimí, pigerkey pvci alka. Amualu iñce kiñe vbmen mew, elmealu pvlata iñce, pirkey ragin pvci alka. Amuyu kompañ, pirkey tigre. Pilan, tiyew pvle pelmi ce bagvmafuyimí, pigerkey tigre. Femlayan, pirkey tigre. Feymew yegerpukey. Amurkeygu. Zoy tiyew pvle, kansan, pirkey tigre. Feymew pujkvma tukugerpurkey. Feymew amulvrkey ragin pvci alka.

Ka tiyew pvle perpurkey cvpey toro. Marimari kompañ, piwvrkeygu. Cew konalu eyimí?, pigerkey ragin pvci alka. Amualu iñce kiñe vbmen mew, pirkey. Amuyu pvci kompañ, pigerkey ragin pvci alka. Pilan, pirkey, tiyew pvle pelmi ce, toro, mekeafuymi nalvn, pigerkey cvpey toro. Femlayan, amuyu mvten, pirkey, feymew kompañuwvrkeygu. Tiyew pvle kansan pipurkey tvfici cvpey toro. Feymew pujkvmayegerpurkey.

Feymew rvpvtulerpukarkey tvfeyci ragin pvci alka. Feymew puwvrkey ñi werkvgemum.

Puwvlvrkey pvlata. Feymew fentepun ayvgerkey. Wixantukukvnugerkey kiñe rukaleci kacija mew. Feymew wvh pvle pegemelu, ixokom apvmvrkey kacija. Cumgeci alka vrke cey?

Werkvlenew ñi wehvy?, pirkey tvfeyci vbmen, jazkvтуgey, piam, tvfici pvci alka. Feymew: kiñe ina tukuyafiñ ufisa mew, pigerkey tvfici pvci alka. Tukugerkey ufisa mew. Ka abvn mew pegemelu kom apvmgerkey ufisa. Cumgey cey alka vrke ci!, pigerkey. Ka tukulgerkey awka mew. Abvn mew ka pegemerkey, kom apvmvrkey ka tvfici awka. Cumkvnurkeafiñ cey weza alka, kiñe ina bagvmafiñ, pirkey vbmew. Fey bagvmvrkey.

Epew kiñe pvci vñvm cijciwen pigey

Feymew umañvrkey lelfvn mew tvfeyci pvci vñvm, umañlu lagvmvrkeeyew xagliñ. Feymew pvleytugerkey (ijkuñpegerkey) xagliñ. Cumael bagvmfimi Cijciwen, pigerkey. Cumfemlayafun,

juwvmkeetew antv iñce?, pirkey. Cumael juwvmkefimi xagliñ, antv?, pigerkey antv. Cumael takuñmakeetew xomv iñce?, pirkey antv.

Feymew: cumael takuñmakefimi antv, xomv?, pigerkey xomv. Cum femlayafun, kvrvf ñi miawvletew?, pirkey xomv. Cumael miawvlkefimi xomv, kvrvf?, pigerkey kvrvf. Cum femlayafun, kaxvtukeetew wigka pele ruka?, pirkey kvrvf. Cumael kaxvtukefimi kvrvf, wigka pele ruka?, pigerkey pele ruka. Cum femlayafun, katakakeetew zewv?, pirkey. Cumael katakakefimi pele ruka?, pigerkey zewv. Cum femlayafun, ñarki ñi ilokeetew?, pirkey zewv. Cumael ilokefimi zewv?, pigerkey ñayki. Cum femlayafun, walokakeetew xewa?, pirkey ñarki. Cumael walokakefimi ñayki, xewa?, pigerkey xewa. Cum femlayafun, mvxogkeetew mamvj?, pirkey xewa. Cumael mvxogkefimi xewa, mamvj?, pigerkey mamvj. Cum femlayafun, kvxal ñi apvmkeetew?, pirkey mamvj. Cumael apvmkefimi mamvj, kvxal?, pigerkey kvxal. Cum femlayafun, ko ñi cogvmkeetew?, pirkey kvxal. Cumael cogvmkefimi kvxal, ko?, pigerkey ko. Cum femlayafun, kujin ñi pvtokokeetew?, pirkey ko. Cumael pvtokokefimi ko, kujin?, pigerkey kujin. Cum femlayafun, kuciju ñi bagvmkeetew?, pirkey kujin. Cumael bagvmkefimi kujin?, pigerkey kuciju. Cum femlayafun, rvxafe ñi elkeetew?, pirkey kuciju. Cumael elkefimi kuciju, rvxafe?, pigerkey rvxafe. Cum femlayafun, gvnecen ñi eletew?, pirkey rvxafe.

Epew kiñe Gvr, Xapial ka kiñe Kofvr

Yemege awka!, pigerkey gvr. Tvfa mew gvyontukupayaymi, pigerkey gvr. Kofvr, iñce jasuan, pi, piam. Xapial, iñce joftuan, pi, piam. Feymew yemey, piam, awka gvr, gvyontukupay, piam. Feymew kofvr jasuy, piam, zoy moxilu. Mey, piam, rvnkvntukukvnufemtuy, piam, ñi lolo mew. Feymew xapial nvlay, piam, lef xipatuy, piam, tvfeyci awka, xipay, piam, xapial. Kofvr xananiey, piam, kiñe awka, feymew wixanentupay, piam, ñi kucijo (winu) xapial. Feymew lagvmpuy, piam, tvfici awka. Feymew xipapatuy, piam, kofvr, iloawkaygvn, piam. Iñce kiñe kazi iawkatuan, pi, piam, gvr. Iñce ñi nentuyael, pi, piam, kofvr. Kiñe cag nentuan, pi, piam, gvr. Iñce ñi wewye!, pi, piam, xapial. Wezami, piam, ñi awka yegvn. Feymew elugey, piam, kvlce gvr. Feymew xanantukuy, piam, kvxal mew, afvmi, piam, iy, piam, ñi kvlce awka gvr. Petu ilu, piam, ñi kvlce awka: mvna fvrey, eluetew weza fvta logko!, pi, piam, gvr. Ka pvci abvn mew werkvgey, piam, gvr yetualu ilo, kutamakvnulelniey, piam. Feymew amutuy, piam, gvr.

Pvci tiyew pvle mvten naqkenpuy, piam, ñi kutama, ilotupuy, piam. Re foro ilo yetuy, piam. Epe puwtulu: kvxaltumvn pu pvñeñ! Kvxaltumvn pu pvñeñ!, pi, piam, gvr tufeyci pvcike xapial. Kvxaltuy, piam, anvntukuy caja yegvn, piam. Feymew tvfeyci kuze xapial kvxankvley, piam. Pu pvñeñ, konkintupamvn caja mew!, pi, piam, gvr. Feymew tvfeyci pvcike xapial konkintupuy, piam, vxvftukufempuy, piam, pu caja mew. Feymew kiñe pvci xapial lef xipay, piam, pvr, piam, kiñe koyam mew. Gvmay, piam, tvfeyci pvci xapial, gvr xipatuy, piam. Pvci abvn mew puwtuy, piam, fvta xapial ramtupuy, piam: cem mu anta gvmagvmageymi?, piputuy, piam, ñi yaj. Bagvmvñmaenew pvcike peñi, ñi lamgen weza gvr!, pi, piam, tvfeyci pvci xapial. Cew pvle xipay weza gvr?, pi, piam, fvta xapial. Tvfe pvle!, pi, piam, pvci xapial. Amuy, piam, tvfeyci fvta xapial.

Tvyew pvle pepufi, piam, pvyu (pvzv). Pelelaen gvrv tvfa mew, pvyu!?, pigey, piam, pvyu. Fewla rupay tvfa mew!, pi, piam, pvyu. Rumey, piam, xapial.

Zoy tvyew pvle pepufi, piam, kanin kiñe koyam mu mvlelu. Pelelaen gvrv tvfa mu, kanin!?, pigey, piam, kanin. Tvfa mew fewla rupay!, pi, piam, kanin. Rumey, piam, xapial.

Ka zoy tvyew pvle pepufi, piam, rawvjma. Pelelaen gvrv tvfa mu, rawvjma!?, pifi, piam, tvfeyci rawvjma. Kayal! Kayal!, pi, piam, rawvjma. Aa! Weza rawvjma wej wvh!, pi, piam, xapial. Rumey, piam, xapial.

Ka zoy tvyew pvle pepufi, piam, ñamko. Pelelaen gvrv tvfa mu, ñamko!?, Tvfa mew fewla rupay!, pi, piam, ñamko. Rumey, piam, xapial. Tvyew pvle pepufi zagi. Pelelaen gvrv tvfa mu, zagi!?. Tvfa mew mvlepay, werkefiñ, tvfi mu amualu, pi, piam, zagi. Bawfaluaymi!, pigey, piam, xapial. Vladeay (nvlaleay) mi wvh!, pigey, piam, xapial. Ya!, pi, piam, xapial. Femkvnuuy, piam, xapial. Feymew: puruñmaeyu, piam, pi, piam, tvfeyci zagi. Vladelelu wvh perkvntukukvnuagey, piam. Feymew bay, piam, xapial. Gvrv!, piam, joftuley gvrv?, pigey, piam, gvrv. Kvpay, piam, akuy, piam, wixanentupay, piam, ñi kuciju, cvgarkvtiyefi, piam, xapial. Feymew bay, piam, xapial.

Epew Kayta Poxo yegu Mula

Kompañ ka ahay, kvpay, piam, ce. Amuayu ponwi mapu yeyan ñi pu kure, pirkey kayta poxo. Cem piyawimi cey? Weza fvca peb. Fij piyawkeymi tami wezañmagen ahay!, pi, piam, mula. Wezañma mula! Inantukugelmi wvla may ta kimaymi, weza mula, pirkey kayta poxo. Feymew xiparkey kayta poxo, konvrkey ponwi mapu. Mula mvlekarkey ñi mapu mew. Pepurkeyu ce bagvmgepurkey. Bagvmvrpuel, rumerkey tvfici ce (feymew zigeputy, piam, kayta poxo, nvñmageputy, piam, ñi pu kure). Zoy konejin (konayin?), zoy konejin! Pwkeyeleafuyin ga, wezakeñma, miawtusenyegvn, wezakeñma, wira wira mankvymvn may. Iñce, iñce konkatuwan lolo mapu, eymvn nvn mvten may ci, pi, piam, kayta poxo. Nentuy, piam, kiñe ñi fotvm, ruku mu, piam, yey. Kiñe xipantu ñamvni, piam, ñi pu kure. Feyci inantukupuel epu mvten nvñmageputy ñi kure kayta poxo. Petuy, piam, ñi kure kiñe gvyon mew. Miawvli, piam, ñi fotvm. Fvca wenxuy, piam, ñi fotvm miawvlel, peputuy ñi pu kure. Peputulu awkantulputuy, piam, ñi pu kure. Femi, piam, kayta poxo.

Epew kofke

Feymew tvgkvkvley, piam, kofke. Tvyew pvle peeyew, piam, kiñe gvrv. Marimari, kofke!, pi, piam, gvrv. Marimari, pi, piam, kofke. Mvna kvme hvmvn nieymi kofke, pi, piam, gvrv. Hvmvnhvmvntufeliyu, kofke!, pifi, piam, kofke gvrv. Pilan, vnanentueli rume, pi, piam, kofke. Vnanentulayaeyu ahay, re hvmvnhvmvtuaeyu ahay, kofke, pi, piam, gvrv. Ya, pi, piam, kofke. Hvmvhvmvtugey, piam, hvmvhvmvtupeel vnanentufemi, piam, gvrv. Lef xipay, piam. Kvlpvrkvlpvr femi, piam, kofke. Wvne leftuy, piam, gvrv. Ka pefi, piam, kofke. Marimari kofke, pifi, piam, kofke gvrv. Marimari, pi, piam, kofke. Mvna kvme hvmvn nieymi, ahay kofke, pifi, piam, kofke gvrv. Hvmvnhvmvntuafeyu ahay?. Pilan! Tvyew mu fey pigen, vnanentugen, feymu

kvlpervlewen tvfa, pi, piam, kofke. Fey tvyew mew mvte koybagey ta tvfey weza gvr, pigey, piam, kofke. Feymew lefkontugey, piam, kofke, iniey kom.

Epew Oro Alka

Werkegey, piam, tapayu mew oro alka, awkatulayafimi tapayu, pigey, piam, oro alka. Feymew amuy, piam, puwi, piam, tapayu mew, awkatupuy, piam, oro alka. Feymew alka acawajgetuy, piam, ragi lelfvn pegey, piam. Eymi no am ga ci foro alka?, pigey, piam. lñce je may ahay, pi, piam. Mvnaleci gvlameyu, awkantulayafimi tapayu, pieyu ga ahay oro alka, pigey, piam, oro alka. Awkantultufimi anta tapayu, ahay oro alka?, pigey, piam, oro alka. Epe kintufun ahay!, pi, piam, oro alka. Kaji femi awkaci, kimkatuan ta tvfa, pi, piam, oro alka. Feymew femkvnugey, piam.

Abvn mew kiñe koyam mu wenuley, piam. Feymew pepueyew kiñe gvr, pvrakintulewepuy, piam, gvr. Marimari alka!, pipuy, piam, gvr. Kvnapege ahay alka, pvci awkantuyu ahay!, pi, piam, gvr. Pilan ahay, bagvmeli rume ahay!, pi, piam, oro alka. Bagvm layu ahay, mvte kvme wenxugetun ahay. Kuyfi may ta wigkvfegekefun, pi, piam, gvr. Pilan, pi, piam, oro alka. Xewa je mu kayñeyewlaymu may ga?, pigey, piam, gvr. Oo! Kuyfi kayñeyewfuyu, fanten mew kvme wehvyewtuyu, pi, piam, gvr. Abvn mew wixapvray, piam, gvr, pefi, piam, xewa. Tvfe y tami kvpan tami wehvy ahay gvr!, pigey, piam, gvr. Kvpay, piam, tvfeyci xewa ina pvnon *ñi yegey*, piam, gvr. Feymew wirafkvlen xipay, piam, gvr. Akuy, piam, tvfeyci xewa. Tvfe y ñi amuan gvr ahay xewa, pigey, piam, xewa. Feymew inaltu lemu nvgepuy, piam, gvr. Bagvpuy, piam, gvr.

Oro alka kecu kvyen cey kayu kvyen cey cegetuy, piam, oro alka.

Epew Tigre egu Gvr

Feymew ñamgerkey ñi leqkay gvr. Feymew weñagvrkey. Cumpeayu ilotu iael?, pirkey gvr. Kiñe ina bawfaluwaymi eyi maje, pirkey gvr. lñce wicxayafiñ kom kujin, pirkey gvr. Ya, pirkey tigre. Feymew xiparkey gvr, wixayafilu buan, coyke, xuli, yuem, kumxi, kofv, ixokom kujin wixarkefi kvpalvrkefi bawfaluwkvleci tigre mew. Kvme elayiñ vbmen em!, pirkey gvr. Feymew pvci mapu lewelu akulu xuli: oo! Weza wixan ahay kompañ! Cum anta koybatupetuyafuyi kompañ gvr?, pirkey xuli. Fuo! Cem pikeymi cey ahay kompañ?, pirkey gvr. Feymew wvñorkey xuli. Kakelu kvpakarkey. Feymew akurkey ba tigre mew ixokom kujin. Awvñmageparkey tigre, wajpayawvrkey tvfeyci kom kujin. Feymew eja lelikvnumekerkey tigre zujipelu zoy moxixe buan. Rvgkvxipafemvrkey, nvpurkey kiñe fvxa buan. Feymu bagvmvrkey tigre. Gvr kay jasurkey tvfeyci xuli. Lef xiparkey tvfeyci xuli. Wvnexvnierkey. Ay! Ahay kompañ! Mvte newentukeeli ahay!, pirkey gvr. Feymew kaxvrkey ñi jasu gvr. Wvñomerkey, akuturkey tigre mew. Cumley gvr nvymi?, pigerkey gvr. Aa! Nvfiñ ahay maje, kaxvn ñi weza jasu ahay maje!, pirkey gvr. Matukelpa ahay! Wezankvnupaen ahay!, pigerkey. Feymew kvparkey, wixanentuparkey ñi kuciju, rowparkey gvr. lñce iyawketuan logko buan!, pirkey gvr. Femi. lñce mvjotuygu iael, pirkey tigre. Cem anta iyawketurkean kay maje?, pirkey gvr.

Kvlce luan ahay iyawketuñmuaymi, pigerkey gvr. Ya, pigerkey gvr. Feymu elugerkey kvlce luan, feymu ivrkey. Mvna furey ñi eluetew weza fvxa maje, pigerkey gvr. Feymu ivrkey. Abvn mew wetkvgerkey, yeltufe ilo pvcike tigre, pigerkey gvr. Feymew kutamakvnulelnierkey, amurkey gvr. Tvyew pvle ñamkonpurkey kiñe pvcı mawiza mew gvr, feymew ilotupurkey. Kom apvmkvnumerkey ñi ilo. Wvñometurkey. Akuturkey tigre mew. Wvñomewyeymi cey ka gvr?, pigerkey gvr. Wvmewyen ahay maje! Epeke gvñen barkefuygvn weza pvcike tigre, pipaturkey gvr. Tvfeyci zoy pvcı ilo gvñeil, zoy abvkvnu y ta ilo, pigerkey gvr. Feyvrke may!, pigerkey tigre. Zewmayalkvnupan kay gvr, pigerkey gvr. Feymew kejurkey zewmayal abvn mew gvr, kom afvmmmerkey ñi iael. Feymew xiparkey gvr, wekun mawiza. Wvñolefmerkey gvr. Fuo! Kvpay malon ahay maje! Tvfa ñi akun malon ahay maje!, pigerkey gvr. Feymew matukalewerkey tigre. Amuyyu ahay maje!, pigerkey gvr, rugarkey ñi lef. Maje! Makazen ahay!, pigerkey tigre. Pvrpage maje, pigerkey gvr. Mvñal pvraya el ziñvm rumekeyturkey pu pvxa tigre. Feymew abv konlu lemu mew, wvñokvnufemmeturkey gvr. Kvpaturkey tfeyci ilo elkvnpuel tigre, kom iparkey gvr tfeyci ilo. Feymew xipaturkey fvxa ka mapu.

Elpvnonkey, piam, gvr. Pu cagkin bewfv konmekey, piam, gvr. Pu xafvya amuy, piam, tigre ilo mew. Pepulay, piam. Xewa weza gvr! Kiña ina bayay weza gvr!, pi, piam, tigre. Kintugey, piam, gvr, hvmvtugey, piam, gvr. Pu kvje kacu umaqkvlelu pepueyew tigre. Fendepun umaqkvley, piam, gvr. Pegepuy kiñe pvcı yuge mamvj mew, sipokvnukazigey (sicokvnukazigey), piam. Ay! Kvmenielaelnew weza kvpvbv (pvpbv)!, pi, piam, gvr. Ka umaqtuy, piam. Ka femkvnukey, piam. Aa! Weza kvpvbv! Pepi umaqtulelaenew weza kvpvbv!, pi, piam, gvr. Feymew: Nvkvnuakici weza gvr, lefxipale rume, pi, piam, tigre. Feymew nvgey, piam, gvr. Ay! Ahay maje! Ay! Ahay maje!, pi, piam, gvr. Vnatugey, piam. Bagvmkatuan am ahay?, pige y, piam, gvr. Kiñe zvgu ahay maje? Mogeci ahay maje!, pi, piam, gvr. Cem zvgu koyba weza gvr?, pige y, piam. Pvcı leykvmen may, feymew nvxamkayaeyu, pi, piam, gvr. Ya, pi, piam, tigre. Feymew leykvngey, piam, gvr. Cem zvgu?, pige y, piam. Maje, yafkan may ahay maje! Kiñe zvgu ahay maje, mogce ahay! Nvlelaeyu epu kujin, kiñe xuli, ka kiñe coyke abv moxilu, pi, piam, gvr. Ya, pi, piam, tigre. Kiñe ina markayaeyu (cijkayaeyu), pige y, piam. Markagey, piam. Cumvl nvlelaen?, pige y, piam, gvr. Epuwe ko mew xawayu, pi, piam gvr. Ya, pi, piam, tigre. Feymew ka markagey, piam. Feymew femkvnukey, piam, gvr.

Feymew xipay, piam, wixa kajku xewa abv gvr. Yemey, piam, epu kajku xewa. Feymew pvtokokemum xuli egu coyke joftuy, piam, tfeyci xewa. Ragi antv konpuy, piam, pvtokoyalu xuli egu coyke. Epe puwlu ko mew, piam: Fuo! Kompañ! Weza wixan ahay kompañ!, pi, piam, xuli. Cumtuyafuyu ahay kompañ?, pifigu, piam. Zoy pvcı mapu puwlu: Weza wixan ka ahay!, pi, piam coyke. Pvcı pvtokoayu ahay!, pigu, piam. Feymew pvcike pvtokoygu, piam. Cucikvnuayu cey ahay? Lelfvntuafuyu cey ahay?, pifuygu. Pu mawiza konkayu ahay!, pi, piam, coyke. Feymew amuygu, piam, mawiza mew. Tvyew pvle kaminantukaminantufempuy (xekaxekatufempuy), piam, xuli. Feymew wirafi, piam, coyke. Weluwelutuweluwelutufemi, piam, coyke. Fuo! Ejalkayafuyu kompañ coyke!, pi, piam, xuli. Eymi mvten ahay xuli, mvte pvcı lef nieymi ahay xuli, pi, piam, coyke. Fuo! Cumafun te ahay!, pi, piam, xuli. Eymi may epu namun nieymi mvten ahay, iñce meli namun nien ahay, pi, piam, xuli. Feymew konpuygu,

piam, kiñe pvci mawiza mew. Feymew epe xipawpulu tvfeysi pvci lemu mu ayepuy, piam, coyke. Epe xipawpulu kaxv lefkontufemeyew, piam, tvfeysi epu kajku xewa. Lef xipaygu, piam. Abvñma inageygu, piam. Epeke zigekeygu, piam. Waycvf mew xipakeygu, piam, coyke yegu xuli. Vxvftukupuy, piam, kiñe lil mew, ragi ko, piam, vxvfkonpuygu, piam. Feymew epuñ pvle kaxvtugeygu, piam. Coyke xipay, piam. Xuli nvgey, piam. Feymew yelgey, piam, tigre. Maje, pipuy, piam, gvr. Kiñe nvn mvten may, maje!, pipuy, piam, gvr. Feyvrke may!, pi, piam, tigre. Kiñe ina bayaymi wezañma gvr!, pigey, piam, gvr. Mv ahay maje! Ka nvlkayaeyu ahay maje!, pi, piam, gvr. Ka wixanien epu kajku xewa nvlelaetew coyke, piam, gvr. Epuwe kom mew xawayu, pi, piam, gvr. Ya, pi, piam tigre. Feymew leykvngey, piam, gvr. Foxv weza tigre! Kiñe ina bagvmafiñ weza tigre. Gvnenkafili bayay tigre. Mvna wapogelay tigre?, pi, piam, gvr. Gvnen, piam, eli gvr. Kom rayenkacutuy, piam, gvr. Feymew pvnantukukvnuyey, piam, ñi xvlke mew. Epuwentun mew kvpay, piam, tigre. Abv mapu pegey, piam, gvr. Cuci wexu cey ta tvye, mvna kvmelkaley?, pi, piam tigre. Puwi, piam. Marimari maje!, pipuy, piam, gvr. Eymi anci gvr?, pigey, piam, gvr. Mvna kvmelkaleturkeymi wesakelu ahay!, pigey, piam, gvr. Akulay may ñi epu wixa ahay maje?, pi, piam, gvr. Ka kiñe zvgu ahay maje, kiñe kujin zuamfulmi ahay maje. Abv faligey, epu mari peso ñi gijael, pi, piam, gvr. Fey zuamfulmi eluafeyu ahay, pi, piam, gvr. Cem kujin?, pi, piam, tigre. Famgelu ahay maje, pi, piam, gvr. Feymew mentavbmenmiawimi (vytuvbmenmiawimi) ahay, pi, piam, gvr. Xawawtukulelafeyu famgeci rayen kacu, pi, piam, gvr. Cumkvnuymi kay tukulelnieymi?, pigey, piam, gvr. Xarikvnugen, feymew xawawtukulelgen, pi, piam, gvr. Tukulmi kay famgelu zoy vbmen miawimi. Iñce ka antv miawvn tvfa ahay maje, pi, piam, gvr. Tukuleluwaliyu famgelu, feymew lifgeyan, pi, piam, gvr. Ya, pi, piam, tigre. Fendepun kvme xarigey, piam. Feymew pvnantukukvnulelgey, piam, logko mew kiñe rayen. Epu kura, piam, nvniey gvr. Feymew vxvftunakvmniey, piam, fvxa kura mu. Weza tigre! Faci antv bayaymi, wezañma kazel wapogeymi, weza tigre, pi, piam, gvr. Wvlelfi, piam, kura mu. Rvgkvxipafuy, piam, tigre yem. Feymew bagvmi, piam, tigre. Feymew nentuñmagey, piam, xvlke tigre. Jasuy, piam, xvlke tigre gvr. Kiñe ina pvraturan wenu mapu, pi, piam, gvr. Caw gvneceñ! Pvrapatuen caw gvneceñ!, pi, piam, gvr. Vxvfpvrami, piam, ñi jasu, gijaturkey, piam. Feymew gvneceñ nvñmapaeyew, piam, ñi jasu. Feymew pvrami, piam. Ragin puwlu kaxkvnulelyetuy, piam, ñi jasu. Naqpatuy, piam, gvr. Feymew batuy.

Epew

Epew kiñe ba kureyewvrkey mogen zomo egu

Feymew barkey kiñe wenxu, vñamgerkey. Feymew ñi vñam ajkvkeeyew ñi ban.

Balu rvgalgerkey, bagvmtukulelgerkey ñi kawēju ixokom, ixokom ñi niel tukulelgerkey, ñi cija, ñi sipuela, ñi kuciju, xvpuwe, ñi fvnrvgi tukulelgerkey. Feymew yaf mari antv balu amurkey ñi vñamyeekeelci zomo mew. Feymew puwvrkey pu xafvya ñi vñam mew. Puwlu, feymew: bay, pigekeymi, pigerkey. Koyba zvgu no amfe?, pirkey, fente koybayam ce, pirkey. Feyme kuzurkey kiñe pvci kampu egu, kuzulu mafvlaetew tvfici pvci kampu. Femkeeli kompañ, pirkey, mvte kuxankvley ñi kazi, pirkey. Feymu femkvnugerkey. Abv puh kom umawtulu ce, feymew puwvrkey ñi vñam mew. Kvpan, pirkey, fvca kuyfi zvgyegeyu. Kiñe ina kureyewayu, pirkey, tvfaci puh amuayu, pirkey. Feyvrke may, pirkey tvfici zomo. Kom elelgey mi cija, cumgeci nentuaymi kay?, pigerkey. Iñce kizu kimniean ñi nentutuael, pirkey tvfici wenxu. Feyvrke may, cijawtuge, amuayul, pirkey tvfeyci zomo. Feymew cijawturkey, kiñe kimlaeyew rume tvfeyci pu ce. Feymew rupan cijawtun, pipaturkey tvfeyci zomo mew. Feymew amurkeygu.

Pvci tyew pvle wirafpurkey, feymew vlkaturkey: kajfvkajfvy mapu tayu rumeam, pirkey.

Feymew kagenturkefuy tvfeyci zomo. Cem mew vlkatuyekvpaymi am?, pigerkey tvfeyci ba wenxu. Kuyfike ce femkefuy tañi yenieyvm zomo kuregeyvm, pirkey tvfici wenxu. Feymew cew ñi rvgalgemum fey mew puwvrkey. Feymew poforkey (weluzuamkey) tvfeyci zomo.

Feymew epuwentun mew, amuan, pirkey tvfeyci geh ñawe. Feymew amurkey, puwvrkey tvfeyci geh fotvm mew. Kvpan, cumlepun ñi ñawe, tukulgen ruka mew, piḡurkey. Feymew: cem fotvm nien?, pirkey tvfeyci fvca wenxu. Nierkelaymi am?, pigerkey. Feymew: kuyfi yaf mari antv mew bay ñi fotvm em!, pirkey tvfeyci wenxu. Feymew amurkeygvn eltun mew.

Feymew pegepurkey tvfeyci zomo pvrakawejulelu tvfeyci ba kawēju mew. Feymew gvmagvmagerkey. Feymew yegemeturkey, akulgeturkey ñi mapu mew. Feymew marici wimlay, piam, pu ruka niegefuy, piam, marici mvlelay, piam. Feymew: kiñe ina gijayafiñ tvfeyci zomo, pirkey. Feymew gijagey, piam, tvfeyci zomo. Feymew bagvmtukugey, piam, tvfeyci ba wenxu mew.

Epew Laxapay fvta

Feymew niey, piam, epu ñawe laxapay fvta. Kvzawelgean!, pi, piam. Wvlan ñi epu ñawe, pi, piam. Feymew epu cokvm niey, piam. Kvzawelaenew ñi epu cokvm, feymew kureyeñmayaenew ñi epu ñawe, pirkey laxapay fvta. Feymew amurkey tvfeyci peñiwen, kiñe, piam, Kogkvl pigey, kagelu Pvziw pigey, piam. Feymew puwigu, piam. Re akucagey ñi anvpuam egu. Feymew: Kvzawelmuan epu focvm, eluayiñ ñawe, pigeygu, piam, tvfeyci epu wenxu. Feymew: ya, pigu, piam. Cem kvzawayu?, pigu, piam. Kaxvlmoan ñi xemyen aliwen, pi, piam, laxapay fvta. Feymew elukvnuyegeygu epu wezake. Feymew: kiñeke rvpun mew xantulmoan ñi aliwen, pigeygu, piam. Feymew amuygu, piam, pegelgepuygu tvfeyci fvcake

aliwen. Feymew xantulpualu egu kiñe rvpu fempuygu, piam, feymew waxofemi, piam, tvfeyci toki ñi elugen egu. Feymew: waxoy yu toki, pipatuygu, piam. Kiñe ina kizu yu toki mew kvzawayu, pigu, piam. Feymew: feyvrike may, pi, piam, laxapay fvta. Feymew kiñe fvxa koyam mew puwigu, piam. Feymew: tvfa mew mvxvmayu toki, pigu, piam, tvfeyci epu wenxu. Feymew pvrakintukvnuyggu, piam. Naqpawkejege may pijan toki! Naqpawkejege may pijan toki!, pigu, piam. Fvrenemuyu gvneceen, nakvmelmupayu epu toki, re kiñeke rvpu mvten xamtulu, pigu, piam. Feymew fvxa wenu xalewpi piam, tvfeyci pijan toki. Naqpawkejege may pijan toki! Naqpawkejege may pijan toki! Feymew abvn ragin wenu xalewpi pay, piam, pijan toki. Fvrenemuyu gvneceen, nakvmelmupayu toki!, pigu, piam, feyci epu wenxu.

Ka mvxvmigu, piam: Naqpawkejege may pijan toki! Naqpawkejege may pijan toki!, pigu, piam. Feymew pvci mapu xalewpay, piam, pijan toki. Fvrenemuyu gvneceen, nakvmelmupayu toki!, pigu, piam. Naqpawkejege may pijan toki! Naqpawkejege may pijan toki!, pigu, piam. Feymew naqpay, piam, pijan toki, xalewfempay, piam, tvfeyci koyam mew. Feymew naqpay, piam, mapu mew. Feymew kake nvfemiyu, piam, tvfeyci epu toki Pvziw egu Kogkvl. Feymew amuygu, piam, kaxvaliwenalu egu. Feymew puwigu, piam, kaxvpuy, piam, aliwen egu. Kiñeke rvpukvnufempuygu, piam, xanfemi, piam, aliwen. Feymew ixokom aliwen xantuygu, piam, re kiñeke rvpukvnuyggu, piam, kiñeke aliwen. Feymew kom zewmaygu, piam. Feymew kureyeygu, piam, tvfeyci epu wenxu. Zew kureyeñmamon tañi ñawe nvfalmoan ñi xemyen lofo toro, pi, piam, laxapay fvta. Ya, pigu, piam, tvfeyci epu wenxu. Feymew yegeygu, piam, tvfeyci lofo toro mew. Puwvlgeygu, piam. Feymew nvfaluypuygu, piam. Kom bagvmpuy tvfeyci lofo toro yegu, piam. Feymew kvpatuygu, piam, ñi ruka mew.

Ka abvn mew, nvfalaenew ñi coyke ka ñi luan, pi, piam, laxapay fvta. Feymew: ya, pigu, piam, ka yegeygu luan mew, coyke mew tvfeyci epu wenxu. Yey, piam, gvr, puwign, piam, tvfeyci luan mew ka tvfeyci coyke mew. Feymew gvr, piam, lepvmkawejuyekvmey. Kvmey mi kawaju ka gvr, pigekey, piam. Kvmey tañi kawaju, pikey, piam. Feymew puwlu egvn, inantukuy, piam, coyke gvr, kiñe zilay rume, piam. Feymew kvpatuy, piam, gvr, elkvnumefi tfeyci epu wenxu. Feymew akutuy, piam, laxapay fvta mu. Elkvnumefimi tvfeyci epu wenxu?, pigekey, piam. Elkvnumefiñ, pi, piam. Feymew epuwentun mew werkvgey, piam. Akupetulay ñi epu cezkuy?, pi, piam, laxapay fvta. Pemefige akutun egu, pigekey, piam, gvr. Feymew amuy, piam, gvr. Puwi, piam, tvfeyci epu zomo mew. Akutuy mu epu fvta?, pipufi, piam, tvfeyci zomo. Akulay, pi, piam. Feymew amutuy, piam. Puwtuy, piam, laxapay fvta mew gvr. Akurkelaygu, piputuy, piam. Ka pvci abvn mew ka werkvgey, piam. Ka amuy, piam, gvr. Akutuy tamu fvta?, pipuy, piam. Akulay, pi, piam, tvfeyci epu zomo. Feymew wvñopay, piam, gvr, ka puwtuy laxapay fvta mew. Akulay, pi, piam. Feymew kiñe bagvmafimi tvfeyci epu zomo, ñi epu ñawe, pigekey, piam, gvr. Feymew werkvel gvr kvnxowfaluy, piam. Kiñe ina lagvmmeffe tvfeyci epu zomo, pigekey, piam. Kvnxon, pi, piam. Amukage, ñocilekayaymi, pigekey, piam. Feymew amuy, piam. Tvyew pvle vlkatupuy, piam, gvr.

Kujiwkujiwkvlewey (kuliwkujiwkvlewey) tañi namun
werkvpheetew laxapay fvta
Kujiwkujiwkvlewey tañi namun
werkvpheetew laxapay fvta

Pi, piam gvr. Feymew puwi, piam, tvfeyci epu zomo mew. Feymew bagvmpufi, piam, mvr bagvmpufi, piam, tvfeyci epu zomo. Kopvknuyefi, piam. Abvn mew akutuy, piam, tvfeyci epu wenxu. Kopvkoopvy, piam, tvfeyci epu zomo. Akutulu tvfeyci epu wenxu, umawumawkvlerkeygu epu wezañma, pipatuy, piam, kiñe wenxu. Feymew wimanakvmfempatufi, piam, ñi kure. Feymew negvmlay rume, piam, tvfici zomo. Feymew payla rulpafi, piam, ñi kure. Feymew wvla kimfi, piam, bale ñi kure. Feymew gvmawtupatuygu, piam. Feymew: kiñe ina xipayayu, pigu, piam. Abvn mew xipaygu, piam. Xewa weza laxapay fvta kiñe ina bayay, pigu, piam. Abvn mew pegey, piam, gvr. Feymew reqgegey, piam, gvr. Feymew: cem no rume mogelayay, meli xipantuay puh, pigu, piam. Feymew cajaligu, piam, puh. Feymew xapvmufuy, piam, ixokom vñvm: pijmayken, ñamku, kanin, kvlegkvleg, rakiñ, rawijma, koho, mayñoko, ixofij vñvm xapvmufuy, piam. Feymew kiñe ina eluayin ñawe, pigey, piam, Pvziw egu Kogkvl. Feymew: ya, pigu, piam. Abvn mew, piam, xanakvnuygu, piam. Wvne koni, piam, ñamku ñi ñawe. Tvyew pvle xipape weza ipakarwefe!, pigey, piam. Ka abvn mew koni, piam, kanin ñi ñawe. Tvyew pvle xipape weza hmv neyen, pigey, piam. Ka pvci abvn mew koni, piam, pijmayken ñi ñawe. Fey xokifiyu tayu kure xokifiyu, pigu, piam, tvfeyci epu wenxu. Feymew logko pvle wixaley, piam. Sigenaqpage, pigey, piam, nor pvle wixakvnupuy, piam. Sigepvrapatuge, pigey, piam, logko pvle wixaleputuy, piam. Fente pvcici vñvm teni, pigey, piam. Feymew ixokom vñvm kontufeyu, piam, Kiñe ayvlay rume. Kiñe ina meli xipantuay puh, pigu, piam. Pui, piam, wvhwelay, piam. Feymew fentepun weñagkvygvn, piam. Feymew sijo eli, piam, gvnen. Feymew: kiñe ina iñce pu pvxa mula xipayan ñi lef. Feymew xvpefle ñi mula vxvfnakvmay ñi caja puh , pi, piam, sijo. Feymew cew ñi amulemum Pvziw egu Kogkvl, pu pvxa mula lef xipafemi, piam, sijo. Feymew wvh xipafemi, piam. Laxapay fvta enxin bay, piam. Feymew wvhvn mew, feymew mogey, piam, vñvm. Feymew gvmaygu, piam, tvfeyci epu wenxu. Awvgejau, pigu, piam. Feymew gvmaygu, piam. Peeyew, piam coyke yegu. Cum imuam puwen, epu eja wenxu pigeymu, piam. Bay may yu kure yem, pigu, piam. Iñce vlkatulmopaci apuwen, pi, piam, coyke. Katanyu coyke, xafxafuwvn coyke, pimoan, pi, piam coyke. Feymew fey pigey, piam. Kiñe rvgan mew wajpay, piam, puruy, piam. Xafxafuwvn coyke, pigey, piam. Fentepun kvmelkay ñi purun. Feymew xipapay, piam, epu kuse. Feymew fey pimoci puwen, pi, piam, coyke. Ka fey pigey, piam. Katanyu coyke, xafxafuwvn coyke, pigey, piam, mekey, piam, ñi purun. Feymew abvn mew xipapay, piam, epu vjca zomo, kiñe kin pvle xawmagey, piam. Fey tvfa mu kure, puwen, pigeygu, piam, Kogkvl egu Pvziw. Feymew pebopebotuygu, piam. Fey xokifiñ, pigu, piam. Feymew tvfey epu kuse fey, piam, eleltuayew ñi ge tvfeyci epu vjca zomo. Feymew kvme ge getuygu, piam. Feymew kureyetuy ñi kure yegu. Feymew abvn mew kvme wenxugetuygu, piam.

Epew kiñe cerufe

Feymew mvlerkey epu pvci mapuce. Feymew: amuan zeqin mew, pirkey tvfeyci wvnen. Amuy, piam. Amulu nvfayam, pi, piam. Feymew puwi, piam, pepuym piam, luan, leqkaytupuy, piam, mvtewe pepuy, piam, luan, coyke. Mvley, piam, kiñe xewa. Feymew pvrappuy, piam, zeqin

mew, wecupuy, piam, wecupulu, piam. Feymew zoy zumiñkvlelu mew xelankvnuy ñi mula, piam.

Feymew leq konpuy, piam, tvfeyci Cerufe ñi ruka mew. Wvlgĩñ ruka mew wixakonfempuy, piam. Feymew Cerufe ñi kona jazkv tueyew, piam. Cuma el konpaymĩ?, pige y, piam. Feymew: mv cay akuay Cerufe, amutuge! Akutule Cerufe, bagvmpatuaeymew, pige y, piam. Feymew jazkvy, piam, tvfeyci pvc i mapuce. Iñce cem mew bagvmaenew?

Wixakonkv puy Cerufe ñi ruka, piam.

Mvley, piam, Cerufe ñi xewa, waka fexenkey, piam. Feymew wajoñmage y ñi xewa pvc i mapuce, piam, rume mangelay, piam. Xipatupe feykaci, pige y, piam.

Mvley epu vjca zomo, ufisakeci xariley, piam, iloa el Cerufe. Epe epe rag i antv puwi, piam, Cerufe. Amutuge! Kvpatuy Cerufe, mv cay bagvmgepaym i, piam, pige y, piam, tvfici pvc i mapuce. Feymew: wapo anta ta Cerufe?, pi, piam. Wapo, ilo cefe, mv cay pegepatulm i bagvmgeym i, pige y, piam. Feymew kvpatuy, piam, Cerufe, epe epe puwtulu. Feymew lawlawputuy logko ce, piam, Cerufe. Feymew wilvfwlvffemi, piam, vlaley (nvlaley) ñi wvh putuy, piam, Cerufe.

Feymew pvc i mapuce, yafvluwaym i pvc i xewa! Vnatuaym i!, pifi, piam, ñi xewa. Epe puwtulu xejankvnufemi, piam, ñi mula, xaflixaffefi, piam, Cerufe, naligu, piam. Feymew: yafvluwge!, pifi, piam, ñi pvc i xewa. Feymew bagvmfi, piam, Cerufe, bagvmfilu nentupatufi tvfeyci epu vjca zomo, kvpaltufi, piam, ruka mew, akutuy, piam, akultulu. Kiñe ina kureyewayu, pi, piam, tvfeyci epu vjca zomo. Pilan, puwtuaym i mu caw, mu ñuke, pige y, piam. Feymew: pilayyu, piam.

+

Feymew ka amuy, piam, pvc i mapuce, ka pvray, piam, zeqiñ mew nvfayalu. Feymew inaltu fvxa lil umaqi, piam. Feymew inantukupayu, piam, Cerufe. Feymew pepaeyew, piam, pepaetew waycvffemmelgepay, piam, tvfeyci lil. Feymew miñce konkvley, piam, epuwentu ñamlu, piam. Feymew inaeyew tañi peñi kapvra kawejuge y pvc i mapuce.

Amuy, piam, amulu. Feymew kiñe fvxa lil mew, tvfa mew umaqci, pi, piam. Feymew umaqpuy, umaqpulu, kvpatueyew kiñe Cerufe, kvpalu pefi, piam. Feymew: yafvluwaym i, weycayayu, pifi, piam, ñi pvc i xewa. Akuy, piam, tvfeyci Cerufe, anvpay, piam, wente lil, piam. Feymew nvqvnfemi, piam, tvfeyci lil. Feymew, wixanentupay, piam, ñi espaza, pvratufemfi, piam, tvfeyci Cerufe. Feymew ajfvlf i, ajfvlfilu naqpay mapu mu, vnatukvteyege y. Feymew reqgege y, piam, tvfeyci Cerufe, ramtukazvguge y, piam. Cew elmaen ñi peñi?, pige y, piam, feykaci peleltuaen ñi peñi, pige y, piam. Feymew: kiñe ina waycvfaym i mapu, kura, pige y, piam, pvc i mapuce. Pilan! Iñce cem mu waycvfan?, pi, piam, tvfeyci pvc i mapuce. Eym i waycvfaym i, waycvfnolm i bagvmaeyu, pige y, piam, tvfeyci Cerufe. Feymew waycvfi tvfeyci kura waycvffilu. Kiñe fvxa kura lef wixaxipafemi, piam, tvfeyci pvc i mapuce. Ka tiyew pvle wixaxipafemi ñi mula, ka waycvfi, piam, tvfeyci kura wixaxipafemi ñi pvc i xewa. Feymew gv xamkawigu, piam: cumtufuym i, bagvmgefuy m i?, pige y, piam, tvfeyci pvc i mapuce. Gvnenkaenew, feymew bagvmfenew, pi, piam, tvfeyci pvc i mapuce. Feymew tvfeyci Cerufe: amutuge!, pifi, piam.

++++Kuzen epew

Feymew kvpatuygu, piam, ñi ruka mew, akutuygu ñi ruka mew, piam. Feymew feleweygu, piam, gojiy pvci mapuce. Ñvwa iñce, bagvmkefin Cerufe, pi, piam. Feymew feyentungelaygu, piam. Feymew kiñe vbmen: zewma ñvwarkeymi, nentuñmapayaen ñi rali, ñi petu imum, kuzeayu, pigey, piam. Feymew: ya, pi, piam, tvfeyci mañuce, kizu rahwan. Cumteknunyaen? Weweli cumaen rume, bagvmaen rume, konayali, konayaen, pi, piam, pvci mapuce. Cumte faleluwimi?, pigey, piam, pvci mapuce. Eymi pien, pigey, piam, tvfeyci vbmen. Waragka peso kvnuaeyu, pigey, piam, tvfeyci pvci mapuce. Ya, pi, piam. Xapvmgey pu vbmen ñi kuzean eja xafvya. Nentupayan, petu ilmi iael nentumapayaeyu, pigey, piam, tvfeyci vbmen. Ya, pi, piam, tvfeyci vbmen. Feymew xipay, piam, kom antv pvci mapuce, kintuy, piam, filu. Eja xafvya kipay, piam, pvci mapuce. Petu ilu, piam, tvfeyci vbmen, fuluntukufempay (fulintukufempay), piam, ñi filu. Feymew pey, piam, tvfeyci vbmen: tvfey filu!, pi, piam, wixaxipay, piam, bagvmfilualu. Welukonfempay, piam, pvci mapuce, yefempay ixokom rali. Feymew amutuy, piam, pvci mapuce. Wvh pvle, weweyu, pifi, piam, tvfeyci vbmen. Feymew elugey ñi waragka peso.

+

Ka kuzeayu, nentuñmapayaen ñi getantu, pi, piam, tvfeyci vbmen. Ya, pi, piam, tvfeyci pvci mapuce. Ka kuzeygu epu waragka pesu. Tayi puh umaqkvlelmi nentuñmapayaeyu tami getantu, pigey, piam, tvfeyci vbmen. Feymew ka kom antv xipay, piam, tvfeyci pvci mapuce, kintuy zagi. Umaqtulu tvfeyci vbmen, cokof ruka mew vxvftukukvnufempay, piam, ñi zagi. Feymew perkvfempay, piam, tvfeyci zagi, lef wixaxipay tvfeyci vbmen, apopay, piam, perkvn zagi. Feymew lef xipay, piam, wekun, welukonfempay, piam, pvci mapuce. Feymew kom yefempay gvtantu, piam, tvfeyci pvci mapuce. Wvh pvle, weweyu, pifi, piam, tvfeyci vbmen. Elugey ñi epu waragka pesu.

+

Ka kuzeayu, nentuñmapayaen ñi cijan kawaju cijalelu. Petu inarumenielgen, wixanielaenew kiñe kona. Kuzeayu meli waragka pesu, pigey, piam, pvci mapuce. Feyvrke may, pi, piam, pvci mapuce. Feyci wvla, piam, abv niey inka, piam. Eja xafvya nentupayan. Feymew kom antv xipay, piam, pvci mapuce. Zewmay, piam, kiñe mamvj kawaju. Eja xafvya akuy, piam. Feymew wenteji ruka mew wixapay, piam, pvci mapuce. Kinkvrfemi ñi mamvj kawaju, piam. Feymew petu iy, piam, tvfeyci vbmen. Inarumekawejulelu: ipage kay pvcin, pigey, piam. Feymew pvci mapuce welunentufempay cijan kawaju, piam, weluwixakvnupay, piam, ñi mamvj kawaju. Cumley tvfeyci kawaju wixalelu, femkvnufempay ñi mamvj kawaju. Feymew wirafkven xipay, piam, pvci mapuce. Cempvlaley, pi, piam, tvfeyci vbmen. Feymew xipafemi, piam, tvfeyci inarumekawejulelu. Tvyew amuy, pi, piam, inafici, pi, piam. Feymew: amuge feykaci, pigey, piam. Feymew pvrakawejualu potirupafemi, piam. Feymew: mamvj vrke!, pi, piam, tvfeyci inarumekawejulelu. Feymew pvci mapuce yetuy ñi ruka mew, piam, tvfeyci kawaju. Wvh pvle kipay, piam, pvci mapuce, akultuy tvfeyci kawaju. Weweyu, pifi, piam, tvfeyci vbmen. Feymew elugey, piam, ñi wew.

+

Feymew: ka kuzeayu, pigeu, piam, pvci mapuce, pura waragka pesu ranayu, pigeu, piam, pvci mapuce. Ya, pi, piam. Gogvmelaen (ñomvmelaen) kiñe kapun kawēju, pigeu, piam, pvci mapuce. Ya, pi, piam, pvci mapuce. Feymew pu xafvya nvknufi tvfeyci kawēju, piam. Wvle eja naq antv kaminantuyaway (xekatuyaway), pigeu, piam, pvci mapuce. Feymew: ya, pi, piam. Feymew pu liwen pvratakawēju, piam, pvci mapuce. Feymew eja ragi antv kaminantuyawi, piam, tvfeyci kawēju. Femew ka wewgey, piam, tvfeyci vbmen. Fentepun wezañmawtuy, piam, tvfeyci vbmen. Feymew welukvmewenxugetuy, piam, tvfeyci pvci mapuce. Feymew tvfeyci vbmen: kiñe ina bagvmafin, pi, piam. Feymew kiñe kvme ruka niey, piam, pvci mapuce. Feymew yiwiñmagey, piam, ñi ruka pvci mapuce. Feymew wajpakvxalmagey tvfeyci ruka. Feymew bay, piam, pvci mapuce

Epeu epu pvci xewa

Feymew mvlerkey epu lamgenwen, tvfici pvci mapuce, tvfici pvci zomo. Fvxa zomoy, piam, tvfici pvci mapuce pvciy, piam. Feymew akuy, piam, kiñe Cerufe ina kuzualu tvfici zomo mew, feymew vñamgey, piam. Feymew tvfici pvci mapuce vtaufisakey, piam. Feymew kiñe fvca wenxu pefi, piam, ragi lelvn. Yeney, piam, epu pvci xewa. Feymew fentepun ayvfi, piam, tvfici pvci xewa.

Wvllayafuyimi xewa? Mvna kvme pvci xewa nieymi, pi, piam, pvci mapuce. Eluaeyu kom eluaen mi ufisa, pigeu, piam, pvci mapuce. Fey piafin ñi lamgen, wvle rupafulayaymi?, pifi, piam, tvfeyci fvca mapuce. Wvle ragi antv rupatuan, pi, piam, tvfici fvca wenxu. Gijayan mi pvci xewa, pigeu, piam, tvfici fvca mapuce. Feymew akutuy, piam, ñi lamgen mew. Feypi: Petuy, piam, tvyew kiñe fvca wenxu, epuyawvli pvcike xewa. Eluaen ufisa feymew eluaeyu xewa, pienew may tvfici fvca wenxu, ñaña. Pifi, piam, lamgen. Cem zuam yefimi ta tvfeyci xewa?, pigeu, piam, pvci mapuce. Feymew: gijayu mvten, pi, piam, tvfeyci pvci mapuce. Umañ mew xipay, piam, lelvn mew. Ragi antv pefi, piam, tvfeyci fvca wenxu. Feymew gijay tvfici epu pvci xewa, ka kiñe xalka.

Eluael tvfici pvcike xewa, feypigeu, piam, pvci mapuce: tvfaci pvci xewa Waywen pigeu, kagelu Nvm pigeu. Cumgealmi rume, bagvmgealmi, mvxvmfemafimi pvci xewa.

Kvpatuy, piam, ruka mew, akutuy, piam. Akuli ñi epu pvci xewa, ñi xalka. Feymew ramtugey, piam: Tami ufisa kay?, pigeu, piam. Wvln, gijan pvcike xewa, ka xalka, pi, piam, pvci mapuce. Mvna pofogeymi (ñoygeymi), wezañmagen!, pigeu, piam, pvci mapuce. Feymew fentepun jazkvy, piam, tvfeyci zomo. Feymew bagvmfali, piam, ñi lamgen Cerufe mew. Pvcı abvn mew kuxanfaluwi, piam, feymew: bagvmelaeyu, pigeu, piam, tvfeyci zomo. Feymew kuxanfaluwlu kuxani, piam, tvfeyci zomo. Werkegey, piam, pvci mapuce. Yelmen bawen pvras, pvratulelmeaen, pigeu, piam, pvci mapuce. Feymew amuy, piam, pvratupuy, piam, pvras. Feymew akuy, piam, Cerufe. Konpetakatukuñmagey ñi epu pvci xewa, ka ñi xalka. Feymew amuy, piam, Cerufe bagvmafilu tvfici pvci mapuce. Feymew pepufi, piam, tvfeyci mapuce. Bagvmaeyu wezañma, pipufi, piam, tvfeyci pvci mapuce. Feyvrke may, zew bagvmvrkeyaen, gijatukvnuñmuci may, pi, piam, pvci mapuce. Feymew naqpay, piam, ñi pvras mew. Feymew mvxvmgey ñi xewa: Waywen! Nvm!, pi, piam. Feymew lefkvenpuy, piam, ñi pvci xewa,

nvfempufi, piam, tvfeyci Cerufe. Vnakvtiyefi, piam, tvfeyci Cerufe, bagvmpuy, piam, Cerufe tvfici epu pvci xewa.

Kvpatuy, piam, ruka mew. Cem zvgu nierken ta tvfa?, pifi, piam, ñi lamgen, bagvmfalken am?, pifi, piam, ñi lamgen. Feymew: cumael wvlimi tami ufisa?, pigei, piam, pvci mapuce. Feymew jazkvy, piam. Kiñe ina xipayan, pi, piam, pvci mapuce. Feymew xipay, piam, amuy, piam, kvzawtualu kiñe vbmen mew. Amulu pepufi, piam, kiñe pvci maben, xixankvley, piam, tvfici pvci maben. Marimari!, pipufi, piam, tvfeyci pvci maben. Cumpeymi xixankvleymi?, pipufi, piam. Wvlaetew reqle logko nieci Cerufe mew ñi caw, ñi pvtokoam, pi, piam, tvfeyci pvci maben. Feymew: mvcaiy bagvmelaeyi, pi, piam, pvci mapuce. Zakelpufi, piam, tvfeyci pvci maben: kureyewayu iñciw, iñce bagvmelaeyu tvfeyci reqle logko Cerufe, pi, piam, pvci mapuce. Bagvmelaen wvne!, pi, piam, tvfeyci pvci maben. Mvcaiy epe ragi antv akualu tvfeyci reqle logko Cerufe, pi, piam, tvfeyci pvci maben. Feymew gvmagvmagey, piam, tvfeyci pvci maben iloaetew Cerufe. Feymew xanakvnupuy, piam, pvci mapuce, umaqtuuy, piam. Epe ragi antv kvpay, piam, tvfeyci reqle logko Cerufe. Feymew: yafvluwaymi!, pifi, piam, ñi epu pvci xewa pvci mapuce. Feymew kvme elufuy tvfici epu pvci xewa. Feymey nvgey, piam, tvfici reqle logko Cerufe, bagvmfi, piam, tvfici Cerufe. Feymew bagvmlu wvxuy wvla bewfv.

Feymew: bay may ñi ñawe, pi, piam, tvfici vbmen. Feymew abvn mew amutuy, piam, tvfici pvci maben. Puwtuy, piam, ñi caw mew. Feymew werkefi, piam, kiñe tapayu mamvjtumealu. Feymew pepufi, piam, tvfeyci Cerufe, abv mapu pefilu. Feymew, piam, naqi ñi kareta mew, wixanakvmi, piam, ñi toki. Feymew ñoci kontufi, piam, tvfeyci Cerufe balelu, feymew xawawnakvmfempuy, piam, tvfeyci Cerufe. Feymew: bagvmvn, pi, piam, kom kaxvnentuñmafi, piam, ñi logko. Feymew kareta mu yetuy, piam, tvfici reqle logko. Feymew puweltuy, piam, tvfeyci vbmen mew. Bagvmfin reqle logko Cerufe, piputuy, piam, pegelputuy, piam, reqle logko. Fewla je ci focvm!, pigei, piam, kiñe ina kureyeaymi ñawe, pigei, piam, tvfeyci tapayu. Feymew bagvmi, piam, kecu kujiñ tvfeyci vbmen ñi iaqel tvfeyci tapayu. Feymew pvci abvn mew puwi, piam, pvci mapuce, puwli, piam, ñi epu pvci xewa, ejkaniey, piam, reqle kewvh Cerufe. Feymew anvnakvmelgepuy, piam, ñi iaqel tvfici tapayu. Feymew: amuge eyi Nvm! Vxvfkvnufemmeaymi iaqel tvfeyci tapayu. Cem cey?, pi, piam, fentepun yewey, piam, tvfeyci tapayu. Ka kvpalelgey, piam, ñi iaqel tvfeyci tapayu. Feymew: eyi amuge Waywen! Nvgeaymi!, pifi, piam, ñi pvci xewa. Feymew konpuy, piam, tvfeyci pvci xewa, vxvfnakvmfemelgepuy, piam, wente luku tvfeyci tapayu. Feymew nvfemfi, piam, tvfeyci pvci xewa. Feymew konfempuy, piam, pvci mapuce. Iñce ñi pvci xewa, pi, piam, pvci mapuce. Feymew ramtuzvgupuy: cem zvgu mvley xawvleymvn?, pipuy, piam, pvci mapuce. Tayi bagvmi rege logko nieci Cerufe tvfaci tapayu, feymew elufin ñawe, pi, piam, tvfeyci vbmen. Rvf bagvmi? Iñce bagvmnolu xokifin, pi, piam, pvci mapuce. Feymew: rvf bagvmi, pi, piam, tvfici vbmen. Iñce bagvmnolu xokifin, pi, piam, pvci mapuce, feyvrike zewma bagvmvrkey, pi, piam, pvci mapuce. Bagvmi, akultuy reqle logko Cerufe, feymew mupiltufin, pirkey, tvfeyci vbmen. Feymew: bagvmlay, iñce bagvmvn, pi, piam, pvci mapuce. Feymew: kom nentuñmafi kewvh tvfeyci Cerufe. Feymew kiñe pvci pañu mew kvxvgkiawvli, piam, ñi

kewvh Cerufe, feymew nentufempay, piam, ñi kewvh Cerufe. Feyvrke, mabvkewvhjefimvn tvfici logko, pi, piam, pvci mapuce. Feymew kom tvfici logko mabvkewvhfuy tvfeyci vbmen. Pelay kiñe kewvh rume tvfici vbmen. Feymew pvci mapuce kom pegeli ñi kewvh Cerufe. Feymew xipapay, piam, tvfeyci pvci maben, pepafi, piam, tvfici pvci mapuce. Foxv!, pi, piam, tvfici pvci maben, tvfaci pvci mapuce mogelenew, pi, piam, tvfeyci pvci zomo. Feymew kuregeci tapayu, xipatuge!, pigey, piam. Feymew welu anvkonpuy pvci mapuce. Feymew: kureyewayu iñciw! Tvfa mogelenmew, caw!, pifi, piam, ñi caw tvfeyci pvci zomo. Kiñe ina kureyewaymu may, pi, piam, tvfeyci vbmen. Feymew kureyewigu, piam, kureyewlu egu. Feymew mvlepuy, piam, pvci mapuce.

Feymew ñi lamgen: amuan ñi lamgen mew kiñe ina, pi, piam, tvfici pvci mapuce ñi lamgen. Feymew amuy, piam, ñi lamgen mew ñi vñam Cerufe kaxvwiliy, piam,. Feymew, piam, yey, puwi, piam, ñi lamgen mew.

Feymew pvci mapuce kvme wenxugetuy, piam. Kvpan may, lamgen, kuñifaj iñce, kisulen, feymew kvpan kiñe ina kejupaafin cem kvzaw mu rume, pipuy, piam, tvfeyci zomo. Feyvrke may, pi, piam, pvci mapuce, lñce cem piafeyu?, pi, piam, pvci mapuce.

Puwi, piam, ñi lamgen mew tvfici zomo, epuwentu puwlu tvfici wili Cerufe getantu mew kuzuam tvfici pvci mapuce, wixapvrakvnuyelfi, piam, tvfici wili Cerufe. Feymew bay, piam, pvci mapuce. Kapvr xipatuy, piam, tvfeyci zomo. Feymew fentepun weñagkvy, piam, tvfeyci vbmen. Feymew: rvgalafin may ñi cezkvy em, pi, piam, tvfeyci vbmen. Feymew ñi epu pvci xewa tvfeyci pvci mapuce fentepun gvmay, piam. Feymew rvgalel ba pvci mapuce, amuy, piam, ñi rvgan mew tvfici epu pvci xewa, rvgatupuy, piam, feymew fam entugemekey, piam. Feymew tvfici vbmen: kaji! Cumay ci?, pifi, piam, tvfici pvci xewa, piam. Feymew femkvnugey, piam, rvgatuygu, piam. Kom nentutuy tvfici pebe. Feymew kintuñmafi ñi wili ñi bagvmetew, anvnpvramtuy, piam, ñi ba yegu, kintuñmafi, piam, ñi wili, foro mew vnanentutuy, piam. Feymew mogetuy, piam, ñi pvci mapuce yegu. Mogetuy, piam, fentepun kvme wenxugey, piam, pvci mapuce.

Fey ñi zuam wvxuy ko, pirkey tañi epew pu mapuce.

Epew kiñe pvci mapuce

Feymew mvlerkey kiñe pvci mapuce, fentepun kvme wenxu ñi fotvm. Feymew: xipayan, pi, piam, tvfeyci pvci mapuce. Feymew xipay, piam, nentuy fentepun kvme kawaju, ixokom ñi wesakelu, amuy, piam, amulu. Feymew xafi kiñe fvca wenxu, fentepun xewagey, piam. Xafvlu zvگویgu, piam. Cew konaymi?, pifi, piam, tvfici fvca wenxu. Amuan kvzawtuan cewkvn, pi, piam, tvfici fvca wenxu. Eymi kay cew konaymi?, pigey, piam, pvci mapuce. lñce cewkvtun kvzawtuan kay, pi, piam, tvfeyci pvci mapuce. Eluaeyu kawaju. Wesakelu, pigey, piam, tvfeyci fvca wenxu, eyimi eluaen mi wesakelu, pigey, piam, tvfeyci fvca wenxu. Ya, pi, piam. Feymew kom elugey, piam, wesakelu.

Namuntu amuy, piam, tvfeyci pvcí mapuce. Feymew tvyew pvle pepuy, piam, ixofij kujiñ xawlelu. Vñvm mvley, piam, tigre, xapial, gvr, zagi, kojeja, kvlenkvlen. Feymew jvkafuy, piam, ñi konpuael, feymew konpuy, piam. Cew konaymí?, pigey, piam. Tvayew pvle kvzawtuan, pi, piam, pvcí mapuce. Feyvrke may, pigey, piam, kvpa ñvwagekeymi am?, pigey, piam, pvcí mapuce. Kvpa ñvwa. Kvpa ñvwagekefel may, pi, piam. Iñce eluaeyu lawen, pigey, piam, cumten xawvlen tvfeyci kujiñ, vñvm, kom wvli, piam, lawen egvn. Cumgealmi rume, bagvmafin, pigelmi cumten wenxu rume, vbmen iljujefel mew cumten pataka ce rume, bagvmlayafeymew. Cumam rume pilmi, femaymi, epu lef kawejutupe ñi rvqkvn pilmi, femaymi, kojejagetuan pilmi, femaymi, epu wixance konci pu mapu pilmi femaymi, pigey, piam, pvcí mapuce Feymew rume, piam, zoy tvayew pvle. Feypi, piam: tvfa mew kojejagetuci, pi, piam. Feymew kojejagetuy. Ka pvcí tiyew pvle: tvfa mew epu lef kawejutupe ñi rvqkvn, pi, piam. Femi, piam. Feymew pvr, piam, zeqíñ mew, feymew wecupuy, piam, wecupulu pepuy, piam, ruka cerufe. Puwi, piam, konpualu ruka mew. Feymew wvbgíñ ruka mew mvley, piam, kiñe wenxu, feymew zvqupufi, piam. Nielaymi kvzaw caw?, pifi, piam, tvfeyci wenxu. Gelay kvzaw, amutuge! Mvay akule cerufe bagvmpayafeymew, pigey, piam, tvfeyci pvcí mapuce. Feymew pemey, piam, fentepun kvmeke zomo. Feymew wvñomey, wvñomelu kvpatuy, piam, waria mew. Akutuy, piam, akutulu. Tvfa mew fentepun kvme vñvmgeci, pi, piam. Feymew femgey, piam.

Femgelu akuy, piam, wnxutukenoci zomo mew. Anvpay, piam, inafvl ruka mew. Pegay, piam, fentepun ayvgey, piam. Yelmumeci epu kona ñi nvlpayatetw tvfaci pvcí vñvm, pi, piam, tvfeyci zomo. Feymew amuy, piam, kiñe kona yemealu epu wenxu. Kizu kontujefici, pi, piam, tvfeyci zomo. Nvpuy, piam, fentepun ñomgey, piam, tvfeyci pvcí vñvm. Feymew tukulgey, piam, pu ruka, pu petaka tukugey, piam. Feymew puhlu kuzuy, piam, tvfeyci zomo, umawtuy, piam, umatulu. Xipaci ahay!, pi, piam, kojejagetuci, pi, piam, femgetuy, piam. Xipalu pu petaka, cegetuci, pi, piam, cegetuy, piam, pepufi tvfici zomo. Feymew xepey, piam, xepelu, iney tvfa?, pi, piam, wixay, piam. Vyvpay kvxal, piam, tvfeyci zomo, vyvmpalu kvxal, kojejagetuci, pi, piam, tvfeyci pvcí mapuce. Feymew ka kuzutuy, piam, tvfeyci zomo ce. Ka pvcí abvn mew, ka cegetuci, pi, piam, pvcí mapuce, ka konpuy, piam, inakuzualu. Feymew xepey, piam, tvfeyci zomo ce, xepelu wirarvy, piam, tvfeyci zomo ce, tvfa ce, pi, piam. Feymew kvpatugey, piam, kvpatuel pegelay tvfici ce, piam. Feymew rakizuami, piam, cem cey?, pi, piam, pvcí vñvmjeafel?, pi, piam, nvl, piam, ñi petaka. Feymew mvlekay, piam, tvfeyci pvcí vñvm. Feymew: ka konpale zvquafin wvla, pi, piam, tvfeyci zomo ce. Ka pvcí abvn mew umawtulu ka konpay, piam, tvfeyci pvcí mapuce. Feyci wvla kvme zvqufi, piam, nvxamkawigu, piam. Iney anta eyimí?, pigey, piam, pvcí mapuce. Iñce je no anci tayi nvpeen ga?, pigey, piam, tvfici zomo ce. Cem vrke anta eyimí?, pigey, piam, pvcí mapuce, gvnecen eyimí am?, pigey, piam, pvcí mapuce. Re ce ka ta iñce, pi, piam. Feymew kuzuntukugey, piam, feymew vñamyewigu, piam, wvhmaigu, piam, wv pvle kintuwlu yegu, piam. Pemen kiñe zomo, piam, zeqíñ mew, fey femgey, piam, tvfeyci zomo. Eymí no may gay mvlepukeymi zeqíñ mew?, pifi, piam, tvfeyci zomo ce. Iñce no. Kuyfi yeñmapaenew ñi kiñe lamgen cerufe, pi, piam, tvfici zomo ce. Feymew jazkvy, piam, pvcí mapuce. Iñce yelmetuaeyu, pi, piam, pvcí mapuce. Feymew amuy, piam, zeqíñ mew: tvfa mew kokorigetuci, pi, piam, pvcí mapuce.

Femgetuty, piam. Puwi, piam, zeqiñ mew, cegeputuy, piam, pvci mapuce. Puwi, piam, cerufe ñi ruka mew. Wvbgñ ruka mew wixaley, piam, cerufe ñi kona. Puwi, piam, pvci mapuce, puwlu ramtupuy, piam, kvzaw. Tvfa mew gelay kvzaw?, pipuy, piam, pvci mapuce. Gelay cem kvzaw no rume, pi, pim, tvfeyci cerufe ñi kona. Jazkvy, piam. Cem mew jazkvтуen?, pigey, piam. Cumael konpaymi tvfa mew? Bagvmafeyu mvcaу, pigey, piam, pvci mapuce. Feymew jazkvrkey kay. Ya, matuke bagvmen, pi, tvfici cerufe ñi kona, lefkontupuwi, piam. Feymew cvgarpufi, feymew bagvmpuy, piam, pvci mapuce. Umawkvley, piam, cerufe. Ka kontupufi, piam, ka bagvmpufi, piam. Feymew yemetufi tvfici zomo, pilafuy, piam, kvpayalu tvfeyci zomo. Jazkvy, piam, pvci mapuce. Mvcaу bagvmaeyu amunoalmi, pigey, piam, tvfeyci zomo. Feymew kvpay, piam, faw pvle xipapalu. Tvfa mu tigregetuci, pi, piam, pvci mapuce, tigregetuy, piam. Feymew: pvrakawejuаen, pigey, piam, tvfici zomo. Feymew pvrakawejuу, kvpatuygu, piam. Kvme nvwkvleaymi, pigey, piam, tvfeyci zomo. Femkvley, piam. Feymew akutuygu, piam, epe epe akutulu, cegetuci, pi, piam, cegetuy, piam. Feymew puhmalu kuzuy, piam, tvfeyci epu zomo egu. Feymew ragintulgeу, piam, pvci mapuce. Feymew feley, piam.

Ka xipayan, pi, piam. Feymew xipay, piam, xipalu amuy, piam, ka kvme wenxu mew. Puwi, piam, tvfeyci kvme wenxu mew. Kvzaw nielay?, pipuy, piam. Feymew elugeу, piam, kvzaw, inarumekujinaqel. Koni, piam, konlu. Tukukelayaymi inaltu bafken, pigey, piam, аfi ñi kujin, pi, piam, tvfici kvme wenxu. Feymew, piam, tukukay fentepun kvme inarume, piam. Pvcі abvn mew xipapay, piam, cerufe bagvmkujinalu. Feymew bagvmpay, piam kvla kujin. Tvfa mew kokorigetuci, pi, piam, pvci mapuce. Feymew femgetuy, piam. Wixanentupay, piam, ññi kuciju, lefkotupufi tvfeyci cerufe. Feymew bagvmfi, piam. Pvcі abvn mew amuy, piam, tvfeyci kvme wenxu. Feymew puwi, piam. Cumael faw tukulpaymi kujin, pigey, piam, pvci mapuce. Feymew pepuy, piam, ñi ba kujin, jazkvpuу, piam. Feymew: cuman fe?, pi, piam, pvci mapuce. Bay tami bagvmkujinkeetew, pigey, piam, tvfeyci kvme wenxu, zew pefi ba cerufe, piam. Fewla je ci focvm, pifi, piam, pvci mapuce. Tukulfiу pu bafken, pi, piam, tvfici kvme wenxu. Feyme tukulgeу, piam, ba cerufe. Feymew mogemetuy, piam. Pvcі abvn mew xipapay, piam, ka. Feymew femgetuy, piam, ka bagvmfi, piam, tvfeyci cerufe. Feyci wvla xanakvnufi, piam. Feymew fentepun sakigey, piam, pvci mapuce. Kiñe ina kureyeaymi ñawe, pigey, piam. Pilay, piam, pvci mapuce. Kvme wenxugeli may kureyeñmayafeyu mi ñawe, pigey, piam, tvfici kvme wenxu. Kureyeaymi mvten, pigey, piam. Pilay, piam, pvci mapuce. Feymew elugeу, piam, cijan kawegu, fentepun tutelu. Xipatuy, piam, amutuy, piam.

Feymew ka tvyew pvle xafi ka kiñe xewagelu wenxu. Feymew elufi kom cijan kawegu. Feymew amuan xeqiñ mew, pi, piam. Feymew ka amuy, piam, puwi, piam, zeqiñ mew, ka pegеу, piam, pvci abvn mapu. Feymew xalkatugeу, piam. Feymew kvjigey, piam. Feymew kvjiel bay, piam, pvci mapuce.

Epew kiñe mapuce pvraru zeqiñ mew

Xipay, piam, kiñe pvci mapuce, pvrar, piam, zeqiñ mew. Wecuy, piam, zeqiñ mew, pepuy ruka cerufe, piam. Feymew konpuy puwlu, piam. Cumpeymi, tvfa mew konpaymi?, pigey, piam. Kintukvzawpen, pi, piam. Tvfa mew gelay ta kvzaw?. Tvfa cerufe ñi ruka, pigey, piam, pvci mapuce. Nielay am kvzaw cerufe?, pi, piam, pvci mapuce. Akukvtujeay, niey ci ahay kvzaw, pigey, piam. Feymew abvn mew akutuy, piam, cerufe. Pegapatuy, piam, pvci mapuce. Cumpeymi faw mvlepaymi?, pigepay, piam, pvci mapuce. Kintukvzawpefun, pi, piam, pvci mapuce. Feyvrke may, eluaeyu kvzaw iñce, pi, piam, cerufe. Feymew sañwe mu inarumey, piam. Abvn mew vñamnieñmafi ñawe, piam, cerufe. Feymew kimgey, piam, ñi vñamyen. Kiñe ina kiñe fvta mapu wa zewmalaen. Wvle mvten akuan karvwatuam!, pi, piam, cerufe. Feymew weñagkvy, piam, pvci mapuce. Pepueyew, piam, ñi vñam. Umawtuaymi, kiñe fvta mapu wa, kiñeke agkvleweay, piaymi, pigey, piam, pvci mapuce. Feymew umawtualu, fey pi, piam. Abvn mew xepey, piam, rari wa, piam, xanaley. Feymew amutuy, piam, cerufe mew. Zewi, piputuy, piam. Feymew kvpay, piam, cerufe, pepay ñi wa, yepay, piam, meli wa puwvtuy, piam, ñi ruka mew. Foxv! Mvna kvme kvzawvrken!, pi, piam, cerufe. Feymu feley, piam, pvci mapuce. Zew kureyeñmayaenew ñi ñawe, pi, piam, cerufe. Zewmalaenew kiñe rvgan ko, ixofij vñvm mvleay, pi, piam, cerufe. Weñagkvy, piam, pvci mapuce. Pepueyew, piam, ñi vñam.

Umawtuaymi. Ixofij kaqe, mvleay pixal, mvleay torokiñ, cewakay, ixofij kaqe mvleay, piaymi, pigey, piam, pvci mapuce. Feymew fey pi, piam, umawtuy, piam. Abvn mew xepey, piam, pvci mapuce. Ixofij kaqe, piam, mvley tvfeyci pvci majin mew. Feymew kvpatuy, piam, pvci mapuce cerufe mew. Zewman!, piputuy, piam, cerufe mew. Feymew amuy, piam, cerufe, pepuy, piam, ñi majin, ixofij kaqe, mvley, piam. Kakewmegey zvgun tvfeyci kaqe, piam. Foxv!, pi, piam, cerufe, cumkvnuay zewmay mvca?, pi, piam, cerufe. Mvna kvme gvnecen eleyew tvfaci pvci mapuce, pi, piam, cerufe.

Feymew abvn mew: kiñe ina xipayayu, pi, piam, cerufe ñi ñawe, yeñmayafiyu sañwe kawaju ñi caw, kiñeke lewatulu (1 lewa~5 km) ñi xekan, pi, piam, cerufe ñi ñawe. Feymew xipaygu, piam. Kake kawaju kaxvwixurkvnuyeñmafi. Kiñe, piam, pvrar pvci mapuce, cerufe ñi ñawe ka kiñe, piam. Amuygu, piam, kiñe fvxa waria mapuce mew, Feymew inay, piam, tvfeyci cerufe ñi kure. Feymew abvmapulu yegu, wvño kintuygu, piam. Amuley, piam, cerufe ñi kure, peygu, piam. Abvn mew: tvfa mu mvlepe kiñe fvxa xukur, pi, piam, tvfeyci cerufe ñi ñawe. Femi, piam. Rupakay, piam, kure cerufe. Ka wvño kintuygu, piam, pefigu. Tvfa mew mvlepe kiñe fvxa zeqiñ, pigu. Rumekey, piam, kure cerufe. Ka tvyew pvle wvño kintuygu, piam, pegay, piam, cerufe ñi kure. Epe zigeygu, piam, tvfeyci kurewen. Cumayu ga tvfa?, pigu, piam. Iñce kaqegean, pi, piam, tvfeyci zomo, eyimi felageaymi, iñce mew wente mew vykvleaymi, pigey, piam, pvci mapuce. Feymew femi, piam, rari bafken weyebkeafuy, piam. Feymew rumey, piam, kure cerufe. Wvñomey, piam, pamenolu kure cerufe. Feymew cegetuygu, piam, yeñmagetuygu kawaju yegu. Feymew namuntu kvpay, piam, waria mapuce mew.

Akuygu, piam, waria mapuce mew. Feymew mvlepaygu, piam. Abvn mew werkey, piam, cerufe, yegapatuy, piam, pvci mapuce ñi kure. Kizulewetuy, piam, pvci mapuce. Elvrpuy, piam,

fenten pvlata tvfeyci zomo, fey, piam, niey, pvci mapuce, fentepun fvxa rikugey, piam, pvci mapuce.

Epew kiñe fvca kiñe kuse yegu kureyewlu

Kureyewvrkeygu, yajvrkeygu, kiñegerkey ñi yaj egu, kiñe mapuce zomo. Mvca y mvten xemvrkey ti pvci zomo. Feyci, piam, mvley ixofij kujin, mvley, piam, ose vwe mapu, piam, mvley tvfeyci fvca yegu. Kuse nielay, piam, cem ce no rume. Fvtapvray, piam, ñi koñi tvfeyci kuse, acawaj wvlpapelu ñi acawaj wvlpay, piam. Xafkintuy, piam, kiñeke ufisa egu, niey acaawj tvfici fvca mapuce. Yepay, piam, ufisa, yetuy, piam, ñi ruka mew. Puwtuy, piam, ñi ruka mew, nielay, piam, ñi kure, nielay, piam, ñi ñawe, kizuley, piam, ñi ruka. Feymew wvñomey, piam, gvmay, piam, weza fvca wenxu. Feymew iloñmaeyew, piam, ose ñi kure, kureñmaeyew, piam, ose ñi ñawe, pu mapu tukulmagey. Feymew, piam, koñi niey tvfici zomo, koñilkayu oso. Pvcí abvwey, piam, tvfeyci pvci kampu, ose ñi yaj. Kiñe fvca kura mew miñceleygvn, piam, pvci abvwey, piam, tvfeyci pvci kampu. Xiprkey, piam, mapu mew, fam pvrampat, piam, tvfeyci kura, xipakey, piam. Foxv!, pikey, piam, wente mapu mvna kvme mapu xokifiñ papay, pikey, piam, ñi ñuke. Mvna kvme mapu, mvley, vñvm, ixofij vñvm mvley. Pijmayken pigey kiñe pvci vñvm, zoy kmey pvci vñvm, pikeeyew, piam, ñi ñuke. Pvcí abvweli xipatuayu papay, pikey, piam, ñi ñuke tvfeyci pvci wenxu. Abvn mew, piam, lemfi tvfeyci kura kiñe kuwv mew, piam. Fam pvrampafi tvfeyci fvxa kura. Feymew xipay, piam, kvpay waria mapuce mew. Mvley, piam, kiñe fvxa logko. Feymew, piam, akuy. Feymew mvlepuy, piam. Kvpay, piam, ose, wenxuy, piam, ose, epe apvmfi, piam, tvfeyci pu mapuce. Feymew tvfeyci pvcike wenxu awkantukeeyew, piam, kake pvcike kampu, xewa!, pikeeyew, piam, jazkvkelay, piam. Ayja pvcike kampu mvxogkvteyeyew, piam, rvgi mew. Feymew, piam, jazkvy, kom bagvmfi pvcike mapuce. Feymew xarigey, piam, xariel kom kaxkvteyefi, piam, jasu, afkentu pvragey, piam, xipaxipage, piam. Feymew afelgey, piam, zewmalgey, piam, kiñe fvca espaza fentepun fanelu. Feymew kvpay, piam, ose, wixapay, piam. Yemey, piam, ñi espaza pvci wenxu, nali, piam, ose yegu, bagvmfi, piam, ñi caw.

Feymew: xipayan, pi, piam, inamapuam, pi, piam, fentepun newen niey, piam. Feymew xipay, piam, xipalu, abv mapu puwlu, pepufi, piam, kiñe wenxu. Yeney, piam, xalka, cazi, ñi espaza, fey, piam, yeney, pepufi, piam, tvfeyci wenxu, niey, piam, kiñe fvxa mamvj, mvtakey, piam, tvfeyci wenxu. Marimari foxay!, pipufi, piam, tvfeyci wenxu. Marimari, pi, piam, tvfeyci wenxu. Cem zvgu mew fente newentu zvguen ahay?, pi, piam, tvfeyci pvci wenxu. Cumpeymi miawimi piru mapu?, pigey, piam, pvci wenxu. Cumpelan, pi, piam, pvci wenxu. Mvna wapogerkeymi ahay, pigerkey tvfici wenxu. Cum femlayafun ñvwa?, pi, piam, tvfeyci wenxu. Zewma ñvwarkeymi, kuzeyu, iney ñi zoy yu vxvfael tvfeyci mamvj?, pigey, piam, tvfeyci wenxu. Ya, pi, piam, tvfeyci wenxu. Cuci zoy vxvflu weway, zoy vxvfnolu fey ñi konayegen, pi, piam, tvfeyci pvci wenxu. Wencumir pigey, piam, tvfici wenxu. Feymew kuzeygu, piam, wvne vxvfi, piam, tvfeyci wenxu. Abvn mapuley, piam, felen fvxa koyam. Feymew Wencumir nvpuy, piam, tvfici koyam kay, zoy fvxa ka mapu vxvfi, piam. Feymew wewi, piam, Wencumir, reqge nvpuy, piam, mvtakoyamkeci wenxu. Feymew amuygu, piam, tvyew pvle pepuy, piam,

ka kiñe wenxu, kejb payugey, piam. Petu wvnkeltukulu fvxake koywey pu bewfv, piam.
Marimari, pi, piam, Wencumir. Marimari, pi, piam, tvfeyci kejb payu wenxu. Mvna jazkvleymi
ahay, pi, piam, Wencumir. Cum femlayafun wapo ta iñce te ahay?, pi, piam, tvfeyci kejb payu
wenxu. Waporkeymi, logkotuyu!, pi, piam, Wencumir. Cuci xantuel fey ñi konayegen, pi, piam,
Wencumir. Ya, pi, piam, kejb payu wenxu. Logkotuygu, xatugey, piam, kejb payu enxu.
Reqgegerpuy, piam, kvlayewey wvla, piam, Wencumir. Feymew abv mapu, piam, puwigvn.
Eymi zewmaiaelkvleaymi, pigey, piam, tvfeyci mvtakoyamkelu wenxu. Xipay, piam,
xalkatuvñvmalu Wencumir egu payun kelv. Zewmay, piam, iael mvtakotamfe wenxu. Kvpay
umawi, piam, umawtuy, piam. Feymew puwi, piam, kiñe pvci tapayu, ipuy, piam, tvfeyci iael.
Petu ilu, xepey, piam, tvfeyci wenxu. Cumpeymi weza tapayu?, pigey, piam, tvfeyci tapayu,
xewa rek mvlerkeymi tami weza tapayugen, pirkey tvfici wenxu. Cum femlayafun gvñvlu iñce,
pi, piam, tvfici tapayu. Feymre naligu, piam, tvfici wenxu egu, tvfeyci tapayu epe bagvmfuy,
piam, tvfeyci wenxu, kom imagey, piam, iael. Feymew abvn mew akutuy, piam, Wencumir
egu. Epe bagvmpafenew kiñe tapayu, fentepun newen niey, pi, pam, tvfeyci wenxu. Mvte
jvkantengeymi ahay, iñce wvle mvlean, pi, piam, kelv payun wenxu. Wvn pvle xipay, piam,
Wencumir egu nvfayalu vñvm. Kelv payun mvley, piam zewmay, piam, iael. Zewmalu puwi,
piam, tapayu. Iñce kay iael ahay, pipuy, piam. Xewa reke mvleymi tami weza tapayugen,
pigey, piam, tapayu. Feymey pvci elgey, piam, iael. Apvmi, piam, tapayu. Ka pvcilen ahay, pi,
piam. Pilan, pigey, piam, tvfeyci tapayu. Feymew naligu, piam, epe bagvmkvnugey kelvpayun,
inagey, piam, ñi iael. Kvpatuy, piam, Wencumir egu. Akutuygu, piam, pvcilewey, piam, tvfeyci
iael, fey ipatuygu, piam. Iñce wvle mvlean, wimkvnuwey tvfeyci weza tapayu, pi, piam,
Wencumir. Ka umañ mu mvley, piam, Wencumir. Epe ragi antv puwi, piam, tapayu.
Zewmaniey, piam, iael Wencumir. Iñce kay iael!, pipuy, piam, tapayu. Pilan!, pi, piam,
Wencumir. Feymew: cem mu pilaymi?, pi, piam, tapayu. Naleyu may, pi, piam, tvfeyci tapayu.
Feymew naligu, piam, abvñma naligu, piam. Feymew kvpatuy, piam, kelv payun egu, mekey,
piam, ñi nalvn Wencumir egu tapayu. Wezamekey, piam, tapayu espaza mew, mogekay, piam,
tapayu. Feymu lefmawi, piam, tapayu. Inaeyu, piam, Wencumir, konputuy, piam, kiñe lolo mew
tvfeyci tapayu. Feymew kvpatuy mvlemum Wencumir. Foxv! Mvna newengey tvfeyci weza
tapayu, pi, piam, Wencumir. Kiñe ina inaañiñ, pi, piam, Wencumir. Feymew werkey, piam, kiñe
kona Wencumir kiñe logko mew. Eluaenew mari epu xvlke waka, pi, piam, Wencumir.
Jazuygvn, piam, Wencumir egvn. Tvfeyci mvtakoyamkeci wenxu pvlxvntukugey, piam, tvfeyci
lolo mew kontumum tapayu. Feymew abv koni, piam. Jvkamey, piam, tvfeyci wenxu. Feymew
negvmeli, piam, ñi jazu, wixagetuy, piam, xipapatuy, piam. Mvley may ce, re fvnrvgi niey,
petu awkantuy, pi, piam, tvfeyci wenxu. Fey vrke may, pi, piam, Wencumir. Eymi kongey,
pigey, piam, kelv payun wenxu. Feymew koni, piam. Abv konlu negvmeli, piam, ñi jazu.
Feymew wixagetuy, piam, tvfeyci kelv payun wenxu. Ka fey pikay, piam: mvley fenxen ce re
rvgi niey, pi, piam, kelv payun wenxu. Feymu tukutuy Wencumir. Yey, piam, ñi espaza, xalka,
koni, piam, tvfici lolo mew. Nielay, piam, ce, re koybatuygu tvfeyci epu wenxu kelv payun
egu. Feymew koni, piam, pvci Wencumir. Kom afkoni, piam, tveyci jazu, ejapuy cew ñi
mvlemum tapayu, puwi, piam, Wencumir. Feymew umaqkvley tapayu, piam. Pepuy Wencumir.
Feymew inaltu kiñe kvme fvxu ruka mu, piam, fey mew bagvmpuy, piam, tvfeyci tapayu

Wencumir. Konpuy, piam, wvbgĩn ruka mew, pepuy, piam, kiĩe kvme zomo. Ay! Cumpeymi miawimi tvfa mew?, pigei, piam, Wencumir. Yepapeeyu, pi, piam, Wencumir. Tvfa mew mvley inarumekeetew kiĩe tapayu, fey bagvmfilmi yetuyael, pi, piam, tvfeysi kvme zomo. Aa! Pofol Baweyey tami tapayu, pi, piam, Wencumir. Ka wvbgĩn mu konpuy, piam, pepay, piam, ka kiĩe zoy kvme zomo. Ay! Foxv! Cumael konpaymi tvfa mew?, pigei, piam, Wencumir. Tvfa mew mvley kiĩe fvxa tigre, inarumenieetew, pi, piam, tvfeysi kvme zomo. Cumgepe rume, cumte wapogepe rume, iĩce bagvmafin, amutuayu iĩce ñi mapu mew, pi, piam Wencumir. Feymew peputufi tvfeysi kvme zomo Wencumir. Ka rumei, piam, ka wvbgĩn ruka mew. Puwi, piam, pepuy, piam, zoy kvme zomo, zoy kvme vjca zomo. Ay! Foxv! Cumpeymi konpaymi tvfa mew?, pigei, piam Wencumir. Yepapeeyu, pifi, piam, tvfeysi kvme zomo. Bagvmfilmi kiĩe fvxa filu, yetuyael, pi, piam, tvfaci zomo. Wapogei tvfeysi filu am?, pi, piam, Wencumir. Fentepun wapo nalael mew, wenuwkey, pi, piam, tvfeysi zomo. Yefvzuelmew fey mi bagvmetew, pi, piam, tvfeysi kvme zomo. Feymew jvkay, piam, pvci Wencumir. Epe ragi antv akuy, piam tvfeysi fvxa filu. Ay! Foxv!, pi, piam, tvfeysi filu. Mvna hmvv piru mapu, pi, piam. Wencumir ejkawkvley, piam. Feymu konputuy ñi ruka mu tvfeysi fvxa filu. Cem miawpey tvfa mu?. Piputuy, piam, tvfeysi fvxa filu. Miawpelay cem no rume, pi, piam, tvfaci kvme zomo. Feymew konputuy, piam, tvfeysi fvxa filu, umaqtuputuy, piam. Umaqkvlelu rvpunakvmfempufi, piam, tvfeysi fvxa filu Wencumir. Feymew bagvmi, piam. Feymew kvpatuy, piam, ñi jazu mew, xapeltukukvnufi, piam, tvfeysi zomo negvmeli ñi jazu. Feymu wixay, piam, kelv payun. Feymew nentugepay tvfeysi kvme zomo, wvne pepuel kelv payun egu. Welu mvntukawi tvfeysi zomo mew. Femkilmu, inalgepay kay ñi lamgen, pi, piam, tvfeysi kvme zomo. Feymew tukuli, piam, jazu, ka xapeltukukvnuy, piam, zoy inageci peel Wencumir. Ka wixay, piam, kelv payun. Xipapay, piam, tvfeysi kvme zomo. Feymew kureyey, piam, kelv payun. Ka inalgepay ñi lamgen, pi, piam, tvfeysi kvme zomo. Feymew ka tukuli, piam, ñi jazu yegu kelv payun egu, ka xapeltukukvnuy, piam, Wencumir. Zoy kvme zomo kiĩe oro kuciju, piam, niey, iney rume ñi nentupenoel, Wencumir mvten ñi nentupeel. Fey, piam, kvpale kuciju tvfeysi kvme zomo: Kaxvntukulelgepayaymi jazu, pigei, piam, Wencumir. Xapeltukukvnuy kiĩe fvxa kura, piam, Wencumir. Ragin wixael tvfeysi jazu kaxvntukulelgey, piam, Wencumir. Feymew ponwi mapulewetuy, piam. Feymew amuy, piam, ka mapu mew ponwi Wencumir. Puwi, piam, kiĩe logko kofkece mew. Feymew kvzawtupuy, piam, inarumeufisapuy, piam. Kiĩe cerufe epe apvmeyew, piam, tvfeysi kofkece, fey egu nali, piam, tvfeysi cerufe yegu Wencumir. Kaxvntukiĩnepilunfi tvfeysi cerufe, piam, Wencumir. Nvy, piam, tvfeysi pilun Wencumir. Amutuy, piam, ñi mapu mu tvfeysi cerufe, puwutuy, piam, ñi mapu mu. Feymew kake cerufe naleyew, piam, vxvftugey fvake comazo kvxal mew. Feymew wvñomey, piam, cerufe, akuy, piam, cew nalkemum Wencumir egu. Feymew ñamkugey, piam, tvfeysi cerufe. Umaqkvley, piam Wencumir. Fentepun xewagey, piam, weñagkvkey, piam, gvmakey, piam, Wencumir. Xipapvxari, piam, Wencumir. Feymew tvfeysi ñamku cerufe wiwkegeleyew, piam. Feymew wixaxipay, piam. Cem cey?, pi, piam, Wencumir. Azkintulewey, piam. A pu Wencumir!, pi, piam, tvfeysi cerufe. Azkintuyawwey, piam, ixokom pvle, pvrakintuniewefi, piam, tvfeysi ñamku. Zvgulaeyew, piam, xanakvnutuy, piam. A pu Wencumir!, pi, piam, tvfeysi cerufe. Feymew ka pvrakintuy, piam. Zvgulpeen am pvci ñamku?, pi, piam, Wencumir. Zvgugetulay,

piam. A pu Wencumir! Cem mu fente weñagkvleymi?, pi, piam, tvfeyci cerufe. Amutua fel ñi mapu mew ahay ñamku, pi, piam, Wencumir. Feymey nvxamkafuygu, piam, cerufe egu. Tvfeyci cerufe ñamkugetuy, piam. Wvle epe ragi antv puwvltuaymi ufisa, iñce kurv alkagean, pi, piam, tvfeyci cerufe. Ya, pi, piam, Wencumir. Feymew epe ragi antv puwvltuy, piam, ñi ufisa. Amutuan, pi, piam, Wencumir. Feyvrke may focvm, cem yetuaymi? Cem kujiñ?, pi, piam, tvfeyci logko, waka kam kawēju?, pige y, piam, Wencumir. Yelayan, pi, piam, kiñe ufisa eluyaen, pi, piam, Wencumir. Ya, pige y, piam. Feymew eluge y, piam kiñe kurv alka ufisa. Feymew: nvxamkaeyu, pi, piam, ñi kurv alka ufisa. Yetuaeyu iñce, puwvltuan mapu mew. Elutuaen ñi pilun, pi, piam, pvci kurv alka ufisa. Ya, pi, piam, Wencumir. Feymew tvfeyci kurv alka ufisa cerufe: pvrаниеaen, pi, piam, kvme nvkvleaymi iñce mew, pi, piam, tvfeyci cerufe. Feymew amuygu, piam. Puwvlgetuy ñi mapu mew Wencumir. Feymew pepuy, piam, ñi kure Wencumir. Kiñe tapayu epe nentunie y, piam, tvfeyci oro kuciju. Kingelay, piam, Wencumir. Feymew puwlu mvten nentufemi, piam, tvfeyci kuciju Wencumir. Ay foxv! Tvfa ñi fvta!, pi, piam, tvfeyci kvme zomo. Feymew kureyewtuygu, piam. Cerufe elugetuy ñi pilun. Amutuy, piam, ñi mapu mew cerufe. Feymew kvm puwtuy wvla, piam, cerufe. Femgeci femi, piam, Wencumir.

Kvpalgeci epew

(Lenz ñi elkvnuel)

Epew kvla lamgenwen

Feymew mvlerkey kiñe kuze, kvla nierkey zomoke pvñeñ. Kiñe xipayan pirkey, kvzawtuan cem rume kvzawpuan, fenten xewageyiñ. Feymew kiñe acawaj nierkey, ilokvnurkey rokiñael. Amurkey, amulu ragi antv: tvfa mew pvci kansatuci, pirkey, kiñe pvci ko mu. Feymu kansatupurkey, jawfeñ mew, xanalelu pepurkey kiñe kvme wenxu. Marimari, pigerkey. Marimari, pirkey. Cew koneluwimi kizuyawimi?, pigerkey. Kvzawtualu may iñce, pirkey, eyimi niepeafuyimi kvzaw kay?, pirkei tvfeyci kvme wenxu. Nien kvaw, pirkey, tvfici kvme wenxu, kvcatulmeaen wesakelu, pigerkey ti zomo. Feymew amurkeygu, mankazyegerkey tvfici zomo. Puwtuy, piam, ñi ruka mu tvfici kvme wenxu. Feymew umañpuy, piam, tvfici zomo. Pu liwen elugey wesakelu ñi kvcatual tvfici zomo. Kvcatuy, piam. Ka umañ mew wvltuy, piam, ñi wesakelu. Feymew: cem zuamimi?, pigerkey, farija kam pvlata?, pigerkey. Pvlata may, pigerkey. Feymew kiñe fvxa munu nentulgepay pvlata, elugey, piam. Munuyetuy ñi pvlata. Puwtuy, piam, ñi ruka mu, puwvltuy, piam, ñi pvlata. Feymew kvmelkakvnutuy wesakelu mew, vkvja, kvpam gijay, piam, gijalfi ñi ñuke, piam, ka, ñi pu lamgen gijayelfi wesakelu. Feymew ragintugeci zomo: kiñe ina xipayan kay, pirkey. Feymew xipay, piam, xipalu ka kiñe pvci ko mew kansatupuy, piam. Feymew pepuy, piam, kiñe kvme wenxu ka. Marimari, pigepuy, piam. Marimari, pirkey. Cew konaymi?, pigerkey tici zomo. Kvzawtuan, pirkey, cew peli kvzaw zewmaiaael. Feymew: iñce nien kvzaw, pigey, piam. Amutuyu, pigey, piam. Feymew yegetuy, piam. Puwvlgelu zewmaiaelpuy, piam. Kayu antv zewmaiaelpuy, piam. Feymew elugey, piam, pvlata, fvxa kaman pvlata, piam. Feymew amutuy ñi ruka mu, piam, ka. Puwtulu pegelputuy, piam, ñi pvlata ñi ñuke mew. Fewla je ci koñi, pigey, piam. Feymew tvfici zoy pvci zomo fentepun wezalkaley, piam. Kiñe xipayan kay, cumli cuman, pirkey tvfici pvci zomo. Kiñe pvci acawaj niey, piam. Fey ilokvnuy, piam, rokiñael. Feymew kiñe jawfeñ koyam mew, fey mew xanakvnupuy, piam, kansatualu. Feymew ka kiñe kvme wenxu pepueyew, piam. Cumpeymi xanaleymi?, pigey, piam. Kvzawtuñmayalu iñce, pirkey. Iñce nien kvcatulmean ñi wesakelu, pigerkey. Ya, pirkey. Feymu amuy, puwvrkey. Eja naq antv elugerkey wesakelu ñi kvcatuael. Wvh pvle, wvlturkey ñi wesakelu. Feymew: cem zuamimi, farija kam pvlata?, pigerkey. Farija, pirkey. Feymew elugey kiñe pvci farija. Feymew kimmelgerkey. Tvfa, farija eluaeyu, cem rume gijatukeafimi, cumlean rume pilmi, feleaymi. Kiñe kura mew elkvnuafimi, rvgalkvnuafimi. Feymew puwturkey ñi ruka mew, puwvlturkey ñi farija. Cem yemeymi?, pigerkey. Tvfa, pvci farija elugen, pirkey. Cumal tvfey, farija yemeymi? Pofol, pigerkey. Feymew rvgalkvnuy, piam, ñi pvci farija. Feymew mvley, piam, gijatun. Amuayin, pigvn, piam. Tvfeyci pvcilu: mvekayaymi!, pigey, piam. Feymew: amuan kay, pi, piam. Amulayaymi, pigey, piam. Feymew amuy, piam, ñi farija mew. Farija, pvci farija, eluen kiñe cijan kawaju, re pvlatagean, pvlata wixantukuwvgean, epu kona miawvlan, mvr femgeay ñi epu kona. Feymew mvcay mvten xaloli tvfici kura, xipapay, piam,

kawēju, tvfci epu kona, kom nentupay, piam, wesakelu, caway, zikil, xapelakuca, tvpu, mezaja, ixokom, piam. Feymew amuy, amulu puwi, piam, gijatun mew. Miawpuy, piam, ñi ñuke, ñi lamgen. Naqpuy, piam, ñi epu kona wixaneleyew ñi kawēju. Feymew pvci abvñmamey, piam, feymu kvpatuy. Kom tukukvnupatuy ñi wesakelu, ñi epu kona tukukvnupatuy, piam. Fentepun xewagetuy, piam. Feymew akutuy, piam, tvfci pu koñiwen. Feymew gvksamkapatuygvn, piam. Miawpey kiñe vjca zomo, fentepun kvme zomo, miawvli epu kona, mvr femgey. Pipatuy, piam, tici zomo: iñce no may?, pirkey. Aa pu vrku!, pigerkey tvfeyci pvci zomo. Feymew kiñe fentepun kvme wenxu ñi fotvm: kureyeafin tvfeyci zomo, caw!, pirkefi ñi caw. Feymew kinturkefi, feymu pegey, piam, pvci zomo, feymew kureyewigu, piam. Feymew yey ñi cijan kawēju ka ñi epu kona.

Epew kvla peñiwen

Mvlerkey kiñe kuze, kvla nierkey koñi, kuxanvrkey kuxanlu. Epu abvkewerkey ñi koñi, ka kiñe pvcirkey. Xiparkey epu abvkewelu nvfayalu, elkvnerkey pvcilu. Mvñetuaymi ñuke, pigerpurkey, feymew mvñeturkey wazkvn ko mew ñi kuxan ñuke, barkey balu may. Feymew ayvfurkey, xiparkey awkantualu. Feymew akuturkey ñi epu peñi tvfa pvle, ramtugepaturkey: cumley mi ñuke?, pigepaturkey. Kvme ka, ayeletuy ñi ñuke, pirkey. Kvme ka, pirey tvfeyci ñi epu peñi, paturkey ñi ñuke, barkey. Feymew gvmapaturkey: mvna pofogeymi ahay, barkey taiñ ñuke, pirkey may. Feymew feypilu pirkey: yeyaymi ñuke caw mu, pigerkey tvfeyci pvcilu. Yerkey ba ñuke, pvramkvnulelgerkey ñi ñuke wente kawēju. Kansarkey ñi kuwv, feymew vxvfnakvmkvnukey ñi ñuke. Feymew amurkey kizu, puwvrkey caw mew, feypipurkey: tvyew mu elkvnun may ñi ba ñuke. Cew?, pigerkey. Tvayew mu!, pirkey. Amuyul!, pigerkey. Amurkey caw egu, amulu caw. Feymew lefkiawvrkey, lefkiawlu wvñomerkey caw, jvkarkey. Lef kawēju amuturkey, inagey, piam, may femlu. Feymew elkvnukey. Kvpatuy, piam, may pvcikelu. Feymew xafvrkefi kiñe wenxu. Wvllayaymi mi yewa?, pigerkey. Wvllan ka, pirkey. Cumten fali?, pigerkey. Mari pura peso. Feymew gijañmagerkey. Namuntu amuturkey, ramtugerkey: mi yewa kay?, pigerkey. Wvln, pirkey. Cumten mu wvlimi?. Mari pura peso mu, pirkey. Pofogejaymi, wezañma! Feymew feypirkey: cem mew pofogen?, pirkey. Cuci mi pvlata?, pigerkey. Feymew nentuparkey mari sentafo ka kiñe sigku. Mvna pofogeymi!, pigerkey.

Kiñe ina xipayayin, pirkeygvn, xiparkeygvn. Cem yeyaymi?, pigerkey. Yeyan ñi puerta ñi ñuke, yeyan, pirkey. Xiparkeygvn, meñkvrkey ñi puerta. Feymew puwvrkeygvn mvlekemum awkan wigka. Feymew kvpaturkey may tvfeyci awkan wigka. Feymew xipatkeygvn, pvrarkeygvn wixu mew, pvramvrkeygvn ñi puerta. Feymew: kansan, pirkey. Nvniekvnun, pirkey. Feymew pigerkelay pinoel. Fam nakvmvrkey ñi carawija, memeturkey petu korvlu tvfeyci wigka. Konpurkey pu caja ñi me. Cem cey mvley?, pirkey tvfeyci wigka. Kanin peno, pirkey. Xalkatufiin, pirkey. Feymew kagelu: femkilmvn, pirkey. Mvte abv mapu puwafuy xalkatun, pirkey. Feymew vxvfnakvmvrkey ñi puerta, bagvmpurkey kiñe wigka. Feymew lef xiparkeygvn. Naqpaturkeygvn may. Feymew: xipayayin, pirkeygvn. Iñce xipalayan, pirkey tvfeyci pvcilu.

Xiparkey tvfeyci epu abvkewelu, xiparkey, amurkey may, pvcilu mvlekarkey. Feymew konparkey kiñe xewa, mvxvmvrkefi. Konparkey tvfeyci xewa, elurkefi ilo, feymew umaqtuparkey tvfeyci xewa. Feymew xarintukulelvvrkefi yiwiñmaleci kacu, vyvmkvnukefi. Xiparkey tvfeyci xewa may, amurkey mvlemum awkan wigka. Lef xiparkey tvfeyci awkan wigka. Feymew rakizuamvrkey: cem cey iñ meketew?, pirkeygvn. Feymew kiñe: amuge!, pigerkey, feymew amurkey, amulu pegepurkey tvfeyci pvcu mapuce. Feymew: marimari, pigepurkey. Marimari, pirkey. Naqpage, pirkefi tvfeyci wigka. Feymew ilotumerkey, naqpurkey tvfeyci wigka. Naqpulu, ilotupage kay, pigerkey. Ilotupurkey. Feymew azkintuniewvrkey petu ilotulu. Feymew feypigerkey: cem anta nieymi tami pu wvh?, pigerkey. Feymew mabvrkey ñi wvh. Nielay, pirkey. Feymew tvfeyci pvcu mapuce: Tvfeý je no ancí?, pirkey. Kal!, pirkey. Feymew mabvñmagerkey. Tvfeý, pigerkey, nentupage! Nentupage mi kewvh!, pigerkey. Nentuparkey, nentupalu kaxvkvnuý kewvh. Kaxvñmagerkey ñi kewvh! Feymew lef xiparkey, amuturkey ñi kompañ mew. Feymew ñi pu kompañ: cem am cí?, pigerkey, cem anci mvlerkey?, pigerkey. Feymew zvgurkelay, zvgunolu lefmawvrkeygvn.

Feymew pvcu mapuce umañvrkey. Pu liwen wvla amurkey, yerkey ñi puerta. Feymew amulu puwvrkey kiñe kawajeru mew. Cewpeymi?, pigerkey. Amualu iñce, pirkey, kvzawtualu, pirkey. Cew gijameymi puerta?, pigerkey. Tvyew mu, pirkey. Petu mvley wvlael puerta?, pigerkey. Fenxeley!, pirkey. Cew?, pigerkey, yeyafen?, pigerkey. Pílan, pirkey. Kujiaeyu, pigerkey. Cumten kujiaen?, pirkey. Kiñe peso, pigerkey. Pílan, pirkey. Epu peso, pigerkey. Feymew: ya, pirkey. Feymew yerkefi tvfeyci kawajeru, amurkey. Abvtuy, píam, pvlata. Cuci mew amuy rvpv tvfa mew focvm?, pigey, píam. Tvfa mu, pirkey. Pvrampurkefi, puwigu wente mawiza. Feymew wvneltu pvrakay, píam, abv pvrálu vmvlkuralfi, píam. Feymew, píam, Tvfeýci kawajeru: femkieli!, pí, píam. Feymew kvjipaeyew, píam, kiñe fvxa kura ñogko mew, píam. Bay, píam. Feymew, píam, wvñomeý tvfeyci pvcu mapuce, puwtuy, píam, tvfeyci kawajeru ñi ruka mew. Ramtugerkey: mi paxon kay?, pigerkey. Eyew mvlepukay, pirkey, wvle kvpalelgean ñi kareta, pí ñi paxon, pí, píam. Mvte ayvpuy puerta gijayaqel. Feymew amuturkey, yerputurkey ñi puerta, amuy, píam. Feymew: elkvnuci ñi puerta, pirkey.

Feymew puwvrkey ka kiñe logko. Feymew ramtugerkey ramtuel: cumpeymi?, pigerkey. Kintukvzawpen, pirkey. Feymew tvfeyci vbmen: iñce nien kvzaw, pirkey. Cem kvzaw nieymi caw?, pirkey tvfeyci mapuce. Inarumelaen ñi caqra, pigerkey, mvte weñetuñmageken ñi wa, pirkey. Nvlaen kiñe koñiwen yewa, pirkey tvfeyci vbmen. Ya, pirkey tvfeyci pvcu mapuce. Amuyu may, pirkey, amurkeygu amulu, pegelgemerkey. Fey tvfa!, pigerkey. Fey vrke may, pí, píam, pvcu mapuce. Feymew lipvmi mapu. Tvfa mu anvlean, pirkey, elelaen akuca, pirkey. Elélgerkey waypa. Feymew feypi, píam: tvfa mew fam konli zipomean, feymew xepelean. Feymew epe wvh konpay, píam, tvfeyci koñiwen yewa, feymew jazuy, píam, tufi, píam, tvfeyci pvcu kawaju fvlagko. Feymew, píam, kvpalfi ñi paxon mew epe wvh. Paxon, pipay, píam. Feymew tvfici vbmen wixanxipay. Nvymi?, pigey, píam. Nvn, pí, píam. Nentulmupaci

kuciju, pi, piam, tvfeyci vbmen. Feymew pvci mapuce, piam: eluen iñce, piam, cumael anci?, pi, piam. Feymew mogelgey, piam, tvfeyci pvci kawēju. Feymew amuy, piam, pvci mapuce, amulu, ziputuy ñi epu peñi. Ajkvgerkey, piam, mi bagvmkawajerun. Feymew bagvmgey, piam, pvci mapuce. Bagvmel xanakvnugey, piam, elkvnulelgey ñi pvci kawēju. Feymew kvjmaqeyew, piam, feymew mogetuy, piam. Feymew zvgueyew, piam, ñi kawēju. Fanten mu mogelen kay, iñce mogeleyu kay, pi pvci kawēju. Amuayu, ziputuaymi mi epu peñi mew, pieyew, piam, ñi pvci kawēju. Feymew amuy, piam, ziputuy, piam, ñi epu peñi. Feymew: elkvnuan inaltu bafken, piyeyew, piam, ñi pvci kawēju. Elkvnpuy, piam, elkvnpulu nvxamkaeyew ñi pvci kawēju. Cem xawvn mew rume mvlele, cem rume eluen, piam, pieyew, piam, ñi pvci kawēju. Feymew, piam, mvley xawvn. Zew ziputuy ñi epu peñi, piam. Feymew, piam: amuayu, pi, piam, ñi epu peñi. Tvfeyci pvci mapuce: iñce kay amuan, pi, piam. Amulayaymi, pigey, piam. Jazkvтуgey, piam. Amuy, piam, tvfeyci epu wenxu. Feymew amuy, piam, pvci mapuce. Feymew, piam: pvci fvlagkito, pipuy, piam, eluen kiñe tapayu, kurv ixokom, cija, puñal, zipuela, etipu, kafisatu, wixantukuwe, xvpuwe, yuntatiadol, re pvlatagean ixokom pvlata. Feymew nentulgepay, piam. Pvrakon. Feymew, piam, amuy, piam, xawvn mew. Puwi, piam, wewpuy, piam, topagelay, piam. Fentepun ayveyew, piam, vjcake zomo, piam. Naqqage, purupage!, pigefuy, piam. Pilan!, piam, ka antv wvla!, pi, piam. Feymew cem kvme wenxu rume xvrlaeyew, mvlefel kvmeke wenxu,iefuy, piam, pvlata, topagelay, piam. Feymew wvñomey, piam: akutuy, piam. Elkvnupatuy ñi kawēju, piam. Feymew pofregetuy, piam. Feymew akutuy, piam, ñi epu peñi, feymew nvxamkapatuy, piam, tvfeyci epu wenxu. Miawpey may kiñe kawcu, xvrgelay, pi, piam. Pvc mapuce: iñce no may?, pi, piam. Eymi mew gujuzuwfuy tvfeyci wenxu ahay, pigey, piam. Ka mvley, piam, kuzen, kayu antv eli, piam kuzael. Feymew akuy, piam, tvfeyci xawvn. Amuy, piam, tvfeyci epu wenxu. Iñce kay amuan mvca, pi, piam, pvci mapuce. Feymew amuy, piam, ñi fvlagko mew. Fvlagko, pi, piam, nentulpaen kiñe rvze, apolelu, cem no rume ejangelayay, re oro nieay, etipu oro, tiazol nieay, cem no rume ejangelayay. Feymew nentulgepay, piam, cijan kawēju. Feymew, piam, amuy xawvn mu. Puwi, piam. Gelay, piam, kawcu pvci mapuce mew. Kuzepuy, piam, wewpuy, piam. Feymew fentepun ayveyew, piam, vjcake zomo. Naqqage! Putupage!, pigey, piam. Pilan!, piam, ka antv wvla!, pi, piam. Feymew wvñomey, piam, akuy, piam. Fenxen pvlata wewmey, piam, Feymew akulu elpatuy ñi kawēju, piam, cew ñi yepakemum. Feymew ka mvley, piam, xawvn, feymew akuy, piam, xawvn. Feyci wvla kimgaan, pi, piam. Feymew amuy, piam, ñi kawēju mu: fvlagkitu, pipuy, piam, nentulpaen kiñe fvxa alazan fentepun kvmelu, ixokom re pvlata nieay, cem no rume afnielayay, wesakelu, koton, caleku, pantalon, sumel, ñi ixokom fonsijo mew apoapoleay ñi fonsijo pvlata mew. Feymew amuy, piam, xawvn mew, puwi, piam, kuzepuy, piam, wewpuy, piam. Feymew: naqqe!, pieyew, piam, vjcake zomo. Feymew naqi, piam, purupuy, piam. Feymew ñi epu peñi anvanvy, piam, tukulgey, piam, pu ruka. Feymew purupuy, piam, kiñe rupaci purulu. Feymew xipapay, piam. Ñi epu peñi, piam, mvxvmfi: kvnapamu (kvpamu) a pu wen!, pifi, piam. Vytufi, piam: Lienkura! Kajfvluan!, pi, piam. Feymew kvpay, piam, tvfeyci epu wenxu. Ramtufi, piam: nieymu pvlata pu wen?, pifi, piam. Feymew: nielayu, pi, piam, tvfeyci epu wenxu. Feymew, piam, nentulfi kiñe fvxa runa pvlata, elufi, kake fvake runa elugey, piam, tvfeyci epu wenxu. Feymew

kontuy, piam, purupatualu. Feymew ayveyew, piam, vjca zomo, feymew kuregey, piam. Fentepun vbmengey, piam. Feymew niey, piam, kvla cijan kawēju, ñi cija kakerumey, pvlata, oro cija, pvlata cija, ixokom nietuy, piam.

Epew kiñe fvca wenxu pvra wenu mew

Feymew mvlerkey kiñe fvca wenxu mapuce. Pvrarkey wenu, puwvrkey wenu, gvnecen pepurkefi. Cumpeymi miawimi tvfa mew?, pigey, piam, tvfeyci fvxa wenxu. Kuñifaj may iñce caw gvnecen, feymew kvpan, gijatupapen eyimi mew caw gvnecen!, pipuy, piam, wenu mapu mew tvfeyci fvca wenxu. Feyvrke may, pigey, piam. Elugey, piam, kiñe paño. Cem rume gijatukeafimi tvfaci paño, pigey, piam, tvfeyci fvca wenxu. Feymew wvñomey, piam, akutuy, piam, faci mapu yemeel ñi paño. Elfalkvnupay, piam, kiñe zomo mew. Apope paño!, piñmalayaen ñi paño, pi, piam, tvfeyci fvca wenxu. Cem zvgu mu cey, apope paño!, piñmalayaen ñi paño, pienew tvfeyci wenxu, pi, piam, tvfeyci zomo. Feymew vnifkvnuy tvfeyci paño. Apope paño!, pi, piam, tvfeyci zomo. Apofemi, piam, pvlata mew. Umañ mew puwi, piam, tvfeyci fvca wenxu. Feymew ramtuputuy, piam, ñi paño. Ñami mi paño, pigey, piam, tvfeyci fvca wenxu. Feymew wvñomey, piam. Ka amuy, piam, wenu mew, puwi, piam. Ka cumpeymi?, pigey, piam. Ka gijatupapen gvnecen mew, pi, piam. Feymew elugey kiñe pvnna, kvxvgkvnulelgey kiñe pvci pilken mew. Afle mi pvha: apope!, pifemkeymi, pigey, piam, tvfeyci fvta wenxu. Feymew akutuy, piam, faci mapu. Feymew elfalkvnuy, piam, ka feyici zomo mew. Apope pvci pilken!, piñmalayaen ñi pilken, pi, piam, tvfeyci fvca wenxu. Cem zvgu mu apokilpe pilken, piñmalayaen ñi pilken, pienew tvfeyci fvca wenxxu?, pi, piam, tvfeyci zomo. Apope pilken, pi, piam, tvfeyci zomo. Apofemi, piam, pvha mew tvfeyci pilken. Feymew ka antv mew amuy, piam, yemetualu ñi pilken, tvfeyci fvca wenxu. Puwi, piam. Yepapeetew ñi pilken, pipuy, piam, tvfeyci fvca wenxu. Feymew: ñami tami pilken, pigey, piam, tvfeyci fvca wenxu. Wvñomey, piam, tvfeyci fvca wenxu. Ka amuan wenu mapu, pi, piam. Ka amuy, piam, wenu mew. Puwi, piam, wenu mew. Cumpeymi?, pigey, piam. Ka gijatupapen may, pi, piam, fvca wenxu. Mi yepakeel kay, cumyawlimi?, pigey, piam. Elfalkvnufun kiñe zomo mew: ñami, pigen may, pi, piam, tvfeyci fvca wenxu. Feymew elugey, piam, kiñe xvpuwe. Wixage xvpuwe, pilayafimi, pigey, piam, tvfeyci fvca wenxu. Feymew wvñomey, piam. Akutuy, piam, faci mapu,, elfalpatuy, piam, tvfeyci zomo mew ñi xvpuwe. Wixage xvpuwe!, piñmalayaen ñi xvpuwe, pi, piam, tvfeyci fvca wenxu. Cem zvgu mew fey pienew cey kay?, pi, piam, tvfeyci zomo. Wixage xvpuwe!, pi, piam, tvfeyci zomo. Feymew wixafemi, piam, tvfeyci xvpuwe, wimakaniey, piam. Wimagey, piam, tvfeyci zomo. Wirarvy, piam, tvfeyci zomo, epe bagvmi, piam. Puwi, piam, tvfeyci fvca wenxu. Xanakvnutuge xvpuwe!, pipuy, piam, tvfeyci fvca wenxu. Xanapufemtuy, piam, tvfeyci xvpuwe. Feymew mogey, piam, tvfeyci zomo. Kuxankoni, piam. Abvn mew bay, piam, tvfeyci zomo.

Epew xawma logko

Kiñe logko mvlerkey xawma. Feymew kuxanvrkey, kuxanlu pewmarkey, coz rayen kacu pewmarkey. Feymew kvla niey, piam, fotvm tfeyci xawma logko. Kajfval pigey wvnen, kagelu Kajfvkew pigerkey, kagelu Kajfvmil pigerkey. Kintulmuan coz rayen niey kacu!, pirkey tfeyci xawma logko. Eymi kintulaen, pigerkey tfeyci wvnen Kajfval. Xiparkey kintualu, yerkey kiñe kvta pvlata, yerkey kvla kona. Feymew puwvrkey kiñe fvca waria mapuce mew. Konpurkey tfeyci waria mapuce mew. Feymew mvlerkey kiñe kvme zomo, fentepun kvme zomo! Rumelu: kvnapage (kvpge) tvfa mew, pigerkey Kajfval. Feymew konpurkey, konpulu nentucijawpurkey, kom ñi kona yegvn umañpurkey. Feymew weñeñmagerkey kom ñi pvlata. Gojipurkey mansana pvlku mew. Fentepun xewageturkey, kvzawtuyawturkey. Feymew wvñorkey tvfici kvla kona, akuturkey xawma logko mew. Feymew ka werkegerkey, Kajfvkew. Yerkey ka kiñe kvta pvlata, yerkey ka kvla kona. Amurkey kiñe waria mapuce mew, puwvrkey tfeyci waria mapuce mew. Konpulu ka fey pigerkey. Feymew ka umañpurkey, kom ñi pu kona yegvn. Ka femgeci weñeñmagerkey ñi pvlata, gojipurkey. Fentepun xewageturkey, ka kvzawtuyawturkey. Wvñomerkey tfeyci pu kona, ka akuturkey xawma logko mew. Ay foxv!, pirkey xawma logko, awvjaenew epu fotvm!, pirkey tfeyci xawma logko. Iñce xipayan, pi, piam, tfeyci inan, Kajfvmil. Feymew xiparkey ka, yerkey kiñe kvta pvlata, ka kiñe kona. Kintualu coz rayen nieci kacu amurkey. Puwvrkey tvfici waria mapuce mew. Konpurkey, konpulu: Kvnapage!, pirkeeyew tvfici kvme zomo. Feymu wvñorkey, konparkey tvfici kvme zomo mew. Naqge!, pirkeeyew tfeyci kvme zomo. Cem mew naqalu iñce, weza kvri? Eymi tami zuam femyaw i tañi epu peñi, pi, piam, pvci Kajfvmil. Feymew jazkvrkey tvfici kvme zomo. Feymu pvresentagerkey kiñe logko mew, mvxvmgerkey, pvci Kajfvmil. Puwvrkey tfeyci logko mew. Cem zvgu mew kvri pifimi tvfici kvme zomo?, pigerkey pvci Kajfvmil. Cum feypilafuyiñ foxay? Fey tvfici zomo mu pofregeluge epu peñi kay, pirkey pvci Kajfvmil. Kiñe ina elutuaenew ñi epu kvta pvlata montuñmaetew ñi peñi, pirkey Kajfvmil. Feymu elugeturkey epu kvta pvlata Kajfvmil. Feymew wvñomerkey. Ragi antv jawfvrkey, umaqtuparkey. Umaqtupalu, pvci abvn mew, peparkeeyew kiñe fvca wenxu. Cumpeymi focvm, umaqkvleyi?, pigeparkey pvci Kajfvmil. Werken may iñce, kintupapefun may coz rayen nieci kacu, pirkey pvci Kajfvmil. Feyvrke may!, pirkey fvca wenxu, iñce may peniefun cew ñi mvlemum coz rayen nielu, focvm, pirkey tvfici fvca wenxu. Mvte kiñuwvngew cew mvlemum tfeyci coz rayen nielu, pirkey tfeyci fvca wenxu. Cew mvley foxay? Kimelele kujiaeyu, pigerkey tvfici fvca wenxu. Ya, pirkey. Tvye mu mvley welu kiñe puerta mvten nvlayaymi, pigerkey Kajfvn. Elugerkey jafe (nvlawe), amurkey tfeyci ruka mew. Konpualmi tfeyci ruka mew, vy gvnecen!, pifemaymi, pigerkey Kajfvmil. Feymew puwvrkey tvfici ruka mew nvlapurkey. Konpualu: vy gvnecen, pirkey Kajfvmil. Feymew pepurkey ixofij rayen nieci kacu, yemerkey coz rayen nielu, ka fvlag rayen nielu. Cem zvgu mu nvlalayaymi kake wvbgñi!, pienew tfeyci fvca wenxu, pirkey Kajfvmil. Nvlarkey kake wvbgñi, pepurkey kiñe mesa, mvlerkey limeta pvlku, ka kiñe fentepun kvme zomo mvley, piam, tvfici ruka mu. Tvfeici limeta pvlkv putupurkey, kiñe faso nenturkey. Putuy, piam, apofemtuy, piam, tfeyci limeta. Feymu yemey, piam. Ka kiñe espaza mvley, piam, wvbgñi ruka mew. Fey, piam, yemey ka. Ka wvbgñi mvley,

piam, pepuy, piam, ka kiñe mesa, mvley, piam, kofke, fonsijotukugey. Tvfeyci kvme zomo mvlelu vñamyemey, piam, Kajfvmil. Yemey kofke, ka tvfeyci limeta pvlku, tvfeyci espaza. Kizutu rulparulpatukelu tvfici espaza. Feymew kvpatuy, piam, akutuy, piam, pepatufi tvfici fvca wenxu, elupatufi ñi jafe. Oo pofo! Cuma el yemeymi tvfeyci espaza? Ka antv kartikarpoaeymew (awvkayaeymew)!, pigey, piam Kajfvmil. Niefige mvten tvfeyci espaza, pigey, piam, Kajfvmil. Cem kimi tati weza fvta?, pi, piam, Kajfvmil. Kizu ey mi kartikalayaeymew, pigey, piam, Kajfvmil, tami peñi kartikañmayaeymew, pi, piam, tvfeyci fvca wenxu. Feymew wvzay, piam, tvfeyci fvca wenxu yegvn.

Feymew inapetueyew, piam, ñi epu peñi. Kiñe ina bagvmafiyu peñi, pi, piam, tvfeyci epu wenxu, Kajfval egu Kalfvkew. Feymew kvpatuygu, piam, faw pvle kiñe pvci lemu mew, jawfvpaygvn, piam. Inaltu kiñe fvxa lil fey mew, piam, bagvmgey Kajfvmil. Vxvftukvnugey, piam, kiñe fvxa lil mew. Kajfvmil ñi kona bagvmafel, piam, ka: Mogeci! Ka mapu mu xipatuan, pi, piam, tvfeyci kona. Elgey, piam, ñi epu kawēju. Feymu, piam, kiñe iloy, xvlke jasuy, piam. Koni, piam, pu lil, jasutukvnumefi, piam, wixafi, piam, sintal kawēju mew tvfeyci ba.

Weculpatufi, piam, tvfeyci ba Kajfvmil. Feymew mogepatuy, piam. Ay! Cumfun ama?, pi, piam, Kajfvmil. Ba pelejeafuy mi am?, pifi, piam, ñi kona. Feymew puwtuy, piam, ñi caw mew tvfeyci epu wenxu Kajfval egu Kalfvkew. Mogetulu Kajfvmil pofogewey, piam, pu puñpuya miawli, piam, ñi coz rayen. Feymew amutuy, piam, kiñe ruka mapuce mew. Konpuy, piam. Iael nielaymi?, pipuy, piam. Mvlefuy iael, gelay kofke, pigey, piam. Iñce nien kofke, piam, Kajfvmil. Feymu elugey iael, iy, piam, ñi kofke, apoapogey mesa mew. Ayvñmagey, piam, ñi kofke. Eluen mi kofke, pigey, piam. Feymew wvli, piam, ñi kofke epu pataka kecu mari peso mu. Ka tvyew pvle: gelay ial?, pipuy, piam. Mvlefuy welu gelay pvlku, pigey, piam. Iñce nien pvlku, pi, piam, Kajfvmil. Feymew ipuy, piam, putupuy ñi pvlku, marici aflay, piam. Feymew gijañmagey ñi pvlku. Ka, piam, wvli, piam, ñi pvlku epu pataka peso mew. Ka rumey, piam, ka tvyew pvle umañpuy, piam. Elkvnu, piam, ñi espaza wvbgñ ruka mew. Pu liwen kizutu rulparulpatuy, piam, tvfeyci espaza. Feymew ayvñmagey, piam, ñi espaza. Ka gijañmagey, piam, kvla pataka peso mew. Feymew rumey, piam. Puwtuy, piam, ñi caw mew. Pofogewi, piam, kimlay, piam, ñi caw. Feymew kvzawtupuy, piam. Kizu ka kimnielay, piam. Feymew kvzawtupukey, piam. Kuxankvley, piam, tvfeyci xawma logko. Miawvlkay, piam, coz rayen. Feymew wvli, piam, tvfeyci coz rayen xawma logko mew yemekemum coz rayen Kajfvmil. Xipapay, piam, tvfeyci kvme zomo kintua el Kajfvmil. Xipapay, piam, tvfeyci kvme zomo, akuy, piam, cew wvlmum kofke Kajfvmil. Feymew: ial, pipay, piam, tvfeyci kvme zomo. Feymew elugey, piam, iael. Kimpatuy, piam, ñi kofke tvfeyci kvme zomo. Cew peñmamum ñi kofke tvfa?, pi, piam tvfaci kvme zomo. Iney pigey mi kofke?, pigey, piam. Kimel mew mi kofke yetuaymi, pigey, piam, tvfaci kvme zomo. Kvnapage kofke!, pi, piam, tvfeyci kvme zomo. Xefkvprapvnafemey, piam, tvfeyci kvme zomo mew. Feymew yerpatuy, piam, ñi kofke. Rumey, piam. Ka tvyew pvle kimputuy ñi foteja pvlku. Ka femgeci yerputuy, piam. Feymew amuy tvfeyci xawma logko mew. Puwi, piam, xawma logko mew. Kimtupapen ñi fvta, pi, piam. Feymew: cuci mi fvta?, pigey, piam. Tvfeyci pofo fey tvfa, pi, piam. Cem zuamyefimi ta tvfeyci pofo?, pigey, piam, ta tvfeyci zomo. Cumgepe rumepey, pigey, piam, tvfeyci kvme zomo. Feymew mvlepuy, piam, kimgelay, piam, Kajfvmilgey. Pofo pigey mvten, piam. Feymew kuregey, piam, fey ci wvla

kimgetuy, piam, Kajfvmilgen. Tvfeysi fvca wenxu kimeletew cew mvlen coz rayen nielu gvnecen, piam.

Epew kvla oro nielu

Kiñe pvci mapuce nierkey kvla kazena oro, kiñe oro niey waragka peso, kagelu epu waragka peso, kagelu zoy tutelu, piam, kvla waragka peso niey. Nierkey kiñe paxona, pegelvrkefi oro ñi paxona. Weñañkvrkey tvfeysi kvme zomo. Cumgeci pvci mapuce vrke cey tvfa?, pirkey tvfeysi zomo, pvxvn pvlata niey kvzawtuyawi, pirkey tvfeysi kvme zomo. Feymew ayvñmagerkey. Feymew: mvlmvlvtuixokomagkaeliyu kujiaeyu kiñe oro, pi, piam, pvci mapuce. Feymew: ya, pi, piam, tvfeysi kvme zomo. Feymew femi, piam, pvci mapuce, kujiy ñi waragka peso nieci oro. Feymew ka pegeli, piam, ñi oro, zoy kvme oro. Kiñe puh kuzulealiyu kujiaeyu tvfaci oro, pi, piam, pvci mapuce ñi paxona. Ya, pi, piam, tvfaci kvme zomo. Feymew kuzuygu, piam, kiñe puh. Kuzuleygu, cumlay rume, piam, pvci mapuce. Feymew ka abvn mew pegeli kvla waragka peso nielu ñi oro, zoy kvme oro, piam. Paxona, pi, piam, eyimi mew wente mu umañali kujiafeyu tvfaci oro, pifi, piam, tvfeysi kvme zomo pvci mapuce. Ya, pi, piam, tvfeysi kvme zomo. Feymew wente mew umañi, piam. Feyci wvla vñamgey, piam, mvley, piam, ñi paxona mew pvci mapuce. Kureyeañ!, pi, piam, tvfeysi kvme zomo, pigey, piam, pvci mapuce. Fey vrke may, pi, piam, pvci mapuce. Wvne inamapuan, pi, piam, pvci mapuce. Elelaen kiñe seña, gvnewalmi epu xipantu, kvla xipantu, pi, piam, pvci mapuce. Gvnewan, pi, piam, tvfeysi kvme zomo. Xipayan Puelmapu mew, elelaen kiñe seña, pi, piam, pvci mapuce. Ya, pi, pim, tvfeysi kvme zomo. Feymew xipayalu pvci mapuce: Elelen seña pigey, piam tvfeysi kvme zomo. Fey ñi amun!, pi, piam, pvci mapuce. Feymew eli, piam, seña tvfeysi kvme zomo. Eli, piam, ñi kvpam, ñi kamiza, ñi vkvja tvfeysi kvme zomo. Feymew xipay, piam, pvci mapuce Puelmapu. Kvla xipantu eli, piam, seña ñi akutuan pvci mapuce faci mapu. Kvla xipantu awantaymi?, pigey, piam, tvfeysi kvme zomo. Awantan!, pi, piam. Xipalu pvci mapuce, weñañkvy, piam, tvfeysi kvme zomo. Feymew kvla xipantu xipay, piam, pvci mapuce. Fvxa poñwi miawmey, piam, pvci mapuce. Kvla xipantu mew akuy, piam. Feyci antv akutuy, gijantugey, piam, tvfeysi zomo, feysi antv kureyegealu, piam, tvfeysi kvme zomo. Akuy, piam, pvci mapuce. Fendepun kvmelkaley, piam, wesakelu mew. Finu koton niey, piam, pvlata sipuela, caru etipu, xvpuwe pvlata, pugal pvlata, yuntatiazol, pvlata cija niey, piam, pvci mapuce. Akuy, tvfici xawvn mew, kureyewalu mew. Xawvley, piam, kvmeke wenxu. Naqpe!, pigey, piam, pvci mapuce. Kvmeke wenxu mvlemum konpuy, piam, pvci mapuce. Feymew nvxamkan gey. Xvrvmi, piam, koyba pvci mapuce konpulu tvfeysi kvme wenxu mew. Eymi foxay, pigey, piam, pvci mapuce, cew tuwimi, pekelaeyu tvfa mew?, pigey, piam. Niepelayaymi zvgu faci andv nvxamkawayu, pigey, piam, pvci mapuce. Fey vrke may!, pi, piam, pvci mapuce. Cem zvgu mvley tvfa pu foxay?, pi, piam, pvci mapuce. Mvley may kureyewen zvgu, feymew may xawleyiñ tvfa, pi, piam, tvfeysi pu logko. Fey vrke may!, pi, piam, pvci maapuce. Tvfeysi epu kurewen mafvlmafvyefuy, piam, azkintukvnumekey, piam, pvci mapuce. Fey vrke may pu foxay! Cuci am kuregelu tvfa mu?, pi, piam, pvci mapuce. Fey tvfeyi!, pigey, piam, mafvltopiebniefuygu tvfeysi kurewen, piam. Fey vrke foxay egvn!, pi, piam,

pvcí mapuce. lñce may nien zvgun. Tuwtun may Puelmapu. Abvn nvxamnien may, pi, piam, pvcí mapuce. Fey vrke may focvm!, pigeý, piam, pvcí mapuce. Gvxamkaleayĩñ may!, pigeý, piam, pvcí mapuce. Feleay may foxay egvn, pi, piam, pvcí mapuce. Miawken may Puelmapu, gijan may kvla kajku xewa, kiñe may faliy waragka peso, kagelu zoy kvme xewa, epu waragka faliy, kagelu kvla waragka. Feymew kvpaltun ñi pu xewa. Faw pvle inantukucoykepatun. Ina pvle lef xipay may kiñe fvxa coyke. Feymew leykvmmkvnun ñi kiñe xewa waragka falilu, epe zifuy, kiñetu waycvflu, pirkey, pvcí mapuce. Feymew pvcí mapuce wixaxiparkey, nakvmvrkey ñi maleta, yemerkey tvfeyci kvpam. Kiñetu waycvflu tvfeyci coyke vxvfentulenew tvfa, pirkey pvcí mapuce, pegelvrkey ñi kvpam. Feymew lelilewerkey tvfeyci kvme zomo. Kansay may ñi xewa, pirkey pvcí mapuce. Ka leykvmmvn epu waragka falici xewa, pirkey. Epe nvfuy may, pirkey. Kiñeci xani may tvfici coyke, pirkey pvcí mapuce. Vxvfentulenew tvfa, pirkey, pegelvrkey ñi vkvja. Lelilewerkey tvfeyci zomo. Kansay ñi xewa, pirkey, ka lekvmvn kvla waragka falilu. Feymew cocokvlen ñi xewa, pirkey. Coó! Kvla waragka falilu! Coó! Kvla waragka falilu!, pin may ñi xewa, pirkey tvfaci pvcí mapuce. Feymew npuy, pirkey. Nvel tvfeyci coyke vxvfentukvnulenew tvfa, pirkey, pegelvrkey ñi kamisa. Ay foxv! Tvfa ñi fvta! Akutuymi am pvcí mapuce?, pirkey tvfeyci kvme zomo. Wixaxiparkey, mafvlgepurkey pvcí mapuce. Femgeci femyeafuen foxay egvn!, pirkey pvcí mapuce. Feymew kaxvrkey kureyewen. Feymew kureyeturkey vñam pvcí mapuce. Tvfeyci kuregeafulu lelileweturkey. Tvfeyci pu logko lelilewerkey. Femgeci femvrkey pvcí mapuce.

Nvxamkan

Kajfvkura Tontiaw egu

Feymew mvlerkey kiñe logko, Kajfvkura pigey, mvlerkey Jañma mapu mew, feymew weycarkey wigka mew. Feymew xiparkey Puelmapu. Feymu, piam, mvley kiñe logko, Tontiao pigey, piam, ñi kompañ Meliñ pigey, piam. Feymew puwi, piam, may Kajfvkura cew mvleygu tvfeyci epu logko Puelmapuce. Feymew, piam, puwi, piam, Kajfvkura, kvme ka puwi, piam, mew tvfeyci epu logko. Feymew, piam, fey pipuy, piam: kvpan zuamtueyu, mvleyimi pigen mew, kvpan, pipufi tvfeyci logko. Feymew feypi, piam: mvlen may!, pi, piam, iñce may weycakefiñ, mvley pu arkentino, tvfa anvmapuken may, kvmeleayiñ, nielayay weycan, pifi, piam, Kajfvkura. Feymew, piam, feypi Kajfvkura: kvmeleayiñ ka!, pi, piam, may Kajfvkura. Feymew epuwentupuy, piam, niey, piam, xawvn Kajfvkura. Mvxvmgey, piam, Tontiao, kvpay, piam, akuy, piam, xawvn mew. Feymew wvlpay, piam, zvgu Tontiao. Fanten mew akuymi Kajfvkura? Kvmeleayiñ, pigey, piam, Kajfvkura. Feymew, kvmeleayiñ ka, pi, piam, Kajfvkura.

Ka epuwentun mew rakizuami Kajfvkura, utufi weycayafilu Tontiao. Feymew, piam, Tontiao sagkañmaley ñi ruka. Kajfvkura yelfi, piam, kona, pataka kecu mari kona. Feymew, piam, cem rakizuamkvlewey rume Tontiao, gvfgepuy, piam, Tontiao, koralmafemgepuy, piam. Fempuel wixaniey, piam, kiñe kawaju Tontiao. Feymew, piam, mvxvmtupuy Kajfvkura, tufa mi antv!, pigepuy, piam. Feymew Tontiao xipay, piam, ñi ruka mew, xarintukuniey, piam, kiñe espaza. Feymew pvrakawejuy, piam, Tontiao, lef kawaju xipay, piam. Ragi kona Kajfvkura rupay, piam, rvkvvy, piam sagka mew ñi kawaju Tontiao. Wvlelkvteyegey, piam, kvjigelay, piam, pvci rume wenxu, piam, abvy, piam, kvjinoel xipay, piam. Feymew jazkvvy, piam, Kajfvkura, jazkvuy, piam, ñi kona.

Cifmagey, piam, Tontiao, kiñe cif mew rume, piam. Feymew ka cijkvley, piam, kapitan Kvlapag, ñi peñi. Inantukugey, piam, Tontiao, xani, piam, ñi kawaju. Feymew wvlelgepuy, piam, fvn rvgi mew, feymew bagvmgepuy, piam.

Kajfvkura weñagkvvy, piam, jazkvuy, piam, ñi pu kona xipalu Tontiao, kom lagvmayiñ mew Tontiao!, pi, piam, may Kajfvkura. Feymew, piam, kapitan Kvlapag wixatu puwvli Tontiao ñi kawaju. Feymew, piam, Kajfvkura feypifi, piam: cumley focvm Kvlapag?, pifi, piam. Kapitan Kvlapag: Bay!, pipuy, piam. Fey focvm! Fewlajeci Kvlapag mvleyimi, eyimi gen konagetuayimi Kvlapag!, pifi, piam, Kvlapag.

Feymew niey, piam, kiñe reqge, piam, Tontiao. Nvpuy, piam, Kajfvkur. Kagelu kay Meliñ, cew mvley?, pigey, piam, tvfici reqge. Feymew, piam: Mvley kiñe xvlke kawaju, wekun mvley, feymew elkawkvley ga Meliñ, pi, piam, tvfeyci reqge. Feymew amuy, piam, yey, piam, ñi kona Kajfvkura. Feymew nvlanentufempuy, piam, tvfeyci xvlke kawaju. Feymew pegepuy, piam, Meliñ, wixaxipafemi. Feymew wvlelgey, piam, rvgi mew, ka bamgvvmgey, piam, Meliñ. Feywvla wewmapuyiñ!, pi, piam, Kajfvkura. Feymew pu arkentinu wigka werkelfi, piam, pegepuy, piam. Arkentinu, fanten mu ajkvkefin Tontiao wapo pigekey. Feymu kvpan, fanten mew feley, ñi pu arkentinu igkapafiñ, bagvmelpfiñ tañi pu kayñe. Tañi pu arkentinu, kvmeleayiñ, nielayay cem

zvgu rume, kvmeleyiñ, nielayay awkan, pi, piam, Kajfvkura. Feymew mvlepuy, piam, Kajfvkura. Feymew rakizuamgey, piam, tvfeyci arkentinu. Cew xipay, cew kvpay iñ igka?, pi, piam tvfeyci pu arkentinu. Feymew pigeý, piam, Kajfvkura, ramtugey, piam: cew ñi kvpan Kajfvkura? Akuy, piam, Kajfvkura: kvpan Jañma mapu, Kajfvkura pigen. Fentepun ayvgey, piam, Kajfvkura, feymew: Nieaymi sueldo!, pigeý Kajfvkura. Feymew elugey sueldo, ixokom elugey, piam, Kajfvkura, pvlata, takun, iael, ixofil elugey, piam. Feymew felepuy Kajfvkura. Abvn mew bay, piam. Lalu kizulewe ñi epu peñi, ñi pu fotvm. Feymew ñi peñi nierpuy, piam, sueldo.

Kvlapag

Feymew Kvlapag xipapatuy tvfaci mapu, cem no rume niewelay, piam, Kvlapag. Feymew rvxafegey, piam, Kvlapag. Vjca zomo kureyey, piam, Kvlapag. Feymew Re pvlata niey, piam, tvfici zomo. Feymew logko Namunkura kvpay piam, faci mapu, kvpalu. Akuy, piam, inafuel Kvlapag. Feymew mvntukuregepay Kvlapag, kiñe kona mvntukurepaeyew. Feymew jazkvy, piam, Kvlapag, niey epu fotvm, piam, Kvlapag. Feymew werkey, piam, Namunkura mu. Pegepuy, piam, Namunkura. Mvntukuregepan may! Cuci cey? Kizu cey? Kam ñi maje cey?, pigeý, piam, Kvlapag. Feymew cijawi, piam, Kvlapag, amuy, piam, ñi epu fotvm egu. Puwi Kvlapag. Feymew feypigepuy, piam, Namunkura: cem zvgu mew mvntukuremun Namunkura?, pigeý, piam, Namunkura. Kimnielaen am Namunkura? Feley mi peñi yem Kajfvkura, amuyiñ Tontiaw mu, iñce bagvmpun ga!, pi, piam, Kvlapag. Feymew: feley!, pi, piam, Namunkura. Kiñe ina bagvmafilmi tvfeyci kona, bagvmfimi, pigeý, piam, Kvlapag. Feymew wvlgey, piam, bagvmael tvfeyci kona. Feymew feypi, piam, Kvlapag: iñce cem zuamyefiñ tvfeyci kona?, pi, piam, Kvlapag. Ñi kure elgetuan mvten, pi, piam, Kvlapag. Feymew nvtuy, piam, ñi kure Kvlapag.

Kiñe malon

Feymew malon mew konparkey pu mapuce wigka ñi mapu mew, konpalu, faci mapu wvñoparkey kvla mari wenxu. Xipaturkey Puelmapu, xipatulu perkefi epu fentepun kvme wenxu, miawvli, piam, mari kecu kona. Xawigvn tvfeyci pu mapuce yegvn. Feymew mvntuñmagerkey ñi ayja xopija kawaju. Feymew miawvrkey kiñe mapuce wigkazvgulu. Feymew zew mvntuñmael ñi kawaju tvfici epu kvme wenxu: enxakawmu!, pigerkefuy tvfici epu vbmen. Ya, pirkefuygu tvfici vbmen. Kimmapulu pirkelay: femkilge!, pirkefi tvfici epu kvme wenxu. Iñciñ cumayiñ, cew peayiñ ko, cew peayiñ iaqel?, pirkey tvfeyci kimmapulu.

Feymew feyenturkey tvfíci epu kvme wenxu. Feypirkefeyew tvfeyci pu mapuce, kimnierkefeyew tvfeyci pu mapuce. Elelen mi kawēju, mi wesakelu, pigerkefuy. Feymew pirkelay: tvfa eluayu!, nvtunierkey ñi xalka. Feymew siwalturkey tvfíci pu mapuce, pvci abvn mew kontugerkey, weycarkeygvn, kom apvmgerkey, barkey tvfeyci epu kvme wenxu yem. Kiñe mapuce kom nvturkey tvfeyci pvlata, kake mapuce zuamvrkelay.

Feymew kimlu arkentinu kofierno werkekey Santiaw mew. Bagvmvñmagen ñi epu fentepun kvmeke wenxu, pirkefuy, feymew eluaenew tvfíci pu mapuce ñi wehvy, pigerkefuy. Pirkelay: vxvfel may ta gvnečen ta tvfey! Cum femlayafuy tvfeyci pu mapuce pelu ñi kayñe?, pin yelgeturkey arkentinu kofierno.

Feymew tvfíci mapuce nielu pvlata kiñe cijkatufe mew majvfalvrkey ñi pvlata. Rakirkey, pura waragka puwvlvrkefuy ñi rakiñ. Feymew kake pvlata kimvrkelafi cumten ke nien. Feymew ejkakvnurkey ñi pvlata epu foteja mu. Petu ejkakey tvfa tvfeyci pvlata Lowan bafkeh Puelmapu.

Kiñe weycan Kajfvkura yem

Fvta kuyfi weycan Kajfvkura yem. Amurkey Forowe mapu weycamealu. Yerkey fvta kamañ kona.

Feymew puwvrkey Forowe mew, nalpurkey, wewpurkey, kawtifapurkey pu zomo, fvta kamañ pvcike kampu kawtifapurkey.

Feymew anvmpurkey Forowe mew inaltu kiñe mawiza mew. Nvpurkey kujin, pvlata ixokom. Feymew: ilotuyiñ tvfa mew!, pirkey Kajfvkura.

Feymew petu ilotulu xipaparkey tvfeyci pvci mawiza mew kiñe wekufe wenxu, fvta karvgerkey, wirarvklen ruparkey pvci mapu cew tenkvlenmun Kajfvkura. Kvme eluge, Kajfvkura! Mvcaý pvci nalayu, Kajfvkura! Iñce Xipaygam pigen. Kvme elugen Kajfvkura!, pirkey Xipaygam. Feymew Kajfvkura zuamkvlerkelay. Kajfvkura ñi pu kona mekey, piam, ñi ilowakan. Feymew pvci abvn mew, cew ñi xipapamum Xipaygam, xipay, piam, fvta mewben, vnkvkvpay, piam, Kajfvkura mew. Pu Forowe ce inalepay, piam, tvfeyci mewben mew.

Feymew pepaeyew mewben, piam, Kajfvkura. Fvlvniey, piam, ñi cija, Kajfvkura ñi pu kona.

Kizu Kajfvkura wixanelniey, piam, ñi kawēju, kiñe kapitan mapuce fey, piam, nvn niey.

Feymew pepaeyew, piam, tvfeyci mewben, kom ñi rvgi, cija, wixantukuwe wenu pvravnñmaeyew, piam, tvfeyci mewben. Kizu Kajfvkura pvrakawejuy, piam, jaqentu ñi pu kona pvrakawejuy, piam.

Feymew montuy, piam, Kajfvkura, ñi pu kawtifa kom mvntuñmagetuy, piam. Ñi pu kona welu kawtifañmagetuy, piam, Kajfvkura.

Feymew akutuy ñi mapu mew. Feymew jvkawey, piam, Kajfvkura weycayalu. Kiñe ina amuan Puelmapu, pi, piam, Kajfvkura, mvte newengerkey Forowe mapu, kiñe ina weycawelayafiñ, pi, piam, Kajfvkura. Feymew amurkey, puwvrkey Puelmapu Totiaw mew.

Gvxamkan Añiwal

Feymew tutuyyu Kurakaqtn, kvpaletulu rvpv mew iñciw gvksamkaenew. Feymew Añiwal pi: kuyfi Puelmapu weycamen, pi, kontuwariameyiñ. Feymew kvlageyiñ, ñamyiñ, pi, kake pu kona kvpaturkey ñi mapu mew, pi. Kvlayewlu iñciñ, peyiñmew wigka, pi. Feyci may epe wiwvnlafun, meli kom antv pvtokolan, pi.

Feymew bafun, pi. Kvlayawlu peyiñmew wigka, kizu inantukucoykepelu iñce, peenew wigka, pi. Feymew xalkatugepan, kvjiñmagey ñi kawaju. Epu mari wigka cey, kam zoy cey, pi. Feymew kom miawvlen ñi fuwvn rvgi, feymew lef kontukvtzeyefiñ, feymew wvzankvtzeyefiñ egvn.

Feymew pepaenew ñi epu wehvy Kayumil egu Mijaman. Feymew kontupaenew kiñe wenxu, kagelu wirarvkvlen rupay. Feymew epu yewiyu mvten, mekeyu weycan.

Feymew abv pvrpay antv, bay ñi wehvy em. Feymew fentepun kanzan wixalewen, wixalelu iñce feymew kvme kvjikvjitugen. Zew puwlu antv pin.

Feymew wixakvnupun kiñe fvta kura mew, feymew kvjigelan. Afelgen, afelel iñce, feymew kanzatun, kvme kanzatulu iñce, ka lef kontufiñ tvfeyci wigka. Zewan bayalu iñce!, pin.

Feymew cvgarvpefiñ kiñe wigka, feymew pu puñpuya rulmen, feymew nrvvgigen. Feymew wixanentufun em ñi rvgi, feymew waxoy inapvle ñi kuwv. Feymew rvpukvtzeyegen espaza mew, wezon feymu kimwelan.

Feymew lefxiapan wvla wixanentun ñi leqkay. Feymew inantukugen, epu wigka inantukuenew, feymew leqkay mu mvten montuluwkvlen, feymew kiñe logko kvjifiñ. Feymew vxvfnaqi ñi kawaju mew, feymew mvntun kawaju, pvrakawejun, amun lemu mew, puwvn lemu mew. Puwlu lemu mew iñce ejkawpun.

Feymew fele pukem re mojfvgen. Abvn mew xipatun. Reqlle kom antv kvpatun, akutun ñi mapu mew. Re kumxi ilo mew mogen. Feymew akutun ñi mapu mew iñce gvmajegen.

Feymew mojiapatun ñi mapu mew, mojiilenew ñi pu wehvy. Ñi maje peñi, ñi maje enew, ba mvten may, pigerken ñi mapu mew, pi gvksamkan Añiwal pigeci wenxu.

Vlkantun Añiwal

Mojilu, mojiपालु

mojilu vlkatuy

vlkantuy feypi:

Kuyfi wece wenxugen

kontuwariameyiñ

Manuelio mapu mew

kvlayewiñ ñamyiñ

inaenew fvtake wigka.

Bafxa fvlanko nien

fey epe zineenew may

gvyantukupuweenew bewfv mew

xvlankvnulelfiñ kawaju

lef holpaenew bewfv mew

pvcí lafxa vlanko.
Faw pvle pa xvrvmkonalpafiñ
fvtake wigka.
Pvcí abvn mew mvten
kazi cvgarvmekefiñ
fvtake ga wigka yem.
Feymew ñua iñce piken.
Fanten mew cem wesa kona rume
ijamtukvtuenew
cegewetulan!

Kiñe Weycan Wencupag

Feymew naburkey epu mvhawen. Feymew Wiñcupag xipaturkey, puwtuy Wvñfali, puwtulu.
Zew yafkawigu ñi mvna yegu, pirkey Kuancu.
Feymew malogey Wencupag, nvñmagey ñi kujin, ñi yaj ixokom nvñmagey, kizu
kecantukvnugey ñi ruka mew. Feymew werkvrkey ñi maje mew: ñi maje, iñce azvmkelan zvgu,
pirkey. Ñi fotvm pile, feymew amuan, pirkey. Feymew ka werkvlvrkefi kiñe kona: fele ñi mvna,
fvreneecimew, kejuaenew nabvn mew pirkefi ñi mvna. Feyvrke may, pirkey Kaxvñ, wvle
puliwen puwan, pirkey Kaxvñ.
Mvlerkey kiñe logko mew, nierkey maje, pu peñi, fvca kamañ. Kom feypirkey ñi pu peñi ka ñi
maje. Feymew wvh pvle amurkey, puwvrkey Wvñfali.
Feymew kizu epu kona yegu pepurkefi Kuancu. Cem zvgu mew maloñmaken ñi mvna,
pipurkefi Kuancu. Feymew kvpan, kvme elultuaen kujin ñi mvna, pipurkefi Kuancu. Pilan,
pirkey. Matuke xvrvmuwmvn!, pirkefi ñi pu kona. Feymew mvcaý mvten xawurkey tvfici pu
kona, wvvlgepurkey Kaxvñ. Feymew jazkvrkey, kiñe kona werkvrkefi yemealu kona. Mvcaý
mvten yemerkey. Feymew weycarkeygvn, kom mvntuñmageturkey ñi kujin Kuancu. Feymew
ajfvlkvteyegerkey.
Feymew petuy ñi kujin Wencupag ñi mapu ka ñi ruka kom petuy.

Nvxamkan Mariñamko

Feymew fentepun wwzañmagerkefuy. Kiñe fvca wenxu puwvrkey. Kvpan, caw Mariñamko,
pipurkey, ayvn may kiñe vjca zomo, pipurkey tvfici fvca. Feymew: cuci zomo?, pirkey
Mariñamko. Fey may, pirkey tvfici fvca wenxu. Feymew we pirkey Mariñamco: kvpape tvfici
zomo!, pigerkey tvfici zomo. Feymew kvparkey, kvpalu, akuy, piam. Feymew zvguleyew
Mariñamko: tvfa, tvfaci fvca wenxu kureyeaeymew. Pinolmi kaxvñmaeyew mi logko, pigerkey
tvfici vjca zomo. Cumten mu elay ñi mogeam tvfaxi fvca wenxu?, pigerkey tvfeyci zomo.
Ka abvn mew kvparkey kiñe kuse bafvtalu. Feymew: kvpan may, caw Mariñamko, pigeparkey.
Feyvrke, pirkey Mariñamko. Cem zvgu, papay?, pirkey Mariñamko. Kvpan may bafvtan may,
kizuyawi may kujin, piparkey tvfici kuse. Feymew kiñe wece wenxu ayvn ñi fvtayeyael, pirkey

tvfici kuse. Feymew mvxvmfalgerkey tvfeyci wece wenxu. Feymew kvpay, piam, akuy, piam, Mariñamko mew, akulu. Tvfaci kuse ayvfiñ fvtayeafiel, pigerkey. Kureyeafimi. Cumtetulayay ñi mogen tvfaci wesa kuse, pirkefi tvfeyci wece wenxu. Feymew: pilan!, pi, piam, tvfici wece wenxu. Kureyenofilmi tvfaci kuse bagvmaeyu, pirkefi tvfeyci wece wenxu. Feymew kureyerkey tvfeyci kuse. Femgeci weza piwke nierkefuy em Mariñamko.

Vlkantun Mariñamko

Feymew kiñe logko mvlerkey

Mariñamko pigei.

Vlkaturkey:

Iñce Mariñamko pirkey

gacarin Fayukura mawiza mew

elgen pirkey

gacarin Fayukura mawiza mew

elgey Mariñamko kvla piwkegen.

Kiñe piwke bayafule

epu piwke mogeleay pirkey Mariñamko.

Feymew marici kuñilcerkelafuy

feymew kizu ñi kapitan bagvmturkeeyew

feymew balu wicafvgerkey

nentuñmagerkey ñi kvla piwke

feymew bay Mariñamko yem!

Nvxamkan Xewalpeye

Feymew amurkey Xawmaxuli mapu, puwvrkey Xawmaxuli mapu mew. Kiñe ñi fotvm bay,

piam. Feymew gymantupuy, piam: tvfa mew bay ñi kuñifal fotvm. Bagvmvlaenew rume

wezake wigka? Iñce mew welu xanmawgey ñi espada wezake wigka. Bagvmtulay rume ñi

kvme kayñe, wezake wigka!, fey pipuy, piam, Xewalpeye Xawmaxulu mapu mew.

Feymew: Tvyce cem cey, epu fotvm? Wigka cey?, pifi, piam, ñi epu fotvm. Iñce wvneci,

apuwen, epu fotvm, iñ kayñe cey, wigka cey. Wigkagele wvñomefvrvknulelan. Nvlfe iñce ñi

rvse kawaju, kure ahay fotvm, pirkey Xewalpeye yem. Feymew wvnerkey, perkefi

gvnetuyekvpaci luan. Feymew wvñokvnufemi, piam: luan vrke!

Epu fotvm, mi ragin mew amuay, iñciñ afkazi mew amuayiñ, pirkey Xewalpeye. Elurkefi leqkay

ñi pvñmo, feymew ragi luan konfempuy, piam, tvfeyci zomo. Ragin luan vxvftukukvnufemi,

piam, luan, tvfeyci zomo. Epuñpvle xipay, piam, tvfeyci luan. Xewalpeye yem epu nvy, piam,

ka ñi epu fotvm kiñe nvygu luan, piam. Feymew mvlepuy, piam, Xawmaxuli mapu mew

Xewalpeye yem.

Vlkantun Xewalpeye

Banturkey Xewalpeye

bantulu nierkey epu fotvm

kiñe kuregerkey

kagelu kuregerkelay.

Feymew gvmay vlkatrkey:

amuayin Xawmaxuli mapu

kiñe ina awkancegeayin

yeyaymi kure ahay fotvm!

Kiñe ina Xawmaxuli mapu mew

bapualin, bapuayin!

Pirkey Xewalpeye yem.

Vlkantun

Vlkantun kiñe zomo

Fvtagelu tvfeyci zomo yemerkeyew kiñe wenxu fvxa ka mapu, puwvlgerkey Wvñfali mew, puwlu vlkatrkey. Feymew feypirkey ñi vlkantun:

kvpan fvxa ka mapu

kajfvkajfvy mapu

rupan re gvman mew

re kvjeñu mew

kvpan, pirkey tvfici zomo

fvxa ka mapu

elkvnun kvmeke wehvy yem!

Vlkantun kiñe wenxu

Puwvrkey ka mapu:

Kvpan, pirkey

fvxa ka mapu

kvpan, pirkey

lamgen, pirkey

kureyewayu

lamgen, pirkey

wixalepay

lawxa katiaw kawaju

amualiyu amuayu

lamgen, pirkey tvfeyci kawcu

Vlkantun

Feymew mvlerkey kiñe xawvn, akurkey kiñe kawcu. Feymew: gojin, pirkey. Gojilu vlkanturkey:

Akun lamgen, pirkey

tuwvn wigkvl rvganko, pirkey

eymi mi piwke mew kvpan, pirkey

pilun arufi ñi kawaju

akun, pirkey

eymi mi piwke mu, pirkey

wixalepay pvcı tapayu kuri

cew rume amualiyu amuayu, pirkey

Vlkantun gojiwma

Gojin lamgen
kureyewafuliyu
kureyewafuyu lamgen
fentepun ayveyu ahay
kureyewayu ahay
iñce mu cumgeaymi kay
ka antv wvla ahay
gvneafiyu ahay
feyjikaci kureyewayu
ahay lamgen

Vlkantun

Feymew nierkey kiñe vñam, tvfaci wenxu vlkatuturkey gojilu:
Iñce gojin, pirkey
wvzayayu may papay, pirkey
eymi kvme pvñvñ
iñce kay kvme wenxu, pirkey
wenxugeli may iñce
wvzaci ahay, piafun

Vlkantun Rankvlantu

Feymew kiñe bantu mvlerkey, fvtageturkey, kiñe wece wenxu perkefi, gojirkeygvn. Feymew vlkatuturkey tvfeyci bantu zomo:
Mvntuyaen koñi
zoy cumten kujin
mvlelay iñce ñi piwke mew
mvley epu mvr tolto estipu
mvley meli kurais kawaju
epu jocokon
ka epu kafesatu
ka mari puruwa kujin
ka mari epu tapayu kawaju
mvtuyaen koñi
kvme wenxu no amta eyimí?
Pirkefi tvfeyci wece wenxu tvfeyci bantu.

Vlkantun bantu zomo

Feymew barkey ñi fvta kiñe omo, fentepun weñagkvrkey, xipay, piam, ka mapu, inaltu karv
lafken miawpukey, gvmay, vlkatuy, piam:

Vy!Vy! Awvgetujan ga ñi fvtagenwen foxv!

Vy!Vy! Batuy ga ñi kuñifaj fvta yem foxv!

Xekayawvn ga inaltu karv lafken

Cem mew mvgel ga ñi fente gvman cey?

Tvyeci kolekay xarilelu mew

ga ñi fente gvmarkeyael em foxv!

Piyawvn ga inaltu karv lafken

Wag!Wag! Pikey ga tvfici xewa

mvleperkey ama ga xewa? Piken may ga

Xekayawvn inaltu karv lafken

Pvci abvn mew xipapay epu wece wenxu,

mija topel kawejugey,

mija kvlen kawejugey.

Vy!Vy! Marimari papay! Pienew ga.

Tvfeyci epu wece wenxu:

Cumael ga miawimi tvfa mew?,

pipaenew may ga tvfeyci epu wece wenxu.

Nvfel mew awkan xewa? Pipaenew may ga,

tvfeyci epu wece wenxu

feymew magkazvrpaenew

inafvl ñi ruka mew elkvnapatuenew

Vlkantun Nawelcew

(**Kuramalal mapu mew mvley, piam, kiñe renv puwlu ñvwagewey pu ce)

Peñi ka ahay, peñi ci ka ahay,

amuyu Kuramalal mapu

nentumeyayu vkv puerta

feymew feymew ñvwagewealu

peñi ci ka ahay

nentumeliyu vkv puerta

feymew ñvwageayu

peñi ci ka ahay

Nalfe

Kiñe gojiwma vlkatuturkey:

kvpan, pirkey,

gojiael

tayi wvla femgelu calirpan

kapitan Montoya mew

ñi gojiael

cem kvme wenxu rume

piale piay

nalaliyu nalayu

Mvley pvci pikaso fakon!, pirkey tvfeyci mojiwma mapuce

Vlkantu kuyano

Kiñe kuyano feypigey, Kajfiaw pigey, amurkey ñi pabv mew, ñi kacv mew gojipurkey, kizu yerkey pvlkv ñi pabv mew. Feymew vlkatuturkey:

kvpan, pirkey,

gojiaymi may gijañ, pirkefi ñi gijañ kacv

Feymew feypirkey:

kvpauleyu pvlkv, pirkey

gojiaymi kacv, pabv, pirkefi may,

vlkatuturkey, gojirkey:

iñce wenxu, pirkey

wimakafin kapitan, komanzante, pirkey

kvpan cem pinoalu iñce

kiñe etipu, kiñe kawaju gijatuan pilan

kuyfi wece wexugen

kure wimekefin

pu vlmen, caw, pimekefenew

eymike ta ñvwa Kalfiaw, pimekefenew

mvleyi wecen

mvley pu logko eyi!, pimekefenew

kuyfi ñi ñvwagen mew

fanten mew inarumeufisawe xokienew ñi mapu

kuyfi xawvn mew kvmeke pvñvwen

fanten mew xewa xokipuweenew ñi mapuce

Vlkantun logko Mariwal

Feymew feypirkey:

gojin, pirkey
iñce Mariwal
weycay pigey Mariwal
bay pigey Mariwal
cew bayafuy Mariwal?
Nieetew gvnecen Mariwal
kalku tvfa pigey Mariwal
bagvmkalkuy Mariwal
bagvmi ñuke nielu
caw nielu, lamgen nielu
xewa Mariwal pigen
banoalu cey xewa pigen
malogey Mariwal
ayvfuy Mariwal
ka malotuy Mariwal kay
zoy petuy kujin
ka weycay Mariwal
bay pigey Mariwal
ayvfuy pu kuse, pu fvca
cew bayafuy Mariwal
nielu kvme peñi, kvme maje
epu pataka kecu mari kay
mvten ñi kona Mariwal
kvla pataka ya elmew, kvla pataka kay

Vlkantun Lifonso

Inageyu Kuramalal mapu
yu peñiwengen
ina xalkatuweyumew
fvxake wigka
kvjiñmagey kiñe fala mew
kweju ñi kuñifaj peñi
feymew elelwentejikawejufin
nvnief ñi rvgi
feymew rvxetu kvnuy
ñi rvgi mew
feymew pvrakawejufemi
ñi kuñifaj ñi peñi
feymew kvpayu rukukon
agkaz xipamekeyu cija

fvxa mala karv kawaju nieyu
feymew montulfun kuñifaj peñiwen
feymew akutuyu mapu mew
ka mvley weycan Jañma mapu pigen
ayvwiyu feymew amuyu
feyci wvla piwke kvjiñmagey
ñi kuñifaj peñi yem

Vlkantun pvrana

Kajfvkura yemkureyeñmarkeeyew ñi ñuke Pvrana, feymew Pvrana weñagkvrkey, ramturkey
ñi weku, cew mvley ñi weku kay? Feymew vlkatrkey:
cew am kay ta mvley
tañi kvmeke weku papay?, pifi ñi kuñifaj ñuke
pofogekaymi am Pvrana?, pimeketuenew ñi kuñifaj ñuke
Moro mapu mew mvlefuy
tami kvmeke weku Pvrana
pimeketuenew kuñifaj ñuke yem
mvlen mew awkan
wente ji kawej nien,
pimeketuenew kuñifaj ñuke yem

Vlkantun Puelmapu

Feymew miawken naq pvle mapu ñi paxon, feymu ajkvtun tvfaci vlkantun:
kuregerkey kiñe wenxu
mvley kiñe ruka mu
papay ka papay
ayvli papay
gvnewafuymi epu xipantu
iñce may papay
amualu Puelmapu
gvnewkafulmi papay
ayvkafeli gvnewafuymi papay
kiñe kecu xipantu papay
gvnewnoalmi papay
iñce cemafeyu kay?
Eymi vjca zomo
iñce wece wenxu kay

Vikantun Samuel Kvpuwe

Mojilu vikatuy:

Eluen tami ruka papay
eluen tami ruka papay
cumten faliy mi ruka papay?
Eluaeyu pataka peso
eluen mi ruka papay
vyvmtukuyael
eñumtuam tañi pu kona!
Eluen ka papay
eluen tami ruka
tvfa pataka peso papay

Vikantun Fartolo

Vikaturkey Fartolo pigeci wenxu, ajkvtnmakefin may iñce fa piy:

re ufisa ra re ufisa bagvmvrken ñi jaja
re sañwe bagvmvrken ñi cezkvy
re awka re awka ta bagvmvrken ñi gijañ
re kumxi nvfalkefin ñi kvrvn ilotuyael

Ina kuzun

Feymew kiñe mapuce amurkey ina kuzualu, fvxa kamañma wvzarkey ñi pu kona. Feymew puwvrkey, puwlu werkvpurkey ñi caw, yelgemerkey ñi pu wehvy. Akulkey, akulgerkey pulku. Feymew puturkey. Puhmarkey, puhmalu ina kuzukey. Puwvrkey tvfeyci fvta pvram. Kuzupaci kay lamgen, pirkey. Pilan, pigerkey. Kureyewjeayu may, pirkey. Pilan, pigerkey. Kuzukonpukarkey. Cew mvlekeymi?, pigerkey. Tvyew mvlen, pirkey. Cuci mew?, pigerkey. Tvyew kiñe kafajeru mew, pirkey. Amutuayu ahay lamgen, pirkey, fentepun kvmelkalen, pirkey. Ka mapu mvleyi, pigerkey, iñce kimnoel ci ce mew puwafun kay, pirkey ti zomo. Akukatuaymi, pigerkey tvfici wenxu, akutulmi, feymew kureyewayu. Vñamyewiyu waj may, pirkey tvfici wenxu. Pilan, pirkey ti zomo. Akutulmi wvla feyci wvla kureyefemwayu, pirkey tvfici zomo. Welu fvtagelaymi ka wenxu kureyelayaeymew?, pigerkey tvfici zomo. Fvtagelan, pirkey. Iñce am kay kvme wenxu no?, pirkey tvfici wenxu. Fentepun ayveyu ahay lamgen, rvf kureyewayu mvten, pigerkey tvfici zomo. Fey vrke may, pirkey tvfici zomo. Feymew epe wvh wvla xipaturkey tvfici wenxu. Feymew pepaturkey ñi pu wehvy. Cewpeymi ahay? Kiñe puh kintufuyiñ pigerkey tvfici wenxu. Ina kuzupefun, pirkey, jazkvtnenew fvta pvra, pirkey. Cem mew jazkvteymew? Kvme wenxu no eyi am?, pigerkey tvfeyci wenxu.

Vlkantun Kurice

Miawken wentelu San Kuan mew, ajkvtumen wentelu ñi paxon ñi mapu mew, feymew
ajkvmen tvfaci vlkantu:

Zvguyegeliyu tvfaci mapu mew
amukatuayu Pueltu mapu
ñaña ka ahay ñaña
ixokom mapu kvmey mvlen mu
Faci mapu zvguyegeyu
eja pewle amukatuayu Pueltu mapu
Fvxa kuyfi kvzawtufuyu faci mapu
nielayu cegekan
kiñe ina xipayayu
ka mapu mew
cegealiyu ceyeayu
cegenoaliyu cegenoyu
ñaña ka ahay ñaña

Vlkantun maci

Weñce leqpajege may
wekufe weñce leqpajege
inagen meli kuze kvxal mew
inagen meliel kona mew
piputuaymi tami ruka leflejege may
inaenew feyci maci piputuaymi
cumael konpaymi pu kuñifaj mew?
Konmutuaymi kvmeke ce mew!
Xipatujege may wekufe
iñce elenew gvnecen
ragin wenukay pvtumekey
kalkiyu toro
feyci weza maci nentupatuenuw
piputuaymi ñuke mew, caw mew

Pvci gvksamkan

Gvksamkan ñuwvñgen

Feymew gvksamkayaeyu tvfa ahay, cumleken ñuwvñgen pu mapuce. Agkvyem tukun, feymew nielu kacija, kawēja wicacekey, wicakefi pu zomo sucealu. Xapvmkey pu zomo, sucekey, zewmakey kiñe antv wej epu antv mew. Pvciken tukukelu am pu mapuce kuyfi, fanden mew may abvke tukuketuy pu mapuce. Zewmayem ñi kexan egvn sucen mew, feymew yekey kvlko mew lila mu, puwvlkey pu zomo. Wenxu konkelay kiñe no rume. Re pu zomo mvten pvramkey kexan. Rupan suceygvn, feymew ka wicacekey ñuwvñalu tvfici pu zomo. Feymew zewmay muzaygvn. Wicafi vjcake zomo, wece wenxu. Pu xafvya konkey ñuwvñgen, puh ñuwvñgey– Gvxarewi, gvzarecagewi vjca zomo yegu, wece wenxu, vlkantuy mafvluwigu. Feymew afvygvn ñuwvñgen, anvnaqigvn elelniel xvlke ñi anvam tvfeyci pu ñuwvñfe. Elugey muzay, kore. Feymew nvxamkay kiñe ce, kakelu ajkvtuley. Rupan iygvn, feymew umaqtuy fvake pvra, fey ina kuzukey weceke wenxu. Femkey may pu mapuce.

Vlkantun:

Amuleyu cacan

kvme amuleyu cacan

muxurkilge cacan

tvfey muxug cacan

kvme amulege cacan

amuamuleyu lamgen

kvme amuleyu

cew kasalmi

jawe elisaeyu, lamgen

Rvxikura

Tvfaci kura mvley inaltu rvpv, inaltu ka kiñe mawiza, rvpv xipalu Kurakaqtvn, amulu Logkimay mew. Tvfeyci kura fvxañma yugelu wecuñ mew pvci rume, mapu mew abv rupay, mvley pvcike lolololoy, feymew elgekeel fij. Kvla age wifkvley, epu eskina fentepun norkvley, tafla vrke mvley. Rumealu ce gijaturpukey tvfeyci kura mew. Elvrpukey fij, niey pvlata elkey mari sentaw, cawca, nielay elvrpukey pvxem, nielay pvxem elvrpukey mvrke. Cem rume yenielay, waxonturpukey cagi mamvj, fey elvrpukey. Marici re rumekeelay, re rumele weza yawafuy, waxoafi ñi kawēju, kizu ajfvajfvy. Femnole ñam kawēju, foxakonafi ñi kawēju, pvci mapu Rvxikura mvley kiñe foxako. Gijaturpunolu, fey tvfeyci foxa ko mew foxakonkey. Marici re rumekeelay tvfeyci kura mew. Fvxa gvneceen mvlelu am tvfeyci kura mew, feymew kvme gijatugekey. Ka tvfeyci mawiza mew, mvley kiñe cukaw. Feymu gijtugekey: Caw Rvxikura

amualu Arkentino mew iñce! Kvmeyawan, ajfvelkawejulayan! Kvmeyawpe ñi focvm, piaen caw! Cem no rume nielayay ñi cumvn caw Rvxikura! Faci antv calirpapeeyu may caw Rvxikura! Ixokom zvgu kimnieymi caw Rexikura! Cukaw feleyi! Kvmeyawael ñi kvmeyawnoael, piaqen faci antv cukaw! Feymew wezayawael mew: xo! Xoxo! Xoxo!, pikey tvfeyci cukaw.

Kvmeyawael mew: cvsil!, pikey tvfeyci cukaw.

Gijatugekey iael, kvpay yemerkey ce gijatugekey: caw Rvxikura! Kuñifaj iñce eluen pvci iael caw! Kvpa pvxemtuy ce, gijatugekey ka: pvci eluen pvxem caw Rvxikura!, pikey nienolu pvxem. Re nentufemvñmagey fij, feymew jazkvy gvnece. Feymew cumkey rume ce elnolu cem rume, kvnxolkawejukey wezayawwekey. Femkey pu mapuce. Rupay arkentinu, elvrpuy ñi mari sentaw, ñi cawca, elvrpay cem rume. Rupay wigka, eliy fij. Femnien fvxa kuyfi am, fvake ce yem femkemum, feymu femkey felerpuy.

Kiñe hampvikan Liwkura

Gvxamkayaeyu ahay, amukeyiñ Liwkura kvla yewiyiñ. Iñce may wvne konvn Kurakaqtn. Mvlepuken. Abvn mew puwi ñi weku Ordike, fey yerpunenew. Amuyiñ Liwkura. Kujin niepukey ñi weku, feymew amukeyiñ. Umañpuyiñ Fvxalelfvn pigeci mapu mew. Ka wvh pvle amuyiñ. Rumeyiñ Rvxikura gijatupuyiñ: caw Rvxikura! Fvrenemoayiñ! Kvmeyawpe ñi focvm, piaymi Rvxikura. Cumlayayiñ may caw Rvxikura!, pirpuyiñ gijatun. Elvrpuyiñ mvrke, gvjiw, pvxem, feymu rumeyiñ. Puwiyiñ Logkimay, umañpuyiñ. Ka wvh pvle amuyiñ. Puwiyiñ Liwkura, Romaltu Palma mew. Feymew ilotupuyiñ. Feymew kvlawentupuyiñ, ramtuputuy kujin ñi weku feyci wenxu amediagekey. Feymew elutueyiñmew iñ kujin, kage pvle elkvnumetuy ñi kujin ñi weku amedia. Ka antv mew amuyu weku iñciw pewtuwe kura mew. Puwiyu. Tvfaci kura rumeyem pu mapuce wixañpvramvrpukerkey pewtukemum. Feymew wixañpvrameyew kay. Iñce meli rupaci pvramvn, ñi weku kvla rupaci pvrami. Tvfaci kura mew kimkerkey pu mapuce cumteñma mogeayael. Feymew femmefiyu tvfeyci kura kay. Meli rupaci pvramlu abvñma mogekerkey, kvla rupaci pvramlu zoy pvcñma mogekerkey.

Tvfaci kura pigey pewtuwe kura, kajfvy, mogkolkvley, pvcikafuy welu fendepun faney. Feymew wixañpvramniealu iñciw kvpatuyu Liwkura mew. Kvnumey ka niekey kawaju ñi weku, fey yemetuy ka, kvpatulu iñciñ. Ilo kvpatuyiñ. Faw pvle gijpay ufisa ñi weku kiñe arkentino mew. Meli kawaju mew elugey kvla mari puruwa ufisa, ka mari kapvra. Feymew kvpayiñ Logkimay, akutulu iñciñ mawvhmayiñ. Feymew epuwentupatuyiñ. Zipatueyiñmew kvla wenxu.

Amurkeafulu Puel mapu, wvñomerkey Alomni, mvley weycan pigen me wvñomerturkeygvn.

Fey iñciñ kvpatuyiñ, pu liwen konpayiñ wayzvfwe mew. Kiñe kom antv mew akuyiñ Malalkawaju. Feymew ñamvmpayiñ kvla ufisa, puh akuyiñ iñciñ. Feymew ilopayiñ kiñe ufisa, ilopatuyiñ. Feymew epuwentupayiñ ka kvpayiñ, rupatupuyiñ Rvxikura ka. Elvrpatuyiñ ilo, gvjiw. Feymew gijatupayiñ ka. Caw Rvxikura! Kvme puwtupe ñi focvm, piaymi may Rvxikura?, pirpatuyiñ. Faw pvle xawvyiñ fenxen arkentino iñciñ, kontualu Arkentina mew. Wvñopalu faci mapu gijatuputuygvn kay Rvxikura. Elvrputuy fela, pvlata, rvgalkvnuyerpuvgvn. Feymew rupayiñ, kvpayiñ, akuyiñ “Wezagey mapu” mew (ñi rvf vytugen mew: Pvrokalcawe**)

pvcilefuy antv. Feymew umañpayiñ, igvjiwpayiñ. Ka antv mew kvpatuyiñ, akutuyiñ Fvxalelfvn mew. Feymew ka umañpayiñ. Feymu ka kiñe ilopayiñ ufisa. Ka wvh pvle kvpayiñ. Pvcí pvrpay antv akuyiñ Kurakaqtn. Feymew putupay ñi weku epu lixo murxu. Feymew rupayiñ, ka kiñe foteja pvlku kvpali, putuyekvpayiñ. Gojiyiñ, akuyiñ Kojiwanki. Feymew putupayiñ ka, feymew gojiyiñ kiñe wenxu, gojilelu kvpaltuy ufisa kizu. Epu yewiyu weku iñciw ina naqeyew. Pvcí abvn mew kvpayu, umawkvleweyeparkey tvfici keca kvpalu ufisa. Akuyu iñciw, nentucijawpayu, umawtupayu. Epe wvh xepeyiñ, xipaparkey kvyen, feymew rakipayiñ ufisa, gerkelay mari kvla. Ka wenxu ñamvmi epu mari peso, ka kiñe ba kapvra. Feymew feyci puh mvten kintufuyiñ ufisa, pelayiñ. Wvh pvle kom antv kintufuyiñ, ramtufuyiñ wigka mew, pelayiñ, pigeyiñ. Ka umañayiñ. Feyci puh wvla rontayiñ. Iñce wvne rontan, ka wenxu ragi puh koni rontayalu. Feyci wenxu wvnmnmentuy. Feyci puh rontayiñ, kiñe ixo puh mawvhi, ka pu liwen mawvhi. Feymew kvpatuyiñ. Iñce ina naqvn, Kurice mu umañpatun. Ka pu liwen amun Kojiwanki ramtumeam ufisa. Kom antv mawvhman. Pemelan ufisa. Feymew kvpatun. Puwtun Pvrkenko ñi weku mew. Feymew epuwentumen kvpatun Santa Rosa mew mapu Fitor Ciapa ñi paxon mew.

Amuy Kajfvn Wvñfali

Amuken Wvñfali. Nentunpapilen paxon Fito Ciapa mew, nentulu papil iñce feymew amun. Puwvn fvxake pvra mu. Petu mojrkey ce puwvn. Puwlu iñce jaqenew kiñe ñi wehvy. Feymew putupun, mojiyun, mojilu iñce umañvn. Ka antv mew puwvy Waykil ñi kompañ, feymew ka mojiyuy kay. Mojilu feymew felen. Ka antv mew mojilekay ñi kompañ. Feymew amun wvla kizu. Giyulfalewen ñi cale mew. Elgemen Kojiwanki, elmael iñce feymew gijaiaelpun Kojiwanki. Feymew rupan ilu iñce amun namuntu. Abvlewen antv puwvn Kurakaqtn mew. Feymew fentepun wvywvn, pvtokofun ko, rupan wvywvln. Feymew kiñe limeta cincifi, ka ragin lixo murto gijan. Feymew rupan wvywvn wvla. Feymew ka koretun rupan. Koretulu iñce, kvpan soelekaw mew pegelpan ñi papil yenieel. Kimvñmagelan. Feymew wvñopan. Wvñopalu iñce puwtun ñi peñi mew, home Jiqlewfv. Feymew umañpun. Ka antv mew amun Wvñfali. Home Jiqbewfv mvley may tvfici mayordomo. Feymew puwvn tvfeyci ruka mew, ramtupufin tvfeyci mayordomo. Gerkelay! Tayi xipay, pigen, rvpv mu ci xafafimi, pigen. Feymew rumen tvfeyci ruka mew. Inaltu Jiqbewfv pefin tvfeyci mayordomo. Feymew pegelelfin papil ñi yenieel, pegelelfilu iñce kimlay. Cem wigka ñi wiriel tvfa?, pienew tvfeyci mayordomo. Kam kolono am fe?, pienew tvfeyci mayordomo. Wigka, pifin iñce. Feymew eluenew ka papil ñi rumeam. Feymew amun, feymew puwvn tvfeyci puertero mew inaltu Kaqtn gilawe mew mvlelu. Pegelpun ñi papil. Feymew: rumege may, pienew tvfeyci wigka. Cumgeci rumekey ce?, pifin tvfeyci wigka. Iñce may jvkafun ñi namuntu rumeael. Kiñe ina mvxvmtuan, pifin tvfeyci wigka. Tvfa mew ajkvlayay ci am kay Wencupag?, pifin tvfeyci wigka. Kizuley ta Wencupag, tañi pu kona kom amuy gvjiwalu pewen mew, pienew tvfeyci wigka. Namuntu hoyawkey kvne pu zomo miawkey tvfa mew, pienew tvfeyci wigka. Feymew namuntu hopun, wvla pvcikerkey ko. Nentupantalonvn, nentusumejvn, siwaltupun, ka kiñe mamvj kintun ñi rexvwtuam. Feymew hopun. Hopulu iñce feymew tukupantalontun, tukusumejtun. Feymew amun Melin mew. Tvyew

pvle xaffin Wencupag. Cew konaymi?, pienew. Amualu iñce ñi peñi mew, pifin. Ramtufin: akutunarkentinatupelu ñi peñi? Akulay, pienew. Feymew rumen, puwvn ruka ñi peñi mew, mvlerkey ñi kuse kuku. Feymew puwvn umañpun. Umañpulu iñce akutuy ñi peñi miawkelu arkentino mew. Feymew mankuwvlfín: mogeymi peñi! Fvxa kuyfi pewewkelayu peñi!, pifin iñce. Ka fey pienew kay. Kvlawentumen Wvñfali mapu mew. Feymew kvpatun ka. Kiñe kvyen mu peno miawvn tvyew.

Nvxamkan Wenculaw

Kuyfi kaxkvnapelu iñce kayuyawvlyiñ ñi pu kona. Aelu antv nentumakuñvn, nentukamisan. Feymew xixagtu kvzawvn. Kvla ñi pu wehvy kvpatulay, jvkay tvfeyci menoko mew ñi kaxkvnyael egvn rukayael Feymew iñce mekekan ñi kaxkvnan yu peñi yem iñciw, ka kiñe kona nieyu. Feymew abvn mew arelu antv: amutuyiñ, piwiyiñ. Feymew tukukamiastun. Tukukamisatulu iñce naypvley furi mew. Cem cey?, pin, nentunvn kamisa, nentulu ñi kamisa iñce mvlerkey kiñe fvca kirke. Tvfa kirke!, pifi ñi peñi yem. Feymew wixanentupay ñi kuciju, cvgarvfi tvfeyi kirke. Wegfuy may ñi kuciju ñi peñi yem. Negvmay tvfeyci kirke. Kvme norvmnorvmtuyiñ kuciju ka nortulu iñ kuciju. Feymew ka cvgarvgey tvfeyci kirke, feyci wvla en rumey tvfeyci kuciju ragi pvxa kirke. Feymew sicoyiñ, kvnuñiyiñ kiñe rvgi mu, kankatukvnuñiyiñ tvfaci kirke, kvpatuyiñ ñi ruka mew. Feymew akutuyiñ ruka mew. Umañ mew amuy yegemealu kvna rukayael, feymew felekay, piam, tvfeyci kirke. Feymew naynaymum tvfeyci kirke cijemkvlewey ñi furi. Epuwentun mew ka amuy ñi pu kona yemeal kvna, amuy ñi peñi cvgarvkirkekelu. Feymew geweturkelay tvfici kirke, tvfeyci rvgi abv mapu xanaleturkey. Feymew abvn mew kecu kvyen ci kayu cey, feymew kuxanvn, fentepun kuxanvn bakan reke. Feymew ajkvkefin kiñe maci, kvme maci pigekey, mvley furi Ñelol. Feymew wicalgemen tvfeyci maci, yegemen. Feymew macitupaenew, macitupaetew kimenew femgeci bagvmfiel tvfeyci kirke. Kirke may pekerkey, bagvmvrkefin sicoy kvnurkefi kiñe rvgi mew. Feymew xipaturkey tvfeyci kirke, fey may kuxaneleyew, pienew may tvfeyci maci. Kizu kimniekayeale anci?, pienew tvfeyci maci. Feymew mogelpatuenew. Fey tvfaci kirke piwvcen may, pienew tvfeyci maci.

Pvleytu Xurew

Amurkey Wvñfali mapu mew maje Xurew, gojipurkey Wencupag pigece wexu mew. Gojipulu vlkatuturkey. Tvfeyci wece wexu fentepun kvmelkalerkey wesakelu mew, kvme kawejugerkey, kvme cijagerkey. Miawvrkefuy kake weceke wexu, xvrvrkelay tvfeyci wece wexu mew. Feymew gojipurkey, gojilu vlkatuturkey:

Papay ka papay

kvpan tayi

kojetumeci ñi pu wehvy mew, pin

feymew kvpan papay

gojili iñce papay
ijamtucelayan papay
kvme gojiñmuken ñi kuñifajgen iñce papay
gojipan eyimi mi ruka mu papay
papay ka papay!

Niefulmi kvme koñi papay
eluafeyu kvme kawaju
wixañniepan kvme kawaju
pvrayalmi pvrayafuymi papay
kvpa jajeyefeyu papay
kvme zomo eyimi ka papay

iñce kay papay
kvme wenxu iñce kay ka papay
wixawixalepay pvci alasan papay
magkazale mi koñi
magkazkayafuy papay
tami cumnofuel papay
tami vzenofuel ka papay
tami ijamnofuel ka papay
elufeli tami kvme koñi papay

iñce kay kvme jaja pikayafeyu papay

tami fvta kvme cezkvy pikayafun,
pirkey may tvfeyci wece wenxu. Gojirkey, gojilu kvme anvlvrkey, pvci abvn mew
cvgarvrumparkeeyew kiñe wenxu. Majmageymi tami wezañmagen, pigerkey tvfici wece
wenxu. Pvxa mu konvrkey ñi ajfvn. Feymew gojiwerkelaygvn, kvpalgeturkey tvfici wece wenxu
Xurew mew, epe barkey tvfeyci wece wenxu. Wvh pvle amurkey Xurew tvfeyci ajfvlceci
wenxu mew. Pepurkefi tvfeyci wenxu. Kvpan, pirkey Xurew, wvya may kvpay ñi maje, fey
may ajfvlmarkeen may, feymew kvpan! Cem zvgu ajfvlmaen ñi maje tami wezañmagen? Eymi
femgeci wenxu am tañi maje wezañma? Bale tañi maje bayaymi kay wezañma! Cew ta
rumeaymi tami weza xewagen? Arkentino konan, pilmi mvlepuy tañi kvme maje tami ajfvlel.
Konan ta Gvlumapu, pilmi mvley tañi caw tami ajfvlel. Fentepun Wapo ñi tañi pu maje tami
ajfvlel. Ajkvlle tvfeyci gehke pu wehvy bagvmgepayaymi. Mvten xvrfimi tati wenxu mew
ajfvlfimi tami wezañmagen. Niey ta peñi niey ta fenxen maje. Xewa reke mvley tañi fente
wapogen ta tvfeyci ce?, pigerkey tvfeyci wenxu ajfvlcclu.

Feymew zvgrurkey ka tvfeyci wenxu: Gojin mew ajfvlcerken may, kimlan tañi ajfvlcen. Kimkvleli
femlayafun may. Welu kujiafin, kvme kujian may. Feman, pikelayafun kvmeke wehvy mew?
Yafkawgean, pikelayafun. Kiñe ina kujian epu exipu, epu piña, meli kawaju, kayu waka. Femgeci
kujian may. Fvrenegeci bagvmafin pigeli kay. Bagvmeli mew, cempeafuygvn kay? Fvrenegeci
ka Xurew. Eymi tami maje no anci, iñciw kay wehvywen Xurew, fvreneen. Cew ta rumean ta
iñce? Konan ta arkentinu mu, pigeli eyew ta pepuan tañi kayñe? Fvrenegeci, bakale tati
wenxu xvrn ta kujin mew, pirkey tvfeyci wenxu.

Feymew welewerkey Xurew. Fey vrke may, pirkey. Kiñe ina kimay geh fotvm!, pirkey Xurew. Wvle mvten amuay werken, pirkey Xurew. Feymew werkerkey Kvlalemu geh fotvm mew. Ajfvy tañi fotvm tañi wehvy, fey ta kimpe tañi wehvy, pekefin may ta tfeyeci ajfvlcelu, kvme pienew, kujian, pienew, fey ta kimpe tañi Kvlalen, pigerkey Kvlalen. Feymew jazkvrkey Kvlalen. Kiñe ina wvne bayay wezañma!. Pigerkey tfeyeci ajfvlcelu. Feymew malogerkey, nvñmagerkey ñi kecan kujin tfeyeci wenxu ajfvlcelu. Feymew puwvrkey kiñe logko mew, feymew jaqpetuy ñi kujin. Feymew mogeturkey tfeyeci wece wenxu ajfvlkeel. Femgeci femvrkey may.

Kiñe pasean mawiza mew

Kiñe antv xipayu pemeael mawiza waywentu ñi ruka mew ñi paxon Fitor Ciapa. Amuyu kiñe rvpv inayu. Tvyew pvle pepuyu kvcig, nvmpvpuyu. Feymew konpuyu mawiza mew, rvpv niey konpuyu tvyew pvle, abv kon pewerpulayu rvpv. Feymew kaxvkvnuyu mawiza mew, kvbantu mawiza rumeyu. Ka tvyew pvle, rekvja niey konpuyu. Figumkeyu pu kvba. Feymew pey fvh lige ñi paxon. Cem tvfa?, pienew. Fvh lige ta tfey, pifin. Mvna kvmelkaley!, pi. Feymew nvminpvrmi, kvla nvy tukuli fonsijo mew. Feymew ka amuyu, ka tvyew pvle pepuyu mvna kvme kacu, karvley. Cem pige y tvfa?, pienew. Kimlan, pifin. Cumgeci yeafuyu cey tvfaci kacu?, pienew ñi paxon. Iñce yekatuli kay, pifin. Ka antv wvla yelpayaen, pienew ñi paxon. Feymew rumeyu, konkvleyu mawiza mew. Puwiyu kiñe fvxa kvlantu mawiza mew. Zigumrumeyu mawiza mew, rumelu iñciw pepuyu kaxvn mamvj taflayael makina mew. Feymew wentu mu rumeyu, kuykuyturpuyu. Rumeyu, konpuyu ka kiñe mawiza mew. Kimlayu seña mapu. Mvna kvmeke mamvj mvlelay, pvcike rume mamvj. Mvna kvmeufuy kuyubel mew tvfaci mamvj, pi ñi paxon. Tvfaci mawiza mvna kvmelay miawvn mew, zumiñkvley pvci mawiza. Kacu niey, pvcike vten niey tfeyeci mawiza. Feymew tvyew pvle kiñe agkvn koyam mew, pen kala kvlaley, epu wenuley, ka kiñe wenulefuy, welu pvci pvraley. Feymew miawvln ñi kucijo, feymew kaxvmtun kiñe mamvj feymu nakvmvn kiñe kalal. Cumniekey?, pienew ñi paxon. Igekey, pifin ñi paxon. Cumgeci igekean ci?, pienew ñi paxon. Afvmgekey kvxal mew, caja mew, caziñmakvnugey xapi, feymew igekey tvfa paxon, pifin ñi paxon. Feymew rumeyu, ka tvyew pvle pepuyu fenten pagi kalal. Nvafulu ñi paxon. Nvkilge!, pifin, mvna fvreyey ta tfey, pifin ñi paxon. Feymew ka konpuyu kvlantu mew. Wvne konkvlekey ñi paxon. Feymew tvyew pvle: kansan Kajfvn, pienew, ey mi kay wvne konge, pienew. Faci pvle kvnuyu tvfa mu kaxvkvnuyu, pifin. Feymew kaxvkvnuyu. Epe xipapulu iñciw peeyew kiñe sagka, wvxvkemum ko pukem. Feymew xipapayu. Ajkvtukeyu raraken ko, ajkvlayu. Feymew: abv mapulepelay Kijem bewfv, pi ñi paxon. Feymew wvñomeyu, wvñomelu pey kaypvtukemum cukaw ñi paxon. Tvfa cumkemum?, pienew. Cukaw tañi kaypvtukemum, pifin ñi paxon. Konpayu kiñe kvlantu mawiza mew zigum rupayu. Feymew peyu kiñe konkon, wixantupafuy xalka ñi paxon xalkatuafilu tvfaci konkon, leftuy tvfici konkon, feymew xalkatulayu. Feymew geju xipapayu tfeyeci mawiza mew. Kom ijfozvy paxon, antioko, namum, pantalon, ijfozvy ñi paxon, pelofelay ñi paxon. Feymew xipapayu. Faw pvle pepay kiñe pvci kvlklv ñi paxon, fentepun kvme pvci kvlklv, coz mvpvwe coyke keciley. Feymew yerpay ñi paxon. Pekelayu famgeci kvlklv, piyu. Ramtufi ñi paxon: cew mvleyu ruka?, pifin. Faw pvle, pi. Iñce faw pvle xokifin paxon, pifi ñi paxon. Naqyu, pepulyu

seña mapu feymew kimmapupuayu, pienew ñi paxon. Kvme amulelayu ta tvfa!, pifi ñi paxon. Cew pvle vrke amfe?, pienew ñi paxon. Faw pvle xokifin, pifin. Fentepun weñagkvyu, aroweyu yu jvkan, pelayu rvpv, fentepun xogey tvfeysi mawiza. Faw pvle amuyu, pifin ñi paxon. Wvnelege may!, pienew ñi paxon. Jvkan peno ñi paxon wvnelelay, pin may ñi rakizuam. Iñce kay fentepun jvkan ñamael pu mawiza. Feymew wvnepan, faw pvle kimvn ñi rumemum. Pepayu tvfici kaxvn mamvj. Fey tvfa mu rupapeyu paxon!, pifin ñi paxon. Fey tvfa tayu rvpv Kajfvn!, pienew ñi paxon. Tvfa mu pvci kansatuyu, pienew ñi paxon. Feymew kansatupayu. Fentepun jvkayu ahay! Ñamliyu cumgeci umañafulu ci iñciw?. Pienew ñi paxon. Iñce gvñvli bagvmpeafeyu may Kajfvn!, pienew ñi paxon. Iñce ayen mvten. Zew kansatuyu kvpayu. Pvcinma inayu rvpv ka ñamliyu, feysi wvla kaxvkvnuyu kiñe kvlontu mawiza mew, fentepun xogey. Feymew xipapayu, feysi wvla peyu rvpv. Feymew xipapayu, rvpvtupayu. Mvna pelayu rayen kolkopiw fey turpatuyu. Xipapatuyu gvksamkawtuyu cumafulu cew iñciw ñamliyu, piyekvpatuyu rvpv. Femgeci ñamfuyu may kiñe fvxa mawiza mew. Femgeci gvksamkatuaen mapucezvgun mew, pienew ñi paxon, cuci kim cijkatulu kimaeyew mew yu femyawvn, yu ñamkiawvn. Feymew fey piaeyew yelgeaeyew Santiaw mew ñi wehvy mew Rodolfo Len mew.